

*in*  
IOH: ERHARDI  
MEDITATIONES

*h. p. f. p. p.*  
SACRÆ.

EDITIO POSTREMA

*prioribus emendatio.*



OXONIÆ,

Apud Henricum Hall, Academiae  
Typographum, impensis Roberti  
Blagrove. 1656.





(1)  
IOH. GERHARDI  
MEDITATIONES  
SACRÆ.

---

MEDITATIO. I.

De Vera peccatorum agnitione,

*Sanæ confessio morbi.*

**S**ANCTE Deus, iuste Iudex, obversantur oculis & animo peccata mea; in omne die de iudicio cogito, quia mors impendit omni hora; in omni die de iudicio cogito, quia de omni die reddenda erit ratio in iudicio. Executio vitam meam, & ecce tota est vana & profana; Vanæ & inutiles multæ actiones meæ, vanæ adhuc plures locutiones, vanæ insuper plurimæ cogitationes. Nec solum vana est vita mea, sed etiam profana & impia; nihil in ea invenio boni; si quid enim in ea videtur boni, verè bonum & perfectum non est, quia peccati originalis & corruptæ naturæ vitiauit id contagium. Dicebat S. Job. Verebar omnia opera mea. Si ita conqueritur sanctus, quid facere debet impius? Omnes nostræ iustitiæ sunt sicut pannus menstruatus. Si tales nostræ iustitiæ, quales tandem erunt nostræ iniustitiæ? Si omnia feceritis,

dicit salvator , quæ mandata sunt vobis dicite ; Servi inutilis sumus. Si inutiles sumus obediendo , ceterum abominabiles erimus transgrediendo. Si me ipsum & quicquid possum, etiam quando non pecco, tibi, sancte Deus, debeo; quid erit, quod pro peccato reddere possum ? Ipsa nostra , quæ talis videtur , justitia, divinæ justitiæ comparata , est mera injustitia ; lucerna in tenebris fulgere cernitur: sed in solis radiis posita obtenebratur, sæpe lignum creditur rectum, si ad regulam non ducitur , sed tamen si regulæ conjungitur, per quandam tortuositatem, ubi tumescat, invenitur. Sæpe imago sigilli videbitur perfecta in oculis intuentium, & tamen multum est imperfecta in oculis artificis: Ita sæpe sordet in discretionem judicis, quod in æstimatione fulget operantis: alia enim Dei, alia hominum iudicia. Multorum me peccatorum terret memoria. Sed plura adhuc cognitionem meam fugiunt. Delicta quis intelligit? ab occultis meis munda me, Domine ! ad cælum oculos levare non audeo, quia offendi eum, qui in cælis habitat. Nec in terra invenio refugium: quem enim favorem sperare ausim à creaturis , cum offenderim creaturarum Dominum? Adversarius meus Diabolus accusat me: Æquissime Judex, dicit ad Deum, iudica istum meum esse ob culpam , qui noluit tuus esse per gratiam : Tuus est  
per

per naturam, meus est per delictorum complacentiam; tuus est per passionem: tibi inobediens, mihi obediens; à te accepit immortalitatis & innocentiae stolam, à me accepit pannosam hanc pessimæ vitæ tunicam; tuam vestem dimisit, cum mea ad te venit. Iudica istum meum esse, & mecum damnandum esse. Accusant me omnia Elementa. Cœlum dicit; Ego lucem tibi ministravi ad solatium: Aër dicit; Ego omne genus avium tibi dedi ad obsequium: Aqua dicit; Ego diversa genera piscium tibi dedi ad esum: Terra dicit; Ego panem & vinum tibi dedi ad nutrimentum; Sed tamen his omnibus abusus es ad creatoris nostri contemptum. Omnia ergo nostra beneficia convertantur tibi ad supplicia. Ignis dicit; In me comburatur: Aqua dicit; In me demergatur: Aër dicit; In me veneniletur: Terra dicit; A me absorbeatur: Ignis dicit; A me deglutiatur. Accusant me Angeli sancti, quos mihi dederat Deus ad ministerium, & in futura vita ad consortiū, sed peccatis meis sancto eorum ministerio in hac vita & spe consortii in futura vita me privavi. Accusat me ipsa dei vox, lex scilicet divina; aut implenda est lex divina, aut mihi peritundum: sed legem à me impleri impossibile: in æternū perire intollerabile. Accusat me Deus Iudex severissimus, executor æternæ suæ legis potentissimus: illū fallere non possum.

sum; est enim ipsa sapientia : ab eo fugere non possum; est enim ubique regnans potentia. Quo ergo fugiam? Ad te, ô pie Christe, Redemptor & Salvator noster unice ! Magna sunt peccata mea, sed major est satisfactio tua; magna est injustitia mea, sed major tua justitia. Agnosco ego, tu ignosce : Aperio ego, tu operi : detego ego, tu tege. In me nihil est, nisi unde damner; in te nihil est, nisi unde salver: commisi ego multa, unde justissimè ego damnari possim; sed tu non amisisti, unde miserecorditer me salvare possis. Audio vocem in Cantico, quæ jubet me abscondere in foraminibus Petræ. Tu es Petra firmissima; foramina Petræ sunt vulnera tua; in illis me abscondam contra accusationes omnium creaturarum. Clamant ad cælum peccata mea; sed fortius clamat sanguis tuus pro peccatis meis effusus; Valida sunt peccata mea ad me coram Deo accusandum; sed validior est tua passio ad me defendendum. Injustissima vita mea potens est ad me damnandum; sed justissima vita tua potentior ad me salvandum. Appello à throno justitiæ ad thronum misericordiæ, nec ad judicium venire cupio, nisi sanctissimo tuo inter me & iudicium tuum interposito me ito.

## MEDITATIO. II.

Exercitium pœnitentiæ ex Dominica  
Passione.

*Patientem respice Christum.*

**A** Spice fidelis anima, dolorem in cruce patientis, vulnera pendentis, cruciarum morientis. Caput illud Angelicis tremendum spiritibus densitate spinarum pungitur: Facies, pulchra præ filiis hominum, sputis impiorum deformatur: Oculi lucidiores sole caligant in morte: Aures, quæ audiunt Angelicas laudes, peccatorum insultibus & sarcasmis perstrepunt: Os, quod divina profert eloquia & angelos docet, felle potatur atque aceto: Pedes, ad quorum scabellum adoratur clavis affiguntur: Manus, quæ tetenderunt cœlos, in cruce extensæ sunt, & clavis affixæ: Corpus, sanctissima Deitatis sedes & purissimum habitaculum, verberatur, & lancea perfoditur, nec remansit in eo nisi lingua, ut pro crucifigentibus oraret. Qui in cœlis regnat cum Patre, tristissimè affligetur à peccatoribus in cruce: Deus moritur, Deus patitur, Deus sanguinem fundit. Ex pretii magnitudine, periculi æstima quantitatem: Ex remedii pretio, morbi æstima periculum. Magna omnino vulnera, quæ

non nisi vulneribus vivificæ & vivificantis  
carnis potuerunt sanari : magnus certè mor-  
bus, qui non nisi morte Medici curari po-  
tuit. Considera, fidelis anima, flagrantissi-  
mam Dei iram : Deprecator erat factus post  
primi parentis lapsum æternus ipse & uni-  
genitus & unice dilectus Filius; nondum ta-  
men aversus furor eius : Intercedebat is per  
quem condidit secula, & miserorum causam  
in se recipiebat summus ille salutis nostræ  
Advocatus; nondum tamen aversus furor  
eius. Carnem sibi induit Salvator, ut divini-  
tatis gloria carni communicata peccatricem  
carnem expiaret, ut vis medica iustitiæ per-  
fectæ carni communicata venenatam pec-  
cati qualitatem in nostra carne hærentem ex-  
ergeret, & carni nostræ gratia obtingeret;  
nondum tamen aversus furor eius. Peccata  
& peccatorum merita in se transfert: corpus  
ligatur, cæditur, vulneratur, configitur, cru-  
cifigitur, in sepulchrum deponitur. Sanguis  
copiosè instar roris per omnia patientis  
membra profluit. Sanctissima anima supra  
modum contristatur, immo usq; ad mortem  
tristis est, doloribus inferni subjicitur, dere-  
linqui se à Deo clamat æternus Dei Filius.  
Tantam sanguinei sudoris copiam profun-  
dit, tantos angores persentiscit, ut Angeli cō-  
fortatione indigeat, qui Angelos omnes  
confortat: moritur qui omnibus viventibus  
vitæ

vitæ dator. Quid fiet in arido ligno, si hoc fit in viridi? Quid fiet peccatoribus, si hoc fit iusto & sancto? Quomodo puniet peccata propria; qui sic sævit in aliena? Quomodo id tolerabit perpetuò in servis, quod tam atrociter punit in filio? Quid passiuri sunt, quos reprobatur, si tanta patitur, quem unice amat? Si Christus sine flagello non exiit, qui tamen sine peccato venit, quantis flagellis digni, qui cum peccato in mundum veniunt, in peccato vivunt, & cum peccato exeunt? Lætatur servus, dum pro delicto ipsius tam graviter dilectus dolet filius. Iram Domini accumulatur servus, dum pro lenienda & placanda Patris ira tantum laborat Filius. O infinitam Dei iram! ô furorem inestimabile! ô justitiæ rigorem inæstimabilem! Qui in unicum dilectissimum, suæq; essentiæ participem filium sic sævit, non propter aliquod delictum proprium, sed quia pro servulo deprecatur, quid servo faciet, qui in peccatis & offensionibus securè perseverat? Timeat servus, & exhorrescat & contristetur de suis meritis, dum etiam merita non sua punitur Filius: timeat servus, qui peccare non cessat, dum pro peccato sic laborat Filius: timeat creatura, quæ Creatorem crucifixit: timeat servus, qui occidit Dominum: timeat impius & peccator, qui pium & sanctum sic afflixit. Audiamus, charissimi, clamentem, audiamus lacrymantem; clamat de cruce. Vide, homo,

quæ pro te patior: ad te clamo, quia pro te morior: vide pœnas, quibus afficior: vide clavos quibus confodior, non est dolor sicut quo crucior; Cum sit tantus dolor exterior, interior planctus est gravior, cum te tam ingratum experior. Miserere, misereri nostri, Miserator unice, & saxeæ nostræ corda ad te converte.

### MEDITATIO. III.

De fructu veræ & seriæ pœnitentiæ.

*Christus, Resipiscite, Clamat.*

**F**undamentum & principiû sanctæ vitæ est salutaris pœnitentia. Ubi enim vera pœnitentia, ibi remissio peccatorû. Ubi peccatorum remissio, ibi gratia Dei. Ubi gratia Dei, ibi Christus. Ubi Christus, ibi ipsius meritû. Ubi Christi meritum, ibi satisfactio pro peccatis. Ubi satisfactio pro peccatis, ibi justitia. Ubi justitia, ibi læta & tranquilla conscientia: Ubi tranquillitas conscientia, ibi Spiritus S. Ubi Spiritus sanctus, ibi tota sacrosancta Trinitas. Ubi sancta Trinitas, ibi vita æterna. Ergo ubi vera pœnitentia, ibi vita æterna. Ubi vero pœnitentia non est, ibi nec peccatorum remissio, nec Dei gratia, nec Christus, nec ipsius meritum, nec pro peccatis satisfactio, nec justitia, nec tranquilla conscientia,



conscientia, nec Spiritus Sanctus, nec sancta Trinitas, nec vita æterna. Quid ergo poenitentiam nostram differimus? Cur in crastinam eam rejicimus? nec dies crastinus, nec vera poenitentia in nostrarum virium sunt potentia: Neque solum de die crastino, sed etiam de hodierno reddenda est aliquando ratio in judicio. Non tam certus dies crastinus, quam certus est impoenitentibus interitus: promisit Deus poenitenti veniam, sed diem non promisit crastinum. Non habet locum Christi satisfactio, nisi in corde vero contrito. Peccata nostra dividunt inter Deum & nos, testatur Esaias Propheta. Per poenitentiam autem ad ipsum revertimur. Agnosce & dole ob peccati tui reatum, sic Deum in Christo tibi senties placatum. Deleo iniquitates tuas, dicit dominus: Ergo peccata nostra conscripta erant in cœlesti curia. Averte faciem tuam à peccatis meis, petit Propheta: Ergo ponit Deus iniquitates nostras in conspectu suo. Convertere ad nos, Deus, orat Moyses: Ergo peccata dividunt nos à Deo. Peccata nostra responderunt nobis, conqueritur Esaias: Ergo accusant nos quorum tribunal divinx justitiæ. A peccatis meis munda me, orat David: Ergo peccatum turpissima foeditas coram Deo. Sana animam meam, quia peccavi tibi, orat idem: Ergo peccatum est

est animæ morbus. Quicumq; peccaverit mihi, delebo eum de libro meo, dicit Dominus: Ergo propter peccata ex libro vitæ delemur. Ne projicias me à facie tua, orat Psaltes: Ergo propter peccata à Deo projicimur. Spiritum sanctum tuum ne auferas à me: Ergo peccatis ex templo cordis Spiritus Sanctus ejicitur, sicut fumo apes, & foetore columbæ fugantur. Redde mihi lætitiā salutaris tui: Ergo peccata animum angunt, atque cordis succum exhauriunt. Terra infecta est ab habitatoribus suis, qui transgressi sunt legem, clamat Esaias: Ergo peccatum est contagiosum quoddam venenum. De profundis clamavi ad te, Domine, ait Psaltes: Ergo peccatis ad infernum deprimimur. Olim eramus mortui peccatis, dicit Apostolus: Ergo peccatum est spiritualis mors animæ. Per peccatum mortale homo amittit Deum: Deus est infinitum & incomprehensibile bonum: Deum ergo amittere, est infinitum & incomprehensibile malum. Sicut Deus summum bonum, ita peccatum est summum malum. Pœnæ & calamitates non sunt vera mala, quia ex illis multa eliciuntur bona: Quinimo, quod & bona sint, inde patet, quia sunt à summo bono, scilicet Deo; à quo non potest procedere, nisi bonum: Fuerunt in summo bono, scilicet Christo, summum autem bonum non est particeps

ceps veri mali. Ducunt etiam ad summum bonum scilicet vitam æternam. Per passionem Christus intravit in suam gloriam, per tribulationes Christiani ingrediuntur vitam æternam. Summum ergo malum peccatum est, quia abstrahit à summo bono, quantum appropinquas Deo, tantum recedis à peccato, quantum appropinquas peccato, tantum recedis à Deo. Quam salutaris ergo pœnitentia, quæ à peccato nos abstrahit, & ad Deum nos reducit? Verè tam magnum est peccatum, quàm magnus is, qui peccato offenditur, eum vero cœlum & terra non capiunt. Vicissim vero tam magna est pœnitentia, quam magnus is, ad quem per pœnitentiam redimus. Accusat peccatorem conscientia quam polluit. Creator quem offendit, culpa qua transgressus est, creatura qua abusus est. Diabolus cujus impulsu secutus est: quàm salutatis pœnitentia, quæ à tantis accusatioribus liberat! Properemus ergo, properemus ad tam salutarem tanti morbi medicinam. In morte si agas pœnitentiã, non relinquis peccata, sed peccata te relinquunt. Vix invenies quenquã verã pœnitentiã egisse in morte, nisi unicum latronem in cruce. Quatuordecim annis servivi tibi, dicebat Jacobus Labano, tēpus est ut prospiciã domui meæ, & tu si tot annis huic mundo & vitæ servivisti, an non æquū, ut animæ incipias providere? *frangulis*

gulis diebus caro nostra cumulat delicta ; singulis ergo diebus spiritus per pœnitentiam eadem lavet. Mortuus est Christus , ut moreretur in nobis peccatum , & nos volumus , ut vivat & regnet in cordibus nostris id , cui ut vitam auferat , ipse Filius Dei mortuus est. Christus non intrat in cor hominis per gratiam , nisi Johannes Baptista viam ei paret per pœnitentiam : non effundit Deus misericordiæ oleum , nisi in vas probè contritum. Dominus mortificat prius per contritionem ; ut postea vivificet per Spiritus consolationem ; prius in infernum ducit per serium dolorem ; ut ex inferno reducat per gratiæ saporem. Audiit Elias prius spiritum grandem & fortem , subvertentem montes , & conterentem petras , & post spiritum , commotionem ; & post commotionem , ignem ; Tandem vero subsecutus tenuis & tranquillæ auræ sibilus ; Ita quoque gustum amoris divini præcedit terror , consolationem præcedit tristitia. Non alligat Deus vulnera tua nisi prius illa agnoscas & deplores ; Non tegit Deus , nisi prius detegas ; Non ignoscit , nisi prius agnoscas ; Non justificat , nisi prius teipsum damnes ; Non consolatur , nisi prius in te desperes. Hanc veram pœnitentiam efficiat in nobis Deus per spiritum suum.

## MEDITATIO. IV.

Meditatio de nomine Jesu.

*Nomine quid Jesu suavius esse potest?*

**O** Bone Jesu; sis etiam mihi Jesus, propter sanctum tuum nomen misereri mei. Condemnat me vita mea, sed nomen Jesu salvabit me. Propter hoc nomen tuum fac mihi secundum nomen tuum, cumque verus & magnus sis Salvator, utique etiam veros & magnos respicis peccatores. Miserere mei, bone Jesu, in tempore miserandi, ne damnes me in tempore judicandi. Si me intra misericordiae gremium receperis, non erit propter me angustior, si mihi micæ bonitatis tuæ distribueris, non eris propterea indigentior: mihi natus es, mihi circumcissus, mihi etiam Jesus factus es. Quam hoc nomen suave & delectabile! Quid enim Jesus, nisi Salvator? Quid autem salvatis incommodi accidere possit? quid ultra salutem adhuc aut petere aut expectare possumus? Accipe me, Domine Jesu, intra filiorum tuorum numerum, ut una cum illis sanctum & salvificum nomen tuum laudare possim. Si mihi integritatem meam ademi, nunquid tibi misericordiam tuam peremi? Si me perdere

perdere & damnare miser ego potui, nunquid propterea misericors tu salvare me non possis? Noli, Domine, sic attendere ad peccata mea, ut obliviscaris misericordiae tuae; noli sic expendere & pensitare delicta mea, ut præponderent merito tuo. Noli sic attendere ad malum meum, ut propterea obliviscaris boni tui, ne memineris iræ adversus reum, sed memor esto miserationis adversus miserum. Qui dedisti mihi animum, ut te desiderare potuerim, num desiderio meo te subtrahes? Qui meum indignationem & justam damnationem mihi ostendisti, num meritum tuum & vitæ æternæ promissionem à me abscondes? Coram cælesti tribunali causa mea agenda, sed solatur me, quod in cælesti curia Salvatoris nomen tibi assignatum, quia de cælo nomen istud per Angelum delatum. O misericordissime Jesu, cui eris Jesus, si miseris peccatoribus gratiam & salutem quærentibus non eris Jesus? Qui suæ justitiæ suæque confidunt sanctitati, illi in se quærunť salutem: ego autem, quia in me nihil æternæ vitæ dignum invenio, ad te Salvatorem confugio. Damnatum salva, peccatoris miserere, injustum justifica, accusatū absolve. Tu, Domine, veritas es, nomen tuum sanctum & verum! Sit igitur in me quoque nomen tuum verum, sis etiam mihi Jesus & Salvator. Sis mihi Jesus in vita præsentē, sis mihi

mihi Iesus in morte, sis mihi Iesus in extremo iudicio, sis mihi Iesus in æterna vita. Utique sis, bone Iesu, quia ut ipse invariabilis es in essentia, ita invariabilis in misericordia. Non mutabitur tibi nomen tuum. Domine Iesu, propter me unicum miserum peccatorem, quinimo etiam mihi eris Salvator, venientem enim non ejicis foras, qui dedisti, ut venire voluerim, dabis etiam ut veniens recipiar, verba enim tua veritas & vita. Damnet me peccati originalis in me propagatio, tu tamen mihi Iesus es, damnet me conceptio mea in peccatis facta, tu tamen mihi Iesus. Damnet me formatio mea in peccatis & sub maledictione facta, tu tamen Salvator meus es. Damnet me corrupta nativitas mea, tu tamen salus mea. Damnent me iuventutis meæ peccata, tu tamen Iesus meus. Damnet me totius vitæ peccatis gravissimis maculatæ transactio, tu tamen Iesus meus manes. Damnet me mors pro peccatis & culpis variis mihi infligenda, tu tamen Salvator meus. Dānet me districtissima extremi iudicii sententia, tu tamen Iesus meus. In me peccatum, reprobatio, damnatio. In tuo nomine iustitia, electio, salus. Sed in nomen tuum baptizatus sū, in non. ē tuum credo, in tuo nomine moriar, in tuo nomine resurgam, in tuo nomine coram iudicio comparebo. Omnia in hoc nomine nobis parata & instar thesauri conclusa,

clusa, tantum de bonis illis decedit, quantum diffidentia mea detraxo, quod à me ut abesse jubeas, per illud ipsum nomen precor, ô bone Jesu, ne mea culpa & incredulitate damner, quem pretioso tuo merito & salvifico nomine tuo salvatum cupis.

## MEDITATIO. V.

Exercitium fidei ex amore Christi in  
agone mortis.

*Mihi Jesu gratia quaestus.*

**V** Ide, Domine Jesu, quam injurius sim in passionem tuam. Cor meum angitur, & contristatur anima mea valde, quia non adsunt opera mea, neque præsto sunt quædam merita, cum tamen tua passio mea sit actio, tua opera sint mea merita: Injurius sum in tuam passionem, quia cum illa sit sufficientissima, supplementum operum meorum anxius adhuc quaero. Quod si justitiam in me invenirem, justitia tua nihil mihi proderet, vel certe eam tantoperè non desiderarẽ, si opera legis requiro, ex lege damnor. Scio autem quod jam non amplius sim sub lege, sed sub gratia. Perditè vixi, peccavi, Sancte pater in cœlum, nec sum dignus vocari filius tuus, non tamen renues me appellare servum. Ne quaeso denegetur



tur mihi sanctissimus tuæ passionis fructus, non sterile scat tuus sanguis, quin fructum in liberanda anima mea proferat. Semper vixerunt in carne peccata mea, tandem quæso mecum moriantur: Semper hucusque dominata est mihi caro mea, tandem triumphet spiritus: Exterior homo putredini & verminibus subjiciatur, ut ad gloriam emergat interior. Semper hucusque obsecutus sum Dæmonis suggestionibus, tandem quæso conteratur sub meis pedibus. Præsto est Satanas, & accusat me, sed in me non habet quicquā. Terret me mortis species, sed mors finis erit meorum peccatorum, & initiū san- & vitæ. Jam demum perfectè tibi placere potero, Deus meus: jam demum in bonitate & virtute confirmabor. Terret me peccatis meis, sed accuset eum, qui suscepit infirmitates meas, quem propter peccata mea percussit Dominus. Debitum meum magnum valdè, neque persolvere quicquam de eo potero, sed in sponsoris divitiis & benignitate confido. Liberet me, qui sponsonem fecit pro me, Persolvat pro me, qui debitum meum recepit in se. Peccavi, Domine & peccata mea multa & magna nimis, nolim tamen atrocissimum illud peccatum committere, ut mendacii te arguam, qui verbis & operibus & juramento testaris, satisfactum esse pro iniquitatibus meis. Pec-  
cata

cara mea non metuo, quia tu justitia mea; ignorantiam meam non metuo, quia tu sapientia mea; mortem non metuo, quia tu vita mea; errores non metuo, quia tu veritas mea; corruptionem non metuo, quia tu resurrectio mea; dolores mortis non timeo, quia tu gaudium meum. Judicii severitatem non metuo, quia tu justitia mea. Instilletur exirelcenti animæ meæ ros tuæ gratiæ & consolationis vivifiæ. Exarescit spiritus meus, sed brevi in te exultabit; Languet & flaccida est caro mea, sed propediem germinabit; Corruptionem subire cogor, sed ex corruptione liberabis me, quia ex omnibus malis me liberasti. Creasti me; quomodo figmentum manum tuarum dissolvi poterit? Redemisti me ab omnibus hostibus; quomodo unica mors prædominari poterit? Corpus & sanguinem & omnia tua immo te ipsum impendisti pro salute mea; quomodo mors detinebit ea, quæ tam pretioso αὐτρω sunt redempta? Justitia es, Domine Jesu: non prævalebunt tibi peccata mea; Vita es & resurrectio; non prævalebit tibi mors mea; Deus es; non prævalebit tibi Satanas. Dedisti mihi arrham Spiritus tui; isthac glorior, isthac triumpho, & firmissimè credo, nullatenus dubitans, quod ad nuptias Agni introire mihi concedetur. Tu vestis mea nuptialis, Sponse charissime, quam in Baptismate

tismate indui. Tu operies meam nuditatem; neq; huic pretiosæ & pulcherrimæ vesti supplemen- tum justitiæ meæ assuam. Quid hominis justitiæ, nisi pannus menstruatus? Quomodo ergo abominabilem istum pannum pretiosissimæ justitiæ vesti assuere aude- rem? In hac veste apparebo coram facie tua in judicio tuo, quando judicabis orbem terrarum in justitia & æquitate. In hac veste apparebo coram facie tua in cœlesti regno. Hæc vestis reget meam confusionem & opprobrium meum, ne in æternum recordetur ejus quisquam amplius. Ibi apparebo gloriosus & sanctus in facie tua, & hæc caro mea, hoc corpus meum, beatissima induetur gloria; gloria autem perenni & æternis seculis nunquam intermoritura. Veni, Domine Jesu; & qui te amat, dicat, Veni.

---

### MEDITATIO VI.

Consolatio pœnitentis ex Passione Christi, ex Anselmo potissimum.

*Cruce Christi nostra corona est.*

**O**Mnis piorum gloria est in Dominicæ passionis ignominia. Omnis piorum requies est in vulneribus Salvatoris nostri. Vita nostra in ipsius morte, gloria nostra in ipsius exultatione. Quam magna est misericordia tua, cœlestis Pater, omnipotens Deus!

us! potui per me te offendere, sed non potui per me te mihi placare: tu igitur in Christo me reconcilias tibi ipsi. Vide ergo, sancte Deus, carnis sacramentum, & carnis meæ remitte reatum. Respice, quod bonus perpeßus est Filius, & obliviscere, quod malus operatus est servus. Caro mea te lacescit ad iram, caro Christi te inflectat, precor, ad misericordiam. Magnum est quod mea meretur iniquitas, sed longè majus quòd redemptoris mei promerita est pietas. Magna est mea injustitia, sed multo maior Redemptoris mei iustitia. Quanto enim Deus superior homine, tanto mea malitia est inferior ipsius bonitate, ut qualitate, ita etiam quantitate. Totum quod sum, tuum est conditione, fac ut sit etiam totum tuum dilectione. Qui me facis petere, fac & accipere: das mihi quærere, da etiam invenire: doces pulsare, aperi ergo mihi pulsante. A te habeo desiderare, à te habeam impetrare, à te habeo velle, à te habeam perficere. Sancte Deus, iuste Judex, si peccata mea celantur, sunt insanabilia; si videntur, sunt detestabilia; urunt me dolore, sed magis terrent timore. Ne contineas, precor, tam veram misericordiam, ubi tam veram agnoscis miseriam. Magnum hic peccatum invenis, maior adhuc sit & uberior tua gratia. Sancte Pater, ne quæso effundas super me iram

iram tuam , cum propter peccata mea Fili-  
um tuum percussieris. Sancte Jesu, libera  
me ab ira divina, qui in te sustulisti eam pro-  
pter me in cruce. S. Spiritus ; protege me  
tua consolatione contra iram Dei , qui in  
Evangelio misericordiam poenitentibus &  
contritis annunciasti. Sancte Deus, juste  
Judex, non invenio locum, in quem confu-  
gere possim à facie iræ tuæ. Si in cœlum  
ascendero , illic præsens es. Si in infernum  
descendero , ecce tu ades : Si assumam alas  
auroræ , & habitem in novissimo maris, e-  
tiam illic manus tua deducet me , & appre-  
hendet me dextra tua. Ad Christum igi-  
tur fugiam , & in illius vulneribus me ab-  
scondam. O misericors Deus , respice cor-  
pus Filii tui vulneribus omni ex parte sauci-  
atum, & vulnera peccatorum ne respexeris.  
Sanguis Filii tui lavet me ab omnibus pecca-  
ti maculis: audi præces ipsius ardentissimas,  
pro salute electorum tibi oblatas. Sancte De-  
us, juste judex, terret me vita mea, Namque,  
diligenter discussa, tota aut peccatū aut ste-  
rilitas apparet, Et, si quid fructus in ea vide-  
tur, sic est aut simulatum aut imperfectum,  
aut aliquo modo corruptum , ut possit aut  
non placere , aut etiam displicere oculis tuis.  
Certè tota mea vita aut in peccato est &  
damnabilis, aut infructuosa & contemptibi-  
lis. Sed quid separo infructuosam à dam-  
nabi

nabili? Utiq; si est infructuosa, est dam-  
nabilis. Omnis enim arbor, quæ non facit  
fructum bonum, in ignem proficietur: non  
solum illa arbor igni traditur, quæ malos,  
sed etiam quæ nullos proferet fructus. Ter-  
rent me hœdi ad sinistram Judicis constitu-  
ti, non quia aliquid mali fecerunt, sed quia  
nihil boni egerunt. Esurientibus non dede-  
runt cibum, nec sitientibus potum. O er-  
gò lignum aridum & inutile, & æternis ig-  
nibus dignum! Quid respondebis in illo  
die, cum exigetur à te usque ad ictum oculi  
omne tempus vivendi tibi impensum, qua-  
litér à te fuerit expensum? non peribit ca-  
pillus de capite, neq; momentum de tem-  
pore. O angustia! hinc erunt peccata  
accusantia, inde terrens justitia; subitùs pa-  
tens horrendum Chaos inferni, desuper ira-  
tus Judex; intùs conscientia urens, foris  
mundus ardens. Vix justus salvabitur; pec-  
cator sic deprehensus, in quam partem se  
convertet, latere erit impossibile, apparere  
intolerabile: Unde ergò animæ meæ salus?  
unde consilium? Quis est, qui dicitur ma-  
gni consilii Angelus? Ipse est Jesus, idem  
est Judex, inter cujus manus tremo. Respi-  
ra, ô anima, ne desperes. Spera in eo,  
quem times, confuge ad eum, a quo fugisti.  
Jesu Christe, propter hoc nomen tuum fac  
mihi

mihi secundum nomen tuum. Respice me  
miserum invocantem nomen tuum. Si me  
admiseris intra latissimum misericordiae  
tuae sinum; non erit propter me angustior.  
Verum est, ô Domine, conscientia mea  
meruit damnationem, & poenitentia mea  
non sufficit ad satisfactionem; sed cer-  
tum quod misericordia tua superat om-  
nem offensionem. In te Domine con-  
fido; non confundar in æternum.

---

## MEDITATIO VII.

De fructu Passionis Dominicæ,

*Spes mea Passio Christi.*

**Q**uoties de Passione Domini cogito, toti-  
es de amore Dei & peccatorum meo-  
rum venia, magna omninò præsumo.  
Inclinat caput ad osculandum, brachia di-  
stendit ad amplexandum, manus aperit ad  
elargiendum, latus apperit ad cor amore  
ardens aspiciendum: exaltatur de terra,  
ut omnes trahat ad seipsum; Vulnera  
ejus sunt dolore livida, amore fulgida;  
ideò per aperturam vulneris intrare de-  
bemus ad secretum cordis: Prorsus co-  
piosa apud eum redemptio, quia non gut-  
ta aliqua, sed unda sanguinis largitèr  
B per

per quinque partes corporis emanavit. Si-  
cut uva in torculas conjecta onere super im-  
posito frangitur, ac undique locorum effun-  
dit: ita caro Christi, pondere iræ divinæ &  
gravitate peccatorum pressa, liquorem san-  
guinis undiquæque diffundit. Cum Abra-  
ham filium suum in sacrificium offerre vel-  
let. Dicebat Dominus: Nunc verè cogno-  
vi, quod me delegas. Tu quoque immen-  
sam æterni Patris dilectionem agnosce,  
quod Filium suum unigenitum pro nobis in  
mortem tradere voluerit. Dilecti sumus,  
cum adhuc inimici essemus: an nostri ob-  
liviscetur, cum per mortem Filii jam recon-  
ciliati sumus? an in oblivione coram ipso  
esse poterit tam pretiosus filii sui sanguis,  
cum etiam lachrymas & gressus piorum ho-  
minum numeret? an Christus eorum in  
sua vita oblivisci poterit, pro quibus mortem  
sustinere voluit? an oblivisci eorum pote-  
rit in gloria, pro quibus tanta sustinuit tor-  
menta? Considera, fidelis anima, multipli-  
cem Passionis Domini fructum. Christus  
pro nobis sanguineum sudorem fudit, ne fri-  
gidissimus in mortis agone sudor nos opri-  
meret: Luctari voluit cum morte, ne in a-  
gone mortis deficeremus: anxietatem gra-  
vissimam & tristitiam, usque ad mortem  
sustinere voluit, ut æternæ lætitiæ in cœlis  
participes redderemur. Osculo, quod a-  
micitiæ



amicitiæ & benevolentia signum, prodi-  
vult, ut peccatum, quo Satan primos paren-  
tes sub specie singularis benevolentia pro-  
didit, extingueretur: A Judæis capi & li-  
gari voluit, ut nos peccati vinculis ligatos,  
& in æternam damnationem conjiciendos,  
solveret: In horto fieri voluit passionis ini-  
tium, ut expiaret peccatum quod in horto  
Paradisi habuerat principium: Ab Angelo  
confortari voluit, ut Angelorum nos redderet  
in cœlis socios. A propriis deseritur discipu-  
lis, ut nos turpi defectione à Deo avulsos si-  
bi agglutinaret: Coram Concilio à falsis  
testibus est accusatus, ne nos à Satane per  
legem Dei accusaremur: Condemnatus est  
in terris, ut nos absolveremur in cœlis:  
Pro peccatis tacuit, qui peccata non fecit,  
ne propter peccata nostra in iudicium Dei  
adducta abmutescere cogeremur: A lapidis  
cædi voluit, ut nos conscientia & Satanæ  
stimulis absolveremur: Illudi sibi passus est,  
ut nos insultori Satanæ illudere possemus:  
Facies ipsius tegitur, ut à nobis removeret  
velum peccati, quod in nobis aspectum Dei  
impedit, & damnabilem ignorantiam in-  
ducit. Vestibus exui voluit, ut innocentia  
vestis per peccatum amissa nobis restituere-  
tur. Spinis compunctus est, ut cordis no-  
stri compunctiones sanaret. Crucis pon-  
dus portavit, ut onus æternæ poenæ à nobis

submoveret; A Deo se derelictum clama-  
vit, ut æternam Dei cohabitationem nobis  
pararet; Sitivit in cruce, ut rorem divinæ  
gratiæ nobis promereretur, ac ne æterna siti  
periri cogeremur. **Æ**stu iræ divinæ torre-  
ri voluit, ut infernalem ignem à nobis tolle-  
ret. Judicatus est, ut à Dei judicio nos li-  
beraret. Reus peractus est, ut nos reos ab-  
solveret. Iniquis manibus cæsus est, ut  
diaboli verbera à nobis tolleret. Præ do-  
lore clamavit, ut ab æternis ululatibus nos  
servaret. Lachrymas profudit, ut nostras  
abstergeret lachrymas. Mortuus est, ut nos  
viveremus. Dolores inferni persensit,  
ut nunquam illos sentiremus. Humiliatus  
est, ut nostri tumori medicina afferretur.  
Coronâ spineâ coronatus est, ut cœle-  
stem coronam nobis promereretur. Ab  
omnibus passus est, ut omnibus salutem  
præstaret. Caligaverunt ejus oculi in mor-  
te, ut nos in luce cœlestis viveremus gloriæ.  
**A**udivit ignominias & contumelias, ut in  
cœlis audiremus jubilationes Angelicas. Ne  
igitur desperes, fidelis anima: infinitum bo-  
num per peccata tua est offensum, sed infi-  
nitum persolutum est pretium; judicanda es  
propter peccata tua; sed Dei Filius pro toti-  
us mundi peccatis, quæ in se receperat, jam  
judicatus est; punienda sunt peccata tua,  
sed Deus ea jam punivit in Filio suo; magna  
sunt

sunt peccatorum tuorum vulnera, sed pretiosum est sanguinis Christi balsamum; Maledictum te pronunciat Moses, quia non servasti omnia, quæ scripta sunt in libro legis; sed Christus pro te factus est maledictum; scriptum est contra te in cœlesti curia chi-roglyphum, sed illud Christi sanguine est deletum. Tua ergo passio, ô pie Christe, ultimum meum refugium.

---

## MEDITATIO VIII.

De certitudine salutis nostræ.

*Bona spes confundere nescit.*

**Q**uid turbaris, anima mea? quid misericordia Dei adhuc dubitas? Memento Creatoris tui. Quis creavit te sine te? quis formavit corpus tuum in occulto, quando formatum corporis tui habitaculum in inferioribus terræ? Qui igitur curam tui suscepit, cum nondum esses, nonne & is curam ageret, postquam ad imaginem suam te condidit? Creatura Dei sum, ad Creatorem me converto. Quod si Natura mea infecta est à Diabolo, si sauciata & vulnerata est à latronibus, scilicet peccatis; vivit tamen adhuc Creator meus. Qui me po-

suit facere, ille poterit etiam reficere. Qui me creavit sine ullo malo, poterit à me tollere omne malum, quod Diaboli suggestionem, Adami prævaricatione, propria etiam mea actione ad me ingressum, pervasit omnem substantiam meam. Poterit igitur Creator meus me reficere, modò etiam velit. Utique vult; quis enim opus suum odio habet? nonne coram eo sumus sicut lutum in manibus figuli? Quod si me odio haberet, ex nihilo utique non creasset. Ipse salvator est omnium, maximè verò credentium. Mirabiliter me creavit; mirabilius tamen redemit. Nunquam illuxit clariùs, quod nos delexit Dominus, quàm in ipsius passione & vulneribus. Verè diligitur, propter quem Unigenitus ex sinu Patris mittitur. Quod si salutem meam non desiderares, Domine Jesu, quare de cœlo descenderes? Sed descendisti in terram, in mortem, in crucem. Ut servum redimeret Deus, Filio non pepercit. Verè igitur magno more genus humanum complectitur, qui propter generis humani redemptionem Filium suum tradidit affligendum, occidendum, crucifigendum. Charum omninò & verè magnum pretium, quo redempti sumus, chara igitur & magna redemptoris misericordia. Videri alicui posset, quod Deus æquè magno amore electos filios diligat,

diligat, quo Filium unigenitum. Cui enim aliquid impendimus, illud charius est eo, quod impendimus. Ut adoptivos haberet filios, naturali & coëssentiali Filio non perperit. Quid ergo magnum est, quod in domo cœlesti mansiones nobis paraverit, cum Filium suum dederit, in quo est tota plenitudo divinitatis? Certè ubi divinitatis plenitudo, ibi quoque plenitudo æternæ vitæ & gloriæ: Quod si in Christo dedit plenitudinem æternæ vitæ, quomodo parvulam ejus particulam denegabit? Verè magno amore nos adoptivos filios cœlestis Pater amplectitur, propter quos unigenitum Filium tradidit: Verè magno amore Filius nos complectitur, qui propter nos seipsum tradidit. Ut divites nos faceret, extremam tollerravit pauperiem; non enim habuit ubi caput reclinaret suum: Ut nos Dei filios faceret, ipse homo nascitur; neque peracto semel redemptionis opere in posterum nos negligit, sed adhuc in dextrâ majestatis divinæ constitutus, interpellat pro nobis. Quid ad salutem necessarium mihi non impetrabit, cum ad salutē mihi promerendam seipsum impertiverit? Quid pater denegabit Filio, qui obediens ei factus usque ad mortem, mortem autem crucis? Quid Pater denegabit Filio, qui *λύτρον* à Filio præstitum jam antè acceptavit? Accusent me

peccata mea, in hoc intercessore confido; major est, qui excusat, quàm qui accusat. Terreat me imbecillitas mea, in ipsius virtute glorior. Accusat me Satanas, modo excuset me Mediator. Accuset me cœlum & terra, & iniquitates meæ reum me peragant; sufficit mihi, quod pro me cœli & terræ Creator, & ipsa Justitia, deprecatur. Sufficit mihi ad meritum, scire quod non sufficiant merita. Sufficiat mihi, eum habere propitium, cui soli peccavi; quicquid ille non imputare decreverit, sic erit, quasi non fuerit. Neque me moveat, quod peccata mea & gravia, & varia, & sæpius iterata. Nisi enim peccatis onerarer, justitiam illius non desiderem: nisi morbum haberem, medici opem non implorarem. Ipse Medicus est, ipse Salvator, ipse Justitia est; seipsum negare non potest: Ego ægrotus, ego damnatus, ego peccator; meipsum negare non possum. Miserere mei, ô Medice, ô Salvator, ô Justitia; Amen.

---

## MEDITATIO IX.

De amando solo Deo.

*Domino jungaris amore.*

**E**Rige te, fidelis anima, & ama illud  
 lumnum bonum; in quo omnia bona  
 na

na , sine quo nullum aliud verum bonum . Nulla creatura voluntatem nostram exsatiare potest , quia nulla creatura perfectum bonum obtinet , sed tantum participatum . Rivulus quidam boni à divinitate ad eam traducitur , sed fons in Deo semper manet . Quare ergò fonte relicto rivulos consecrari velimus ? Omne bonum in creaturis est imago quædam perfecti illius boni , quod in Deo , imò quod ipse Deus est . Quare ergo arrepto imagine ipsam rem delectare velimus ? Columba ex Arca Noah non poterat in aquarum volubilitate invenire , ubi requiesceret pes ejus . Ita anima nostra in omnium rerum sublunarium numero non potest quicquam invenire ; quod desiderium ejus plenè impleat , propter summam earum inconstantiam & fragilitatem . Annon sibi ipsi injuriam facit , qui infrà dignitatem suam aliquid amat ? Jam verò anima nostra omnibus creaturis nobilior , quia Dei passione & morte redempta ; Quare ergo creaturas amare velit ? Annon id , majestati , in quam evertit illam Deus contrarium ? Quicquid amamus , id vel propter potentiã , vel propter sapientiã vel propter pulchritudinẽ amamus . Quid vero Deo potentius , quid Deo sapientius , quid Deo

pulchrius ? omnis Regum mundanorum potentia ab eo & sub eo : omnis hominum sapientia ad divinam collata , stultitia est : omnis creaturarum pulchritudo ad divinam collata, deformitas est. Si potentissimus Rex quispiam cum tenuis sortis ac conditionis virgine per internuncios de conjugio ageret , annon stolidè ageret illa virgo, si prætermisso Rege potentissimo, egenis velit adhærere internunciis , & Regis ministris ? Sic Deus per omnem illam creaturarum pulchritudinem nos ad se vocare , ad sui amorem excitare voluit ; quare ergò anima nostra , quam sponsus Christus expetit, creaturis velut internunciis hujus spiritualis conjugii adhæreret ? Ipsæ creaturæ clamant, Quare nobis adhærescitis ? quare in nobis finem desiderii vestri ponitis ? non possumus appetitum vestrum exsatiare : ad utriusque nostrum Creatorem accedite. A creaturis nullus amor reciprocus sperandus , à creaturis etiam nullus amor erga nos cœpit ; sed Deus, qui est ipsa charitas, amantem se non potest non amare , quinimò amore suo omnia desideria nostra & omnem amorem nostrum prævenit. Quantum ergo diligendus, qui prior tantum nos dilexit ? Dilexit nos, cum nondum essemus , nam dilectionis divinæ est, quod in hunc mundum nati sumus. Dilexit, cum inimici essemus ,  
nam



nam misericordiae & dilectionis divinae est, quod Filium Redemptorem miserit. Dilexit, cum in peccata prolapsi eramus; nam dilectionis divinae est, quod non continuo, si delinquimus, morti nos tradit, sed conversionem nostram expectat; dilectionis divinae est, quod praeter nostrum meritum, imò contra meritum ad coelestia nos traducit palatia. Sine amore Dei nunquam ad salutarem ejus cognitionem pervenies; sine amore Dei omnis scientia inutilis, imò noxia. Quare charitas excedit omnium mysteriorum notitiam? Quia haec etiam in diabolis, illa non nisi in piis. Quare diabolus infelicissimus? Quia summum bonum amare nequit. Quare Deus contra felicissimus? Quia omnia amat, delectatur in omnibus operibus suis. Quare amor Dei in hac vita perfectus non est? Quia tantum diligimus quantum cognoscimus. Jam verò in hac vita ex parte solum cognoscimus & in ænigmate. In æterna vita perfectè beati erimus, quia perfectè amabimus Deum; perfectè amabimus, quia perfectè cognoscemus. Nemo Pote-rit spem habere perfecti amoris divini in futuro saeculo, qui in hoc non incipit Deum amare: regnum Dei in corde hominis in hac vita incipere debet, aliàs non consummabitur in futuro. Sine amore Dei nullum est æternæ vitæ desiderium: quomodo er-

gò illius summi boni particeps erit, qui non amat? qui non quærit? qui non desiderat? Qualis amor tuus, talis ipse es, quia amor tuus te in se transmutat: Amor est summum Vinculum, quia amans, & res amata fiunt unum. Quid Deum justissimum & peccatores perditos, quid hæc à se invicem in infinitum distantia conjunxit? Amor infinitus. Ne tamen justitia Dei labefactaretur, intercessit pretium Christi infinitum. Quid adhuc Deum Creatorem & animam fidelem creaturam, res infinitè distantes, conjungit? Amor. In vita æterna summo gradu jungemur Deo: quare? quia summo gradu amabimus. Amor unit & transmutat: Si carnalia diligis, carnalis es; Si mundum amas mundanus efficeris. Jam vero caro & sanguis non possidebit regnum Dei. Si Deum & divina diligis, efficeris divinus. Amor Dei est currus Eliæ ascendentis in cœlum: Amor Dei jucunditas est mentis, Paradisus animæ, excludit mundum, vincit Diabolum, claudit infernum, aperit cœlum. Amor Dei est illud sigillum, quo Deus electos & credentes obsignat: nullum Deus in judicio extremo agnoscet pro suo, qui non hoc sigillo obsignatus. Etenim ipsa fides, unica justitiæ & salutis nostræ causa, vera non est nisi per charitatem se exerat: Non est vera fides nisi sit  
firma

firma fiducia : non est fiducia , sine amore Dei: non agnoscitur beneficium , pro quo non aguntur gratiæ: non agimus ei gratias , quem non amamus. Si ergò vera tua fides est , agnoscet Christi Redemptoris beneficium: agnoscet & gratias aget: gratias aget & amabit. Amor Dei est vita & requies animæ nostræ: Recedente anima per mortem interit vita corporis; recedente Deo ab anima, per peccata, interit vita animæ: Vicissim Deus habitat per fidem in cordibus nostris, habitat per amorem in anima nostra , quia charitas Dei diffunditur in cordibus electorum per Spiritum sanctum. Nulla animæ tranquillitas absque amore Dei. Mundus & Satanas maxima illius perturbatio; Deus autem summa animæ requies. Nulla pax conscientiæ , nisi in iis , qui filiali fiducia erga Deum sint affecti. Moriatur ergo in nobis amor nostri , amor mundi , amor creaturarum, ut vivat in nobis amor Dei , qui incipiat in hoc sæculo : ut perficiatur in futuro.

## MEDITATIO X.

De nostri cum Deo reconciliatione.

*Solvit me debita Christus.*

**V**Erè languores nostros Christus tulit, & dolores nostros ipse portavit. O Domine Jesu, quod in nobis meretur æternas pœnas, illud in te transtulisti; onus quod ad infernum usque nos depressurum erat, in te recepisti; vulneratus es propter iniquitates nostras; attritus propter scelera nostra. Tuo livore sanati sumus; posuit Dominus in te iniquitates omnium nostrum. Mirabilis omninò commutatio. Transfers in te peccata nostra, & donas tuam justitiam; mortem nobis debitam tibi irrogas, & donas nobis vitam. Non igitur jam possum ullo modo dubitare de tua gratia, aut desperare propter mea peccata. Quod in nobis pessimum, in te transtulisti; quod optimum in nobis, & tuum opus, videlicet corpus & animam, quomodo despicias? Non derelinques animam meam in inferno, neque dabis ut sanctus tuus videat corruptionem. Verè enim sanctus est, cujus peccata obolita atque ablata. Beatus cui remissæ sunt iniquitates, cui Dominus non imputat peccata. Quomodo peccata nostra

stra imputare nobis poterit Dominus, cum imputaverit ea alteri? Propter scelus populi sui Filium percussit dilectissimum. Ipse ergo in scientia sui justificabit multos, & iniquitates eorum ipse portabit. Quomodo justificabit suos? Audi, anima, & attende. Justificabit eos in scientia, id est, salutaris divinæ misericordiæ & gratiæ in Christo agnitione, ac firma per fidem apprehensione. Hæc est vita æterna, ut agnoscant te solum verum Deum, & quem misisti Filium tuum Jesum Christum; ac proinde si confiteris ore tuo Dominum Jesum, & in corde tuo credideris, quod Deus illum suscitavit à mortuis, salvus eris. Apprehendit autem fides Christi satisfactionem; iniquitates enim suorum ipse portavit, peccata multorum tulit, & pro transgressoribus rogavit. Verè enim paucos habuisset justos, nisi peccatores misericorditer recepisset. Paucos, ô Jesu, haberes justos, nisi peccata remitteres injustis. Quomodo igitur severo judicio peccata pœnitentium judicabit Christus, quæ in se recepit? Quomodo damnabit reum peccatorem, cum ipse factus sit peccatum? Judicabit illos, quos amicos suos vocat? Judicabit illos pro quibus rogavit? Judicabit illos pro quibus mortuus? Erige te, anima mea & peccatorum tuorum obliviscere, quia oblitus eorū

rum

rum Dominus. Quem times peccatorum vindicem, nisi Dominum, qui pro peccatis satisfecit ipse? Quod si aliquis alius pro peccatis meis λύτρον persolvisset, utique adhuc dubitare possem, an etiam satisfactionem illam acceptare velit justus iudex. Quod si homo aut Angelus aliquis pro me satisfecisset, utique dubium esset, an sufficiens sit redemptionis pretium; Jàm verò nullus relinquitur dubitationi locus. Quomodo non accipiet pretium, quod persolvit ipse? Quomodo non sit sufficiens, quod ab ipso Deo? Quid adhuc conturbaris, anima mea? Universæ viæ Domini, misericordia & veritas. Justus etiam Dominus, & justum ipsius iudicium. Quid conturbaris, anima? Erigat te divina misericordia, erigat etiam divina justitia: Quod si enim justus Deus est, utique pro delicto unico duplex non exigit pretium. Propter peccata nostra percussit Filium; quomodo propter eadem nos servos percutiet? Quomodo peccata in Filio punita in nobis quoque puniet? Veritas etiam domini non labefactabitur in æternum. Nolo mortem peccatoris, sed ut convertatur & vivat, clamat Deus noster. Venite ad me, qui laboratis & onerati estis, ego reficiam vos, exclamat Salvator noster. Num mendacii arguemus Dominum, & peccatorum nostrorum

nostrorum pondere misericordiam ipsius deprimere conabimur? Mendacii arguere Dominum, & misericordiam ipsius negare, majus est peccatum, quàm omnia totius mundi peccata: unde etiam plus peccavit Judas desperando, quàm Judæi Christum crucifigendo. Quin potius ubi abundavit delictum, ibi quoque abundavit gratia: quæ peccatorum nostrorum lanci infinitis modis præponderat: Peccata enim hominum sunt, sed gratia Dei est peccata temporalis; gratia autem Domini nostri ab æterno in æternum. Pro peccatis satisfactum, gratia Dei Christi morte reparata, & in æternum stabilita; ad quam confugio devotus & supplex.

---

## MEDITATIO XI.

De satisfactione pro peccatis nostris.

*Mors Christi vita piorum.*

**V**enite ad me, qui laboratis & onerati estis, ego reficiam vos: Verba sunt Salvatoris nostri, Verè, Domine Jesu, oneratus sum nimis, & sub peccati pondere ingemisco, sed ad te fontem aquæ vivæ propero. Veni ad me, Domine Jesu, ut possim venire ad te. Venio ad te Domine, quia prius venisti

nisti ad me. Venio ad te, Domine Jesu, & anxie te desidero, neque enim in me quicquam boni invenio. Quod si in me aliquid boni invenirem, non tam anxie te desiderarem. Verè, Domine Jesu, laboro & oneratus sum. Neque cuiquam sanctorum tuorum, vel etiam peccatorum pœnitentium, me conferre possem, nisi fortè latroni in cruce. Misereri mei, Domine, qui miseratus es latronis in cruce. Perditè vixi, in peccatis vixi, sed piè mori, sed in justitia mori desidero. Pietas autem & justitia procul à corde meo, ideoque ad tuam pietatem & justitiam confugio. Subveniat mihi Domine Jesu, anima tua, quam posuisti in *αἷματι* pro multis. Subveniat mihi sanctissimum tuum corpus flagellis, sputis, colaphis, & spinis pro me afflictum, & crucis patibulo affixum. Subveniat mihi, ô Jesu, sacrosanctus tuus sanguis è patientis & morientis latere effusus, qui ab omnibus peccatis nos emundat. Subveniat mihi sanctissima tua divinitas, quæ humanam naturam in passione sustinuit; qua requiescente, neque se exerente peractum est adorandum redemptionis meæ mysterium, & quæ sanctæ tuæ passioni infinitum robur ac pondus addidit, ita ut Deus suo sanguine me miserum sibi acquisiverit. Subveniant mihi tua vulnera, in quibus omnis mea medicina.

Subveniat



Subveniat sanctissima tua passio subveniat  
tuum meritum, ultimū meum refugium &  
adversus peccata remediū. Quod enim pas-  
sus es, hoc mihi passus es. Quod igitur mere-  
ris, itidem mihi & indignitati meæ promere-  
ris. Commendat igitur charitatē suam Deus  
in nobis: & testimonio omnium hominum,  
imò Angelorum, intellectum exuperante, eam  
probat, quod Christus pro nobis mortuus,  
cum adhuc essemus peccatores & inimici  
Dei. Quis non admiretur? Quis non ob-  
stupefcat? A nemine rogatus, imò ab ho-  
minibus odio habitus, pro peccatoribus &  
hostibus suis misericordissimus Dei Filius  
deprecatur, neque solū deprecatur, sed etiā  
divinæ justitiæ satisfactionem præstat,  
nativitate pauperrima, vita sanctissima, pas-  
sione acerbissima, morte crudelissima. O  
Domine Jesu, qui pro me deprecatus, passus  
atque mortuus, antequam meritum & passi-  
onem tuam desiderarem, aut precibus ad  
λύτρον persolvendam te sollicitarem, quo-  
modo me projicere à facie tua poteris? Quo-  
modo fructum sanctissimæ tuæ passionis de-  
negabis, postquam ex profundis jam ad te  
clamo, & fructum meriti tui lachrymis at-  
que gemitibus exposco? Inimicus eram per  
naturam: quando pro me mortuus es, fa-  
ctus sum amicus, frater & filius per gratiam.  
Exaudivisti inimicum nondum te depre-  
cantem;

cantem; quomodo despicias amicum tuum  
 cum lachrymis & precibus ad te acceden-  
 tem? Venientem ad te non ejicies foras, quia  
 sermo tuus veritas est. Locutus es nobis in  
 spiritu & veritate, & verba vitæ æternæ à te  
 accepimus. Atende atq; erige te, anima mea;  
 antea eramus peccatores per naturā, jam ve-  
 rò justī per gratiā; antea eramus inimici, jam  
 verē amici atque propinqui; antea subsid-  
 ium nostrum in morte Christi, jam verò in  
 ipsius etiam vita; antea eramus mortui in  
 peccatis nostris; jam verò vivificati in Chri-  
 sto. O nimiam Dei charitatem, quā dile-  
 xit nos! O abundantes divitias divinæ gra-  
 tiæ, quā nos confidere fecit in cœlestibus!  
 O viscera misericordiæ Dei nostri, in qui-  
 bus nos visitavit Oriens ex alto! Quod si  
 Christi mors justitiam & vitam nobis attu-  
 lit, quid ipsius vita poterit? Si Salvator preti-  
 um Patri persolvit moriens; quid faciet vi-  
 vus, & pro nobis intercedens: Vivit enim  
 & habitat in corde nostro Christus, modò  
 vivat atq; vigeat in eo sanctissimi ipsius me-  
 riti recordatio. Trahe me Domine Jesu,  
 ut possideam in rei veritate, quod hîc expe-  
 cto in spei firmitate. Sit tecum quæso mi-  
 nister tuus, & videat claritatem, quam dedit  
 tibi Pater; inhabitet mansionem, quam parā-  
 sti illic in domo patris tui. Beati qui habitant  
 in domo tua Domine; laudabunt te in sæcu-  
 lum sæculi.

## MEDITATIO XII.

De natura ac proprietatibus veræ fidei.

*Viva est & victrix ; si modo  
vera fides.*

**O** Dilecta anima , fidei virtutem considera , & Deo fidei datori unico gratias age. Fides unica Salvatori nostro vicissim nos inserit , ut veluti palmites ex vite succum , ita nos ex ipso vitam , justitiam , & salutem hauriamus. Excidit Adamus gratiâ Dei , & imaginem divinam amisit suâ incredulitate , sed vicissim in gratiam recipimur , & imago Dei in nobis reformari incipit fide. Per fidem Christus , noster efficitur , & in nobis habitat ; ubi autem Christus , ibi gratia Dei ; ubi gratia Dei , ibi hæreditas vitæ æternæ. Fide Abel majorē hostiam obtulit Deo , quàm Cain ; ita spirituales hostias offerimus Deo per fidem : fructum scilicet labiorum nostrorum. Fide Henoch translatus est ; ita fides ex consortio humano in societatem cœlestem nos transfert , etiam nūm in hac vita. Jam enim Christus in nobis habitat , jam in nobis est vita æterna , sed abscondita. Fide Noah arcam apparavit : Ita fide ingredimur Ecclesiam , in qua animæ servantur , reliquis omnibus in vasto mundi pelago pereuntibus. Fide Abraham

ham terram idololatricam relinquebat : Ita fide eximus ex mundo , parentes, fratres, & cognatos relinquentes, & Christi vocantis verbo adhærentes. Fide peregrinatus est, & expectavit terram promissam: Ita & nos fide expectamus cœlestem Hierosolymam, quam Deus in cœlis præparavit : advensumus & peregrini in hoc mundo, ad cœlestem patriam fide aspirantes. Fide concepit Sara in Senectute filium Isaac : Ita & nos spiritualiter emortui accipimus virtutem Christum spiritualiter concipiendi. Ut enim Christus in sanctis Mariæ Virginis visceribus semel conceptus : ita quotidie in fidei anima , quæ se puram conservat à mundanis congressibus , spiritualiter nascitur. Fide obtulit Abraham Isaac, ita & nos propriam voluntatem dilectum animæ filium, fide spiritualiter mactamus & sacrificamus : Qui enim Christum sequi desiderat, semetipsum abnegare debet ; id est ; propriæ voluntati, proprio honori, proprio amoris renunciare. Fide Isaac benedicit Jacob : ita fide participes reddimur omnium divinarum benedictionum: Nam in semine Abrahamæ, id est, in Christo, omnes gentes benedicuntur. Fide prophetavit Joseph de exitu Israëlitarum ex Ægypto, & de ossibus suis mandavit : ita fide expectamus ex hac spirituali Ægypto, scilicet mundo, exitum, &

& beatam corporis resurrectionem. Fide Moses per tres menses servatus est : ita nos à Satanæ tyrannide fides abscondit ; donec tandem in regale Dei palatium adducamur , & in reges spirituales adoptemur . Fide Moses elegit calamitatum populi sui particeps esse potiùs quàm in Ægypti gloria vivere : Ita fides excitat in nobis contemptum gloriæ , honoris , divitiarum & voluptatum hujus seculi , & desiderium cœlestis regni. Fide eligimus potiùs ignominiam Christi , quàm thesauros hujus seculi. Fide reliquit Moyses Ægyptum , nec metuebat Regis iram. Sic fides nos animat & confirmat , ne nimis Tyrannorum hujus mundi terreamur , sed forti & constanti animo Deo vocanti obediamus. Fide celebravit Israël Pascha ; ita & nos Pascha celebramus fide ; Pascha nostrum immolatus est Christus , cujus caro verè est cibus , & cujus sanguis verè est potus. Fide Israelitæ transierunt per mare rubrum ; ita fide pertransimus mare hujus seculi. Fide considerunt muri Hierichuntis : Ita fide destruimus omnes munitiones Satanæ. Fide Rahab servata est : Ita in illa universali mundi panoletria fide servabimur ab interitu. Fide Patres devicerunt regna , leonum ora obturarunt , ignis vim extinxerunt : Ita & nos fide regum Satanæ destruimus , infernalis leonis insidias

insidias & furorem evadimus , & ab ignis  
infernalis ardore liberamur. Fides autem  
non est nuda opinio & professio , sed viva  
& efficax Christi in Evangelio propositi ap-  
prehensio, est plenissima de gratia Dei per-  
suasio , fiducialis cordis nostri quies, & pax  
in Christi merito recumbens. Nascitur hæc  
fides ex verbi divini semine. Nam fides  
& Spiritus unum sunt. Verbum autem Spi-  
ritus sancti vehiculum : Fructus sequitur  
naturam sui seminis ; fides divinus fructus  
est ; ergo & semen divinum adesse oportet,  
scilicet verbum. Sicut in creatione lux o-  
riebatur ex verbo Dei; nam dixit Deus, Et  
facta est lux; Ita lux fidei oritur ex luce ver-  
bi divini : In lumine tuo videbimus lumen,  
ait Psaltes. Cum fides nos Christo con-  
jungat , nos cum Christo uniat , ideo eti-  
am est in nobis mater omnium virtutum ;  
Ubi fides, ibi Christus; ubi Christus, ibi san-  
cta vita, scilicet vera humilitas , vera man-  
suetudo, vera dilectio : Christus & Spiritus  
Sanctus non divelluntur: Ubi Spiritus San-  
ctus , ibi vera sanctitas. Ergo ubi non est  
vita sancta, non est sanctificans Spiritus: ubi  
non est spiritus , ibi nec Christus: ubi non  
est Christus , ibi nec vera fides. Quicun-  
que palmes non haurit vitam & succum ex  
vite , non judicandus est cum vite conjun-  
ctus ; ita nondum per fidem Christo sumus  
conjuncti ,

conjuncti, nisi vitam & succum ex ipso trahamus. Fides est spiritualis lux; corda enim illuminantur fide: ergò spargit radios bonorum operum; ubi verò non sunt radii spiritualis Vitæ, ibi etiam nondum est vera lux fidei. Opera mala sunt opera tenebrarum; fides autem lux est: quæ verò societas luci cum tenebris? Opera mala sunt semen Satanae, fides est semen Christi: quæ verò societas Christo cum Satana? Fide purificantur corda: quomodo verò potest esse interna puritas cordis, ubi impura verba & impura opera exteriùs apparent? Fides est victoria nostra: quomodo ergo ibi potest esse vera fides, ubi caro vincit Spiritum, & captivum quasi ducit? Per fidem habemus Christum, & in Christo vitam æternam; sed nullus impœnitens & in peccatis perseverans, vitæ æternæ particeps: quomodo ergo Christi? quomodo fidei? Accende in nobis, O pie Christe, veræ fidei lucem, ut per fidem consequamur æternam salutem.

---

### MEDITATIO XIII.

De spirituale conjugio Christi & Animæ.

*Animarum sponsus Jesus.*

**D**E sponsabo te mihi in sempernum, dicie  
Christus ad fidelē animam: Christus nu-  
C ptis

priis in Cana Galilææ celebratis interesse voluit, ut ostenderet, quod ad nuptias spirituales in mundum venerit. Gaudens gaude in domino, & exulta fidelis anima in Deo tuo, qui induit te vestimentis salutis, & indumento justitiæ circumdat te, tanquam sponsam ornatum monilibus. Gaude propter sponsi honorem, gaude propter sponsi decorem, gaude propter sponsi amorem. Honor illius maximus: est enim verus Deus in sæcula benedictus: Quanta ergò dignitas hujus creaturæ, fidelis scilicet animæ, quod ipse Creator eam sibi vult desponsare? Decor ipsius maximus; est enim speciosus formâ præ filiis hominum; siquidem videbant gloriam ejus, gloriam quasi unigeniti à Patre; splendebat facies ejus sicut Sol, vestimenta erant sicut nix: diffusa etiam est gratia in labiis ejus, gloria & honore est coronatus: Quantæ ergo est misericordiæ, quod summa illa pulchritudo, animam peccatorum maculis deformatam in sponsam non dedignatur sibi eligere? Summa ex parte sponsi majestas; summa ex parte sponsi venustas, summa ex parte sponsæ deformitas: & tamen major adhuc amor sponsi erga sponsam, quàm sponsæ erga honoratissimum & pulcherrimum illum sponsum. Vide amorem immensum tui sponsi, ô fidelis anima: amor è coelo ad terram



ram eum traxit, ad columnam ligavit, cruci affixit, sepulchro clausit, ad inferos attraxit. Quis fecit hæc omnia, nisi amor erga sponsam? Sed cor nostrum saxo & plumbo gravius; quod, tanti amoris vinculum non trahit sursum in cœlum, ex quo prius traxit Deum ad homines. Nuda erat sponsa, nec poterat ad regale cœlestis regni palatium ita nuda introduci: Ipse induit eam vestimentis salutis & iustitiæ. Cum in sordida peccatorum tunica & turpissimo iniquitas panno involuta jaceret, dedit illi, ut cooperiret se byssino splendenti & candido: byssinum, justificationes sunt sanctorum; vestis illa est iustitia morte & passione ipsius sponsi parta. Laborabat Jacob quatuordecim annis, ut Rachelem obtineret sponsam; Christus per tri, into quatuor ferè annos Instituit famam, sitim, frigus, paupertatem ignominias, contumelias, vincula, flagella, fellis amaritudinem, mortem, crucem, ut fidelem animam sibi parare & acquirere posset sponsam. Descendebat Samson, & ex Philistæis exitio ad judicatis populis sibi sponsam quærebat, descendit Dei Filius, & sponsam sibi elegit ex damnis & æternæ morti addictis hominibus. Inimicum erat sponsæ genus cœlesti Patri, sed ipse illud per acerbissimam passionem Patri reconciliavit. Conculcata erat spon-

sa in sanguine suo, projecta super faciem terræ; sed ipse eam lavit baptismi aquâ, & lavacro mundavit sanctissimo; emundavit sponsæ sanguinem proprio suo sanguine; quia Filii Dei sanguis emundat ab omnibus peccatis; Sordida & deformis erat sponsa; sed ipse eum unxit oleo, misericordia scilicet & gratia. Non erat honorificè vestita sponsa; sed ipse dedit ei armillas & inaures, ornavit eam virtutibus & variis Spiritus S. muneribus. Pauperrima erat sponsa, & quod arrhæ loco daret, non habebat; ideò reliquit ei arrham Spiritus, & arrham carnis ab eadem accepit, & in cœlum adduxit. Famelica erat sponsa sed ipse simlam & mel & cœlum dedit ei ad comedendum, carne & sanguine proprio eam pascit ad vitam æternam. Immorigera est sponsa, & sæpè fidem conjugalem frangit, fornicatur cum mundo & Diabolo, sed ex immenso amore in gratiam vicissim eam recipit Sponsus, quoties in vera conversione ad eum revertitur. Agnosce, ô fidelis, anima, tot ac tanta infinita amoris indicia! Ama ô fidelis anima, amorem illius, qui ex amore tui descendit in uterum virginis! Tanto eum amare debemus plus nobis ipsis, quanto major ipse est, qui se pro nobis tradidit: Omnis vita nostra conformis reddatur, qui ex amore notum se nobis conformavit. Ingratissimus

mus meritò habetur , qui amantem se vicissim non amat : quantum ergò diligendus à nobis is, qui ex amore nostri suæ quasi majestatis oblitus. Felix anima, quæ spiritualis hujus conjugii vinculo Christo conjungitur, illa omnia Christi beneficia turò ac confidenter sibi applicat : quemadmodum aliàs in conjugio coruscat uxor radiis mariti. Particeps autem reddimur beati & spiritualis hujus conjugii sola fide , sicut scriptum est: Desponsabo te mihi in fide. Fides Christo tanquam spirituali viri nos palmites inserit, ut vitam & succum ex eo trahamus, & veluti, qui in conjugio vivunt, non amplius sunt duo, sed una caro : ita qui per fidem adhærent, fiunt unus Spiritus cum eo, quia per fidem Christus habitat in cordibus nostris, fides illa si vera est, per dilectionem efficax est. Quemadmodum in V. T. Sacerdotes ducere cogebantur virgines : ita cœlestis ille Sacerdos talem sibi virginem spiritualiter copulat, quæ à diaboli, mundi ac propriæ carnis complexibus sese integram ac immaculatum servat. Effice , ô Christe nos dignos , ut ad nuptias Agni aliquando introducamur : Amen.

## MEDITATIO XVI.

De mysteriis Incarnationis.

*Fulgent cunabula Christi.*

**A**Bducamus paulispèr animos nostros ab his temporalibus, & mysteria nativitatìs Dominicæ contemplemur. Filius Dei ad nos de cœlo descendit, ut adoptionem filiorum consequamur: Deus homo fit, ut homo divinæ gratiæ & naturæ particeps fiat. Circà mundi vesperam nasci Christus voluit, ut significaret, incarnationis beneficia non præsentem hanc, sed æternam vitam attingere. Tempore Augusti pacifici nasci voluit, qui humanum genus cum Deo pacificavit. Tempore servitutis Israëlitiæ nasci voluit, qui est verus liberator & vindex populi sui. Sub imperio alieni Domini nasci voluit, utpote cujus regnum non erat de hoc mundo. Nascitur de virgine, ut significet, se non concepì aut nasci, nisi in cordibus eorum, qui spirituales Virgines sunt, hoc est, quorum mentes nec mundo, nec diabolo, sed Deo in uno spiritu adhærent. Nascitur purus & sanctus, ut impuram & contaminatam nativitatem nostram sanctificet. Nascitur à Virgine viro desponsata, in matrimonii divinitus instituti

stituti honorem. Nascitur in noctis tenebris, qui erat vera lux mundi, tenebras illuminans. Reponitur in præsepe, qui est verum animæ nostræ pabulum. Nascitur inter bovem & asinum, ut homines, qui jumentis per peccatum assimilati erant, ad pristinam dignitatem reducat. Nascitur in Bethlehem, id est domo panis, qui uberissimum divinorum beneficiorum secum afferebat pabulū. Primogenitus est & unigenitus matris suæ in terris, qui secundum divinam naturam est primogenitus & unigenitus Patris in cœlis. Nascitur pauper & inops, ut cœlestes divitias nobis compareret. Nascitur in vili pecorum stabulo, ut ad cœlestis aulæ nos deducat palatia. E cœlis beneficii mittitur nuncius, quia nemo in terris illius magnitudinem intelligebat. Cœlestium munerum merito etiam cœlestis nuncius est. Gaudent Angelorum exercitus, qui nos, quod incarnationem Filii Dei, beatitudinis suæ possunt habere socios. Pastoribus tantum miraculum prius nunciatur, quia verus animarum Pastor venerat perditas ovum in viam redukturus. Contemptis & ignobilibus tanti gaudii materia nunciatur, quia nemo ejus particeps fieri potest qui non in oculis suis sibi displicet. Vigilantibus juxta gregem hæc nativitas nunciatur, quia non illi, qui in peccatis ster-

tunt , sed quorum cor ad Deum vigilat ,  
muneris participes fiunt . Jubilat cœlestis  
militiæ Chorus, qui ob primi parentis culpā  
miserè erat contristatus. Claritas Domini &  
Regis illius apparet in cœlis , cujus vilita-  
tem homines despiciebant in terris . Ti-  
morem dimittere jubet Angelus , quia na-  
tus erat is , qui omnis timoris causas è me-  
dio erat sublaturus. Gaudium è cœlo nun-  
ciatur , quia natus erat omnis gaudii Au-  
thor & Dator. Gaudium præcipitur, quia  
inimicitia inter Deum & homines, omnis  
tristitiæ causa erat remota . Gloria in ex-  
celsis Deo redditur , quam primus parens  
illicita mandati transgressione rapere volue-  
rat. Vera pax hâc nativitate parta est, quia  
antèa homines erant Deo inimici, antèa ad-  
versa ipsis erat propria conscientia , antèa  
semetipsis dissidebant invicem . Vera pax  
terris est reddita, quia superatus is , qui nos  
captivos detinebat . Adeamus & nos cum  
pastoribus Christi præsepe , hoc est , Ec-  
clesiam, & in fasciis , id est , Scripturis Sa-  
cris , involutum inveniemus hunc infan-  
tulum . Conservemus & nos cum Maria ,  
sancta Domini matre , tanti mysteria ver-  
ba , & quotidiana memoria jugitèr ea re-  
colamus. Subsequamur voce nostrii præci-  
nentes Angelos, & meritis pro tanto bene-  
ficio agamus gratias . Jubilemus & læte-  
mur

mur cum toto cœlesti exercitu. Si enim Angeli tantopere gaudent nostri causa, quantò magis nobis gaudendum erit, quibus natus & datus hic infans? Si voces & jubila tollebant Israelitæ, cum arca fœderis ad illos adduceretur, quæ figura & umbra fuit Incarnationis Dominicæ; quantò magis nobis lætandum, ad quos ipse Dominus in assumpta carne nostra descendit? Si Abraham gavisus est, cum diem Domini videret, & in specie ad tempus assumpta Dominus ipsi appareret, quid nobis faciendum erit, cum jam naturam nostram perpetuò & indissolubili fœdere sibi junxerit? Miremur hîc immensam Dei bonitatem, qui cum ad ipsum nos ascendere non poteramus, ipse ad nos descendere voluit. Miremur immensam Dei potentiam, qui ex duobus, divina scilicet & humana natura, facere potuit unum conjunctissimum, ut jam unus idemque sit Deus & homo. Miremur immensam Dei sapientiam, qui de nostri redemptione modum invenire potuit, cum nec Angeli nec homines modum viderent. Infinitum bonum offensum erat, infinita requirebatur satisfactio: Homo Deum offenderat, ab homine requirebatur satisfactio: Sed ab homine nec infinita præstari poterat satisfactio, nec justitiæ divinæ satisfieri poterat sine infinito pretio,

tio. Factus igitur Deus homo, ut & qui peccaverat, satisfaceret, & qui infinitus erat, infinitum pretium persolveret. Miremur hoc stupendum justitiæ & misericordiæ divinæ temperamentum, quod nulla creatura antequam Deus manifestaret, invenire poterat, nec postquam manifestatum est, plenè percipere potest. Miremur hæc, non curiosius rimemur: introspicere cupiamus, etsi totum non capiamus: fateamur potius nostram ignorantiam, quam Dei negare velimus potentiam.

## MEDITATIO XV.

De salutari fructu Incarnationis.

*Sit grata redemptio Christi.*

**A**Nnuncio vobis gaudium magnum, dicit in Nativitate Salvatoris nostri Angelus. Verè magnum id est, & majus quam humana capit intelligentia. Maximum erat malum, quod sub ira Dei, sub potestate diaboli, sub æterna damnatione captivi tenebamur: majus adhuc erat malum, quod maxima illa mala, vel ignorarent, vel negligerent homines: Jàm verò magnum nobis nunciatur gaudium, quia venerat in mundum



dum, qui nos ab omnibus illis malis liberat. Venit Medicus ad ægrotos, redemptor ad captivos, ad errantes via, ad mortuos vita, ad damnatos salus: Sicut Moses missus à Domino ad populum Israëliticum è servitute Ægyptica liberandum: Ita Christus à Patre missus ad totum genus humanum redimendum à captivitate diabolica. Sicut columba siccatis post diluvium terris olivæ ramusculum ad arcam Noë ferebat: Ita Christus in mundum venit, ad prædicandam pacem, & generis humani cum Deo reconciliationem. Meritò ergò lætamur, & de misericordia Dei magna concipimus. Qui nos adhuc inimicos existentes adeo dilexit, ut naturam nostram in arctissimum divinitatis complexum assumere non fuerit dedignatus, quid per carnis participationem sibi conjunctis denegabit? Quis unquam carnem suam odio habuit? quomodo ergò summa illa & infinita misericordia nos suæ naturæ jam participes factos à se repellere poterit? Quis magnitudinem hujus mysterii cogitatione, nedum verbis assequi potest? summa ibi sublimitas & summa vilitas, summa ibi potentia & summa infirmitas, summa ibi majestas & summa fragilitas. Quid Deo sublimius & homine vilius? Quid Deo potentius & homine infirmius? Quid Deo gloriosius & fragilius

gilius homine? Sed summa illa potentia invenit modum, quo hæc jungerentur, cum summa illa justitia talis conjunctionis necessitatem requiretur. Quis magnitudinem etiam hujus mysterii percipere potest? *Æquivalens & infinitum pretium requirebatur pro offensa hominis, quia ab infinito bono scilicet Deo, homo se averterat: sed quid infinito Deo æquivalens esse poterat? Ipsa igitur infinita justitia quasi de seipsa sumit sibi æquivalens pretium, ac in carne patitur Deus Creator, ne creaturæ caro in æternum patiatur. Læsum erat infinitum bonum, non poterat intercedere nisi infinitæ potestatis Mediator: quid autem præter Deum infinitum? Ipse igitur Deus sibi reconciliavit mundum, ipse Deus fit Mediator; Ipse Deus suo sanguine humanum genus redemit. Quis magnitudinem hujus mysterii percipere potest? Offensus erat sumus Creator, nec de placatione & reconciliatione creatura erat sollicita: idē qui offensus erat creaturæ, carne assumpta fit reconciliator. Deseruerat homo Deum, atque ad inimicum Dei diabolum se converterat; sed idem qui desertus erat, desertorem suum sollicitus inquit, & ad se benignissimè iterum invitat. Recesserat homo ab infinito illo bono, & prolapsus erat in infinitū malum; sed idem illud bonū infinitum*  
dato

dato infinito redemptionis pretio , ab infinito illo malo creaturam liberat . Annon hæc infinita misericordia , omnem hominis finitum intellectum & cogitationem excedens ? Gloriosior est effecta natura nostra per Christum , quàm per Adami peccatum dedecorata fuerat : Plus in Christo recepimus , quàm in Adamo amisimus . Abundaverat peccatum , sed superabundavit divina gratia . Perdidimus in Adamo innocentiam ; in Christo recepimus plenam justitiam . Mirentur alii divinam potentiam ; magis adhuc miranda est divina beneficentia : Quamvis in Deo æqualis sit potentia & misericordia , utraque scilicet infinita . Mirentur alii creationem ; mihi magis libet mirari redemptionem : quamvis & creatio & redemptio sint infinitæ virtutis actiones . Magnum est , hominē nihil quicquam meritum , quippe nondum existentem , creare ; majus adhuc esse videtur , hominem malè meritum redimere , & debiti satisfactionē in se recipere . Mirabile est , quod caro nostra & ossa nostra à Deo nobis sint formata ; mirabilius adhuc est , quod ipse Deus caro de carne nostra , & os de ossibus nostris fieri voluit : O anima me , esto grata Deo tuo ; qui te creavit , cum nondum esses ; qui te redemit , cum per peccatum damnata esses ; qui tibi per fidem Christo

sto adhærenti cœlestia præparavit gaudia.

---

## MEDITATIO XVI.

De spirituali piorum refectione.

*Quid Deus est animæ? lux,  
medicina, cibus.*

**M**AGnum benignissimus Deus paravit convivium, sed famelica corda ad illud afferenda sunt. Non percipit cœlestis convivii suavitatem, qui non gustat: non gustat, qui non esurit. In Christum credere, est ad convivium cœleste accedere. Nemo autem potest credere, nisi qui peccatis suis agnitis verè convertitur atque pœnitet. Contritio est animæ spiritualis esuritio: Fides est spiritualis pastio. Israëlitis Deus in deserto dabat Manna, Angelorum panem; in hoc convivio Novi Testamenti dat Deus cœleste Manna, scilicet gratiam suam, peccatorum condonationem, imò Filium suum Angelorum Dominum. Christus est verus ille cœlestis panis, qui de cœlo descendit, ut daret vitam mundo. Plenus porcorum siliquis, hoc est, hujus mundi delitiis, non desiderat illam suavitatem. Exterior homo non percipit, quid interiori dulce sit.

In

In deserto dat Deus suum Manna, id est, ubi omnis terrenus cibus, omnis terrena consolatio, animæ subtrahitur. Qui uxores habent, venire detractabant: Castæ virgines, id est, animæ nec diabolo per peccata, nec mundo per delicias adhærentes, accedunt ad hoc convivium. Despondi vos castam virginem uni viro, inquit Apostolus: Anima nostra non debet adulterio spirituali indulgere: ut Deus cum ipsa spirituale conjugium possit contrahere. Qui agri visendi delectatione tenebantur, venire recusabant: qui hujus mundi voluptates amant, ad cœlestem suavitatem non aspirant. Desiderium est pes animæ: non accedit anima nostra ad convivium hoc mysticum, si non desiderat: non potest anima hujus mundi consolatione repleta cœlestem suavitatem desiderare. Cum dives juvenis audiret, propter Christum divitias, quibus anima ejus adhærebat, esse deserendas, discedebat tristis. Cœlestis Elisæus, Christus, non infundit oleum cœlestis suavitatis nisi omnia vasa prius vacua: Non ingreditur in animam amor Dei, nisi prius discedat amor proprius, & amor mundi. Ubi thesaurus noster, ibi cor nostrum. Si pro thesauro habes mundum, cor tuum est in mundo. Amoris vis est unitiva: si terram amas, terræ unitus es. Amoris vis im-

mutativa

mutativa, si mundum amas, mundum efficieris: si cœlum amas, cœlestis eris. Qui boves emunt & negotiantur, non veniunt ad Christum. Qui corde tuo divitiis adhærent, cœlestes divitias non requirunt: Divitiæ terrenæ falsa quadam sufficientiæ specie animæ desiderium explent, ne veram suam sufficientiam, quæ plenè satiat appetitum, in Deo requirat: Omnes divitiæ terrenæ consistunt in creaturis, in argento, auro, ædificiis, fundis, pecoribus: Nulla autem creatura verè satiat animam nostram, quia illa est omnibus creaturis præstantior; omnes enim in ipsius usum conditæ: Quam infirmæ sint creaturæ ad nostra desideria implenda & satianda, patet in morte, in qua ab omnibus deserimur creaturis. Mirum est, nos tam firmitèr creaturis adhærere, cum tam infirmitèr & instabiliter illæ adhæreant nobis. Adamus cum à Dei consolatione se averteret, & in arbore scientiæ boni & mali delectationem quæreret, paradiso expellebatur: Anima nostra, si à Deo ad creaturas se avertit, cœlesti consolatione & privatur & ab arbore vitæ penitus arcetur. Quid verò restat illis, qui hoc convivium negligunt? Transit mundus, & omnes qui adhærent ipsi: transeunt creaturæ, & omnes, qui spem posuerunt in eis. Jurat cœlestis Pater, non gustaturos illos cœnam, nam,

nam, qui boves, agros, uxores, hoc est, quæcunque terrena, cœlestis convivii suavitati præferunt: post cœnam non ulterius cibus apparatur: neglecto Christo nullum amplius restat remedium: contemptores illi æterna fama punientur, & in æternis vivent tenebris. Qui noluerunt audire Christum vocantem; Venite ad me, qui laboratis & onerati estis: audient aliquando ipsum præcipientem: Ite, maledicti, in ignem æternum. Sodomitæ igne absumebantur, cum per Lothi concionem ad hoc convivium vocati venire recusabant: ignis divini furoris in æternum durans absumet illos, qui per Evangelium vocati convivium hoc spreverunt. Sponso veniente virgines, quarum lampades oleo destituebantur, moras nectunt; interim janua clauditur: quorum corda, Spiritus sancti oleo non repleta in hoc mundo, non intromittet illos Christus ad suum gaudium, sed claudetur illis janua indulgentiæ, janua misericordiæ, janua consolationis, janua spei, janua gratiæ, janua bonorum operum. Est adhuc interna quædam Christi vocatio; felix qui audit eam! Pulsat sæpius januam cordis nostri Christus sanctis desideriis, deveris gemitibus, piis cogitationibus; felix qui pulsanti aperit. Quàm primum sanctum aliquod cœlestis gratiæ desiderium in corde sentis, certo

certò statue, Christum cor tuum pulsare: intramitte eum, ne transeat, ne tibi misericordiae suae januam ipse postea occludat. Quàm primùm flammulam aliquam piarum meditationum in corde sentis, judica, favore divini amoris, sancti scilicet spiritus, eam accensam; fove & alce flammam illam, ut in ignem amoris excreseat; cave, ne Spiritum exstinguas, & opus domini impedas. Qui destruit Templum Domini, severum ejus judicium sentiet. Templum Domini est cor nostrum, Illud destruit, qui spiritui sancto interiùs per verbum vocanti locum dare renuit. In V. T. Prophetæ interiùs loquentem audire poterant Dominum; in N. T. omnes verè pii internos illos Spiritus sancti motus atque tractus sentiunt: Beati omnes, qui audi ut & sequuntur.

---

## MEDITATIO XVII.

De Baptismi fructibus.

*Sacrum Baptisma lavacrum est.*

**R**ecordare, fidelis anima, magnæ Dei gratiæ in salutari Baptismi lavacro tibi præstitæ. Baptismus est lavacrum regenerationis, ergò Baptismi lavacro tinctus non amplius



amplius totus est vetustate carnalis nati-  
vitatís ; sed quia ex Deo natus , per aquam  
scilicet & spiritum , ideò etiam Dei Filius,  
& quia filius , ideò etiam æternæ felicitatis  
hæres. Ut Pater æternus in Baptismo Chri-  
sti edidit hanc vocem ; Hic est Filius meus  
dilectus. Ita omnes, qui credunt & bapti-  
zantur , in filios adoptat. Sicut in Baptis-  
mo Christi , Spiritus Sanctus apparuit in  
specie columbæ , ita quoque in nostro Bap-  
tismo adest , eique vim tribuit , imò etiam  
per Baptismum confertur credentibus, atque  
in eis novos motus efficit, ut sint prudentes  
sicut serpentes , & simplices sicut columbæ.  
Sicut erat in creatione , ita quoque res se ha-  
bet in nostra regeneratione. In prima re-  
rum creatione Spiritus Domini incubabat  
aquis , & vitalem vim eis conferebat : ita  
quoque in aqua Baptismatis adest S. Spiri-  
tus , eamque salutare nostræ regenerationis  
medium efficit. Ipse Salvator noster Chri-  
stus baptizari voluit, ut testatur faceret nos  
per Baptismum ejus membri effici ; sæpius  
medicina capiti adhibetur , ut alia corporis  
membra sanentur ; caput nostrum spiritu-  
ale Christus est ; Baptismi medicinam pro  
salute mystici corporis assumpsit . In cir-  
cumcisione Deus fœdus inibat cum populo  
suo in V. T. ita per Baptismum re-  
cipimur in fœdus Dei Novo Testa-  
mento

mento, quia in locum Circumcisionis Baptismus successit: Qui ergo est in Dei fœdere, non timeat à Diaboli accusatione. In Baptismo Christus induitur: hinc sancti dicuntur dealbasse stolas suas in sanguine Agni: Perfecta Christi justitia est vestis illa pulcherrima: qui ergo hac indutus est veste, non timeat à peccatorum labe. Erat Hierosolymis piscina circa Probaticam, in eam certo tempore descendebat Angelus, eamque turbabat; qui primus post turbationem in eam descendebat, sanabatur, à quocunque detineretur morbo; aqua in piscina ista ab omni peccatorum morbo nos sanat, quando Spiritus Sanctus in eam descendit, eamque sanguine Christi, qui pro nobis víctima factus, turbat, sicut & olim in Hierosolymitana ista piscina victimæ abluebantur. Circa Baptismum Christi aperiiebantur cœli, Ita quoque in nostro Baptismo cœlestis aperitur janua. In Christi Baptismo aderat tota S. S. Trinitas: Ita quoque in nostro Baptismo adest: Et sic in verbo illo promissionis, quod annexum est elemento aquæ, fides accipit gratiam Patris adoptantis, meritum Filii mundantis, & efficaciam Spiritus Sancti regenerantis. Pharaoh & omnis exercitus submergebatur in mari rubro; Israëlitaæ salvi & incolumes pertransibant Sic in Baptismo

mo submergitur omnis exercitus vitiorum ,  
& fideles salvi ad promissam cœlestis regni  
hæreditatem perveniunt. Ideò quoque Ba-  
ptismus est mare illud vitreum, quod vide-  
bat Johannes ; per eum , velut per vitrum  
quoddam, Splendor Solis justitiæ mentes  
nostras intrat : Erat autem illud mare antè  
thronum Agni : Thronus Agni est Eccle-  
sia , in qua sola habetur sancti Baptismatis  
gratia. Videbat Propheta Ezechiel agre-  
dientes ex templo, quæ vivificabant & sana-  
bant omnia: In Templo Dei spirituali, hoc  
est, Ecclesia, scaturiunt adhuc salutares Ba-  
ptismi aquæ ; in quarum profundum projici-  
untur peccata nostra ; sanabuntur & vivent  
omnia ad quæ venerit torrens iste . Ba-  
ptismus est spirituale diluvium , quo om-  
nis caro peccati mergitur : corvus immun-  
dus seu Diabolus exit ; columba verò seu  
Spiritus Sanctus devolat , & folium olivæ,  
id est, pacem ac tranquillitatem, mentibus in-  
spirat. Recordare ergò , fidelis anima, maxi-  
mæ istius gratiæ in Baptismo tibi præstitæ,  
& debitas Deo gratias age. Cæterum quò u-  
berior in nos collata est per Baptismum gra-  
tia, eò diligentior collatorum donorum esse  
debet custodia . Sepulti sumus cum Christo  
per Baptismum in mortem ; ideò, ut Chri-  
stus excitatus ex mortuis in gloriam Patris,  
ita ut nos in nova vita incedamus . Sani  
facti

facti sumus ; ergò non peccemus ampliùs ,  
ne quid deterius nobis contingat . In-  
duimus Christi justitiam vestem longe  
præciosissimam ; ergo peccatorum macu-  
lis eam non inquinemus . Vetus noster ho-  
mo crucifixus & mortuus est in Baptismo ;  
vivat ergò novus homo . Regenerati sumus ,  
& Spiritu mentis renovati in Baptismo ; er-  
gò caro non dominetur Spiritui . Vetera  
transierunt ; ecce nova facta sunt omnia : ve-  
rustas ergò carnis non prævaleat novitati  
Spiritus . Filii Dei facti sumus per spiritua-  
lem regenerationem , agamus ergò vitam ta-  
li Patre dignam . Templum sancti Spiritus  
facti sumus ; paremus ergò gratiam tanto ho-  
spiti sedem . In fœdus Dei recepti sumus ; ca-  
veamus ergo , ne diaboli stipendiis merea-  
mur , & sic fœderis gratia excidamus . Efficce  
in nobis hæc omnia , ô benedicta Trinitas ,  
unns Deus : Qui dedisti tantam in Baptis-  
mo gratiam , da etiam in tanta gratia perse-  
verentiam .

## MEDITATIO XVIII.

De salutari corporis & sanguinis Christi  
participatione.

*Vita fons est caro Christi.*

**Q**ui manducat carnem meum, vivet in æternum, dicit Christus. Magnum omnino Salvatoris nostri beneficium; quod non solum carnem nostram assumpsit, & in cœlestis gloriæ thronum evexit; sed etiam corpore & sanguine suo ad vitam æternam nosmet pascit. O salutare animæ delicias! O exoptatum convivium! O cœlestem & Angelicum cibum! Quamvis Angeli desiderent in magnum illud mysterium intropicere: non tamen Angelos, sed Abrahamæ semen assumpsit: Propinquior nobis Salvator noster, quam ipsis Angelis, quia dilectionem ipsius ex eo cognovimus, quod de Spiritu suo dedit nobis: neque solum de Spiritu, sed etiam de corpore & sanguine suo. Sic enim de pane & vino Eucharistico dicit Veritas: Hoc corpus meum, hic sanguis meus. Quomodo oblivisci eorum poterit Dominus, quos suo corpore & sanguine redemit, quos suo corpore & sanguine aluit! Qui manducat carnem & bibit sanguinem

nem Christi manet in Christo & Christus in ipso. Non igitur magnoperè admiror, quod capilli capitis nostri numerati, quod nomina nostra in cœlo scripta, quod in manibus Domini descripti sumus, & in sinu ejus ac matrice portemur; Quia Christi corpore & sanguine pascimur. Magna profecto dignitas animarum nostrarum, quæ pretioso redemptionis suæ λύτρωσιν pascuntur. Magna etiam dignitas corporum nostrorum, quæ animæ, Christi corpore redemptæ Christi corpore saturatæ, habitacula, Spiritus sancti Tēpla, totiúsque sacratissimæ Trinitatis domicilia: Fieri non potest, ut eadem in sepulchro maneant, cum nutrita sint corpore & sanguine Domini nostri. Hic ille cibus grandium: manducamus eum, nec tamen mutamus eum in corpus nostrum, sed mutamur in ipsum. Christi membra sumus, & ipsius Spiritu animamur, corpore & sanguine pascimur. Hic panis est, qui de cœlo descendit, & dat vitam mundo; de eo si quis comederit, non esurit in æternum. Panis hic gratiæ & misericordiæ; quem si quis comederit, gustat & videt, quàm suavis sit Dominus, & ex plenitudine ipsius accipit gratiam pro gratia. Panis hic vitæ est, non solum vivens, sed etiam vivificans: si quis ex hoc manducaverit, vivet in æternum. Panis hic de cœlo descendit, neque solum cœlestis

cœlestis est , sed etiam convivas cœlestes  
efficit: qui salutariter & in Spiritu illum  
comedunt , cœlestes erunt , quia non mo-  
rientur , sed in novissimo die resuscitabun-  
tur . Resuscitabuntur autem non ad judi-  
cium , quia qui manducat de hoc pane, non  
venit ad judicium : non ad damnationem ,  
quia nulla est condemnatio his , qui sunt in  
Christo Jesu : sed ad vitam, & salutem. Quæ  
enim manducat carnem Filii hominis, & bi-  
bit ejus sanguinem , vitam habet in sese, &  
propter Christum vivet . Caro illius verè  
est cibus , sanguis illius verè est potus ; Sa-  
turemur igitur non operum nostrorum , sed  
Domini cibo ; inebriemur ab ubertate, non  
domûs nostræ, sed Domini. Hic verus vi-  
tæ fons est; qui biberit illius aquam , fiet in  
eo fons aquæ salientis in vitam æternam .  
Omnes sitientes venite ad has aquas, & qui  
non habetis argentum, properate, emite, co-  
medite. Veniant sitientes, veni etiam, siti-  
ens anima mea , peccatorum æstu exagita-  
ta . Quod si argento meritum destitu-  
eris , eo magis propera : Meritis tuis de-  
stitutus ad Christi meritum ardentius pro-  
pera. Propera igitur , & eme absque argen-  
to. Cubiculum hic Christi & animæ , à  
quo non deterreant peccata , neque etiam  
intrent merita. Sed quæ esse possint nostra  
merita ? Appendunt argentum non in pani-

bus, & laborem non in saturitate, dicit Propheta : Labores nostri non exsaturant, neque meritorum argento divina emitur gratia. Audi igitur, anima mea, & comede bonum, & delectaberis in crassitudine. Verba isthæc Spiritus sunt, & vita, & verba vitæ æternæ : Calix benedictionis communicatio sanguinis Christi ; Panis quem frangimus, participatio corporis Domini. Adhæremus Domino ; igitur spiritus sumus unus cum ipso. Unimur ipsi non solum naturæ communionem, sed etiam corporis & sanguinis participatione. Non igitur dico cum Judæis ; Quomodo potest hic nobis carnem suam dare ad manducandum ? Sed potius exclamo : Quomodo carnem suam ad comedendum, & sanguinem suum ad bibendum distribuit nobis Dominus ? Non rimor potentiam, sed miror benevolentiam. Non scrutor majestatem, sed veneror bonitatem. Præsentiam credo, præsentiae modum ignoro : arctissimum & penitissimum eum esse certò scio. Membra iunus corporis ejus. Caro de carne, os de ossibus ipsius. Habitat ipse in nobis, & nos in eo. In hujus profundissimæ abyssi cogitatione submergi desiderat anima mea ; bonitatem illam quibus verbis proferat, aut declararet nondum invenit ; sed maximæ illius gratiæ in Domino, gloriæ in beatis, intuitu, penitus obstupescit.

M E DI-



## MEDITATIO XIX.

De Cœnæ Dominicæ mysterio.

*Mirari, non rimari, sapientia  
vera est.*

**I**N sacra Domini cœna tremendum & modis omnibus adorandum nobis proponitur mysterium. Est ibi divinæ gratiæ thesaurus & gazophylacium. Arborem vitæ plantatam à Deo novimus, cujus fructus in concreatæ immortalitatis felicitate primos nostros parentes, eorundemque posteros conservaret. Constituta etiam erat in Paradiso arbor scientiæ boni & mali; sed enim illud ipsum, quod à Deo in ipsorum salutem & vitam atq; ab obedientiæ exercitium datū, illud mortis & damnationis fuit occasio, dum miseri illi Satanæ illecebris suisque obsequuntur desideriis; hic parata vicissim vera arbor vitæ, dulce illud lignum, cujus folia sunt in medicinam, fructus in salutem; ejus dulcedo omnem malorum, ipsius etiam mortis amaritatem tollit. Israëlitis Manna dabatur, ut cœlesti nutrirentur cibo: hic est verum illud Manna, quod de cœlo descendit ut vitam daret mundo, hic est panis cœlestis & Angelicus cibus, de quo si quis comederit,

non esuriet unquā. Israelitæ habebant arcam  
fœderis & propitiatorium, ubi Dominum ab  
ore ad os loquentem audire poterant: hic ve-  
ra fœderis arca, sanctissimum Christi cor-  
pus, in quo omnes scientiæ, cognitionis &  
sapientiæ thesauri reconditi; hic verum est  
propitiatorium in Christi sanguine, qui effi-  
cit, ut dilecti simus in dilecto: neque solūm  
nobis loquitur per internam consolationem,  
sed in nobis habitat; non cibatur nos cœlesti  
Manna, sed seipso. Hic verè porta cœli & sca-  
la Angelorum. Num enim cœlū majus est,  
quā qui est in cœlo? Num cœlum Deo arcti-  
us unitū, quā caro & assumpta Natura hu-  
mana? Cœlū quidem sedes Dei, sed in Natu-  
ra assumpta Christi requiescit Spiritus sanctus,  
Deus est in cœlis, sed in Christo habitat  
Divinitatis plenitudo. Verè magnū est hoc  
& infallibile salutis nostræ pignus: Quod  
majus dare poterat, non habebat: quid  
enim ipso majus? Quid tam arctè ipsi u-  
nitum, quā natura ejus humana, quæ in  
consortium beatissimæ Trinitatis assumpta,  
& cœlestium bonorum thesauraria facta?  
Quid tam arctè ipsi conjunctum, quā  
caro & sanguis? His autem verè cœle-  
stibus alimentis nos miseros vermiculos re-  
ficit, & suæ Naturæ participes facit, que-  
modo non & gratiæ? Quis unquam car-  
nem suam odio habuit? Quomodo er-  
gò

gò nos despiciere poterit Dominus, quos  
sua carne suoque sanguine pascit? Quo-  
modo oblivisci eorum poterit, quibus arr-  
ham sui corporis dedit? Quomodo sub-  
vertere nos poterit Satan, cum cœlesti re-  
ficiamur cibo, ne deficiamus in prælio?  
Charos nos habet Christus, quia charè  
nos emit; charos nos habet, quia charis  
& pretiosis pascit; charos nos habet, quia  
ipsius caro & membra sumus. Hæc unica  
omnium morborum spirituales panacæa,  
hoc τὸ ἀθανάτου καὶ ζωοῦ. Quod e-  
nim peccatum tantum, quod sancta Dei  
caro non expiet? Quod peccatum tantum,  
quod vivifica Christi caro non sanat?  
Quæ tanta mors, quæ Filii Dei mor-  
te non tollatur? quæ tam mortifera  
diaboli tela, quæ in hoc divinæ græ-  
tiæ fonte non extinguantur? Quæ tar-  
ta conscientia labes, quam sanguis hic non  
emundat? Israelitis in nube & igni:  
derat Dominus hic verò non nubes, sed ipse  
Sol justitiæ, animarum nostrarum lux, præsens:  
hic non ignis divini furoris, sed fervor chari-  
tatis sentitur; neq; recedit à nobis, sed mansi-  
onem apud nos fecit. Primi parentes in Pa-  
radisum, hortum illum fragrantissimū & iua-  
vissi nū, æternæ beatitudinis typū, introdu-  
cebantur, ut divinæ benignitatis admoniti,  
debitū Creatori suo præstarent obsequium:

Ecce plus, quam Paradisus hoc loco ; Creatoris enim carne saturatur creatura ; Filii sanguine mundatur pœnitens conscientia ; Corpore Christi aluntur Christi capitis membra ; Divinis & cœlestibus epulis pascitur fidelis anima. Sancta Dei caro , quam adorant in unitate personæ Angeli, venerantur Archangeli, tremunt potestates, admirantur virtutes, illa sit spirituales nostra alimonia. Latentur cœli , & exultet terra, magis autem fidelis anima , cui tanta ac talia impenduntur munera.

## MEDITATIO XX.

De seria ante usum sacræ cœnæ præparatione.

*Christi sis providus hospes.*

**N**ON vulgares quædam epulæ , nec Regis quoddam convivium, sed sanctissimum corporis & sanguinis Christi mysterium nobis tractandum. Utique igitur digna requiritur præparatio, ne pro vita inveniamus mortem, pro misericordia accipiamus judicium. Quàm trepidat, quàm timet sanctissimus ille Patriarcha , fidei fortitudine insignis, cùm aliquando Dei Filius in hominis forma ipsi appareret, & Sodomam se avertere

re velle prænunciaret : hîc non aspiciendus proponitur Dei Agnus, sed gustandus & esitandus. Oîas cum inconsultiùs ad arcã fœderis accederet, lepra à Domino percussus est protinus: Quid igitur mirum, si iudicium sibi edit & bibit, qui indignè de hoc pane edit, & de hoc vino bibit? Hic enim vera novi fœderis arca per illam veterem præfigurata. Veram autem præparationem unico verbo docet Apostolus : Probet seipsum (inquit) homo, & sic edat de hoc pane. Ut autem omnis probatio divina ad divinæ scripturæ normam exigendo, pari ratione etiam hæc, quam requirit Paulus. Consideremus igitur primo loco nostram infirmitatem. Quid est homo? Pulvis & cinis: è terra nascimur, de terra vivimus, in terram revertimur. Quid est homo? Sperma fœtidum, fæcus stercoreum, & cibus vermium. Homo natus ad laborem, non ad honorem, homo natus de muliere, & ob hoc cum reatu, brevi vivit tempore, ideoquè cum metu, repletus multis miseriis, ideoquè cum fletu, & verè multis, quia corporis & animæ simul. Nescit homo ortum suum, nescit obitum: ut herba solstitialis paulisper sumus, ac brevis illa vita dolores & labores habet minimè breves. Consideremus secundo loco nostram indignitatem. Omnis quidem creatura, respectu Creatoris, umbra, somnium,

nihil. Utique etiam homo. Sed pluribus  
& gravioribus modis indignus est homo.  
Peccatis enim Creatorem suum offendit.  
Deus natura & essentia justus est. Natura  
igitur & essentia peccatis irascitur. Quid  
nos stipulæ ad ignem illum consumentem?  
Quomodo fœdissima nostra facta confi-  
scent? Quomodo iniquitates nostræ, quas  
ponis coram te, & errores nostri, quos  
collocas in lumine vultus tui? Infinitus  
Deus, & semper sui similis, infinitæ justi-  
tiæ & infinitæ iræ: Quod si in omnibus  
operibus, utique etiam in ira, in justitia  
& in vindicta, Deus magnus est & admira-  
bilis prorsus. Qui non pepercit Filio, nun-  
quid parceret figmēto? Qui non pepercit sancti-  
ssimo Filio, nunquid parceret servulo nequā?  
In tanto apud Deum odio peccatum est, ut  
puniat illud in dilectissimis, quod patet in  
Lucifero Angelorum primario. Probatio  
autem non solum nos respiciat, sed etiam be-  
nedictum hunc panem, qui est communio  
corporis Christi. Tum; verus gratiæ  
fons & inexhausta misericordiæ scaturigo  
apparebit, prorsus negligere nos non pe-  
zerit Dominus, quos suæ carnis participes  
facit: quis enim carnem suam unquam odio  
habuit? Hæ igitur sanctæ epulæ transfor-  
abunt animas nostras: Hæ divinissimæ  
epulæ divinos homines nos efficient: De-  
nec

nec tandem futuræ felicitatis consortes effici-  
 entur , *δεῦ ὁ λὰ καὶ μόνον χωρητικοί, καὶ ὁ λόγος*  
*θεοειδής* : Quod hic in fide & mysterio ,  
 illic in re & apertissimè habebimus . Ipsa  
 quoq ; corpora nostra hanc dignitatem con-  
 secuta , ut in illis Deum à facie ad faciem  
 videre possimus, quæ jam sunt Spiritus s. re-  
 cti templa, & Christi inhabitantis corpore &  
 sanguine sanctificantur , & vivificantur.  
 Hæc sanctissima medicina sanat omnia pec-  
 catorum vulnera : Hæc vivifica caro om-  
 ne mortale peccatum superat : Hoc sanctiss-  
 mum promissionum divinarum sigillum est,  
 quod coràm judicio divino ostendere po-  
 sumus . Hoc pignore nobis dato de vita  
 æternæ satis tutò gloriamur. Si Christi cor-  
 pus & sanguis nobis exhibentur , utique e-  
 tiam omnia beneficia, per sanctissimum illud  
 corpus & benedictum illum sanguinem pa-  
 rata. Quomodo , qui majora dedit , mi-  
 nora denegabit ? Qui Filium suum dedit  
 nobis , quomodo non omnia cum eo dabit ?  
 Exultet igitur sponsa , quia tempus propè  
 est, quando ad nuptias Agni vocabitur: in-  
 datur pretiosis , accipiat nuptialem vestem  
 ne inveniat nuda. Vestis illa, spōsi justitia,  
 quā in Baptismo induimus. Justitia nostra  
 tantum abest ut vestis nuptialis sit, ut etiā sic  
 pānus mulieris mēstruatæ. Timeamus igitur  
 ad solennitatē illā nuptialē turpissimas illas

& foetidissimas operum nostrorum vestes  
afferre. Induat nos Dominus, ne invenia-  
mur nudi!

---

## MEDITATIO XXI.

### De Christi ascensione.

*Cum Christo ascendere nostrum est.*

**C**Ogita fidelis anima, Ascensionem sponsi  
tui. Christus visibilem præsentiam fi-  
delibus suis subtraxit, ut fides haberet ex-  
ercitium: Beati namque, qui non vident,  
& credunt. Ubi est thesaurus noster, ibi  
sit etiam cor nostrum. Thesaurus noster  
Christus in cælo est: cœlestibus ergo ad-  
hæreat cor nostrum, & ea quæ sursum sunt,  
cogitet. Sponsa reditum sui sponsi arden-  
tissimis exoptat gemitibus: Ita fidelis ani-  
ma semper exoptet adventare diem illum, in  
quo ad nuptias Agni introducatur: confi-  
dat in arrha Sancti Spiritus, quam descen-  
dens reliquit ei Dominus; confidat in cor-  
pore & sanguine Domini, quæ in cœnæ my-  
sterio accipit; & credat, corpora nostra ci-  
bo hoc incorruptibili saturata aliquando re-  
suscitatum iri, quod jam credimus, tunc vi-  
debimus; & nostra spes, tunc erit res, sub spe-  
cie



cie aliena adest viatoribus nobis Dominus ; sed in cœlestis patriæ diversorio eum agnoscemus & intuebimur . Voluit autem Salvator noster à monte Oliveti ascendere ; Oliva pacis est & gaudii insigne ; meritò ergò ab Oliveti ascendit monte , qui territis & consternatis conscientiis tranquillitatem peperit sua passione ; meritò ab Oliveti ascendit monte , qui maxima cœlestis curiæ accipitur jubilatione . Montana illa nos ad cœlestia vocant ; sequamur sanctis desideriis, quia pedibus non possumus sequi corporeis. Moyses iidem in monte ascendit ad Dominum ; in monte sancti adorarunt Patriarchæ ; montana elegit Abraham , Loth verò planiciem ; relinquat fidelis anima mundi planiciem , & cœli montana sancta devotione contendat : ita dulcissima sentiet Dei interiùs loquentis alloquia , ita in oratione sua poterit adorare in Spiritu , ita conflagrationem æternam mundanæ planiciei pararam poterit cum Abrahamo effugere, Bethania villam humilitatis & afflictionis notat ; per quam ad regnum cœlorum nobis patet adi us, sicut & Christus ex villa afflictionis ad cœlestia penetravit gaudia : Hactenus cœlum clausum videbatur , & Paradisus superior per romphæam rutilantem custoditus ; nunc victor Christus cœlum aperuit , ut nobis in cœlestem patriam , unde excide-

ramus .

ramus, viam monstraret. Stabant Discipuli sublati oculis cœlum intuentes: ita veri Christi Discipuli cordis oculos ad cœlestia contemplanda attollant. O Domine Jesu, quam gloriosa passionem tuam consecuta est clausula! Quam felix hæc & quam subita mutatio! Qualem te vidi patientem in monte Calvarie & qualem te nunc conspicio in monte Oliveti: Ibi eras solus; hic multis Angelorum millibus commixtus: Ibi ascendeabas in crucem, hic in nube ascendis ad cœlum: Ibi crucifigebaris inter latrones, hic exultas inter Angelorum choros: Ibi clavis cruci affixus & damnatus, hic liber & damnatorum liberator: Ibi moriens & patiens, hic gaudens & triumphans. Christus est caput nostrum, nos ipsius membra: Gaude igitur & exulta in ascensione capitis tui, fidelis anima! Gloria capitis, membrorum etiam gloria est, Ubi caro nostra, ibi regnare credamus: ubi sanguis noster dominatur, ibi nos gloriosos futuros speremus: etsi peccata nostra nos prohibeant, naturæ tamen communio non repellit. Ubi caput est, ibi etiam reliqua membra erunt. Caput nostrum cœlum ingressum est, habent ergo æquissimam rationem de cœlo sperandi reliqua membra: non solum autem hic, sed & in cœlo jam possessionem accipere. Descendit Christus de cœlos nos redempturus,

rus, ascendit vicissim ad cælum nos glorificaturus. Nobis natus est, nobis passus est, igitur & nobis ascendit. Christi passione nostra charitas, Christi resurrectione fides nostra, Christi ascensione spes nostra solidatur. Sequi autem debemus sponsum nostrum, non solum ardentibus desideriis: sed etiam operibus bonis. In supernam illam civitatem non intrabit aliquid coinquinatum, in hujus rei signum Angeli ex cœlesti Hierolyma venientes apparuerunt amici vestibus albis, quibus puritas & innocentia denotatur. Cum humilitatis magistro non ascendit superbia, nec cum pacis amico discordia, nec cum Filio virginis libido & luxuria. Non ascendunt vitia post virtutum parentem, nec peccata post iustum, nec infirmitates ire possunt post Medicum. Qui Deum coram aliquando intueri desiderat, is etiam dignus in ejus conspectu vivat: qui cœlestia sperat, terrena contemnat. Trahe corda nostra, bene Jesu.

## MEDITATIO XXII.

Homilia de Spiritu sancto.

*Electos Deus obsignat Spiramine sancto.*

**A**scendens Dominus noster in cœlos, & intrans in gloriam suam, misit Discipulis Spiritum sanctum in ipso Pentecostes die. Sicut in veteri Testamento Deus legem promulgans in monte Sinai ad ipsum Moysen descendebat: ita, cum Evangelium per Apostolos in orbem terrarum propagandum, ipse Spiritus ad Apostolos descendebat. Ibi tonitrua & fulgura & clangor buccinæ intentissimus, quia lex contrā inobedientiam nostram detonat, & nos iræ divinæ reos arguit: Hic vero sonitus leniter strepentis auræ, quia Evangelii concio consternatas mentes erigit. Ibi totius populi expavescentia atque terror, quia lex iram operatur: Hic verò tota multitudo confluit, & mirabilia Dei audit, quia per Evangelium nobis ad Deum patet aditus. Ibi Jehova descendit in igne, sed in igne iræ & furoris; ideò mons commovebatur & fumabat: Hic verò descendit Jehova Spiritus Sancti in igne, sed in igne amoris & dilectionis; unde non commovetur domus divina ira, sed potius

potius tota repletur Spiritus sancti gloria. Quid mirum, si Spiritus sanctus è cœlesti mittitur curia ad sanctificandum, cum Filius missus fuerit ad genus humanum liberandum? Non proderat Christi passio, nisi per Evangelium mundo fieret annuntiatio; quis enim usus thesauri absconditi? Ideò benignissimus Pater non solum magnum paravit beneficium per Filii passionem, sed etiam toti mundo illud offerri voluit per Spiritus sancti missionem. Fidelis mater tenello filio utraque præbet ubera; Fidelis Deus nobis miseris & Filium & Spiritum sanctum mittit. Venit autem Spiritus sanctus super Apostolos, cum perdurarent concorditer in oratione; precum enim Spiritus est, precibus impetratur, & ad preces impellit: quare? quia vinculum illud, quo corda nostra uniuntur cum Deo; sicut Filium unicum cum Patre, & Patrem cum Filio; est enim Patris & Filii mutuus substantialis amor. Hæc spiritualis nostri cum Deo conjunctio fit fide; fides autem, donum Spiritus; impetratur precibus, sed veræ preces fiunt in Spiritu. In templo Solomonis, cum Domino adoleretur incensum, gloria Domini templum replebatur: ita si precum odoramenta offers Deo, templum cordis tui Spiritus sancti replebit gloria. Miremur hic Dei misericordiam & gratiam. Pater

exauditionem precum promittit : Filius  
interdicit pro nobis: Spiritus sanctus orat  
in nobis : Angeli preces nostras ad Deum  
deferunt : Atque ita tota cœlestis curia no-  
stris precibus est aperta . Misericors Deus  
dat orationis affectum , quia donat nobis  
Spiritus gratiæ & precum; dat etiam orati-  
onis effectum , quia preces nostras semper  
exaudit , si non ad voluntatem nostram ,  
tamen ad utilitatem . Venit Spiritus san-  
ctus , cum omnes concorditer in eodem ver-  
santur loco : nimirum est Spiritus ch-  
ritatis & concordie ; conjungit nos Christo per  
fidem , conjungit nobis Deum per charita-  
tē, unit etiam nos cum proximo per dilec-  
tionem . Diabolus discordiæ & separationis  
autor, per peccata separat nos à Deo; per o-  
dia, contentiones, & rixas, homines à se in-  
vicem separat: sed Sanctus Spiritus , ut in  
Christo divinam & humanam Naturam mi-  
rabili sua obumbratione conjunxit, ita quo-  
que suis donis in nos effusis, & homines Deo  
& Deum hominibus conjungit . Quamdiu  
in homine manet Spiritus sanctus sua gratia  
& suis donis , tamdiu homo manet unitus  
Deo . Quam primùm homo per peccata ex-  
cidit à fide & charitate, & Spiritum sanctum  
excutit , separatur à Deo & tollitur beatissi-  
ma illa unio . Qui Spiritum sanctum habet,  
non odit fratrem . Quare? Quia per Spiritum  
particeps

particeps factus mystici corporis Christi, cujus membra sunt omnes pii: quis verò unquam membra suo odio habuit? Imò etiam inimicos suos diligit, qui Spiritu Domini regitur. Quare? Quia, qui Domino adhæret, fit unus Spiritus cum eo, jam verò Deus suum Solem oriiri sinit super bonos & malos, & nihil quicquam eorum, quæ fecit, odio habet. Qui Spiritum Dei habet, omnibus inservire promptus est, omnibus pro virili benè facit, omnibus se utendū præbet, quia etiā Deus fons est omnis misericordiæ, & gratiæ erga omnes: Jam verò Spiritus sanctus tales motus in homine efficit, qualis ipse est. Sicut anima corpus reddit animatum, sentiens, mobile: Ita Spiritus hominem efficit spiritualem, imbuunt mentem suavitate dulcedinis divinæ, & omnia membra ad obsequia Deo & proximo præstanda dirigit. E cœlo factus est sonitus ille, qui fuit symbolum venientis sancti Spiritus, quia cœlestis est Naturæ sanctus ille Spiritus nimirum ejusdem essentia cum Patre & Filio, à quo Patre & Filio ab omni æternitate procedit; efficit etiam homines cœlesti cogitantes, & ea quæ sursum sunt quærentes: qui terrenis adhæret, & amore suo mundo unitus est, ille nondum cœlestis Spiritus particeps factus. Venit sub flatus Symbolo, quia vivam consolationem

lationem afflictis suppeditat : quia etiam reciproco flatu , ac respiratione Spiritus ærei vivimus juxta carnem, ideò sub Spiritus & flatus Symbolo adventabat, qui largitur, ut vivamus juxta meliorem nostri partem. Ventus, quò vult, spirat, & sonum ejus audis, sed nescis unde veniat, & quò vadat: ita est omnis qui genitus est ex Spiritu. Congruenter etiam sub flatus symbolo venit, qui à Patre & Filio una spiratione ab æterno procedit. Vehemens erat flatus ille, quia nescit tarda molimina. Spiritus sancti gratia: movet ille sanctus Spiritus pios, in quibus habitat, ad omne bonum, atque ita movet, ut nec tyrannorum minas, nec Sata-næ insidia, nec mundi odia curent. Confert Apostolis linguarum donum, quia in omnem terram sonus ipsorum exire debebat; sicque confusio linguarum, quæ pœna fuerat superbiæ & temeritatis in ædificanda turre Babylonis, sublata est, jamque dispersæ illæ gentes per diversitatem linguarum, in unitatem fidei Spiritus sancti munere congregatæ sunt. Congruenter sub linguarum figura venit, à quo inspirati locuti sunt Sancti Dei homines; qui in Apostolis locutus est, qui verba Dei ponit in os ministrorum Ecclesiæ. Pro tantis donis laudandus & benedicendus sanctus ille Spiritus, cum Patre & Filio, in seculum.

M E D I-



## MEDITATIO. XXIII.

De Ecclesiæ dignitate.

*Christi est Ecclesia sponsa.*

**C**Ogita, devota anima, quantum tibi præstitit Deus beneficium, quod ad Ecclesiæ suæ revocavit consortium. Una est dilecta mea, dicit Sponsus in Cantico, verè una, quia una solùm vera & orthodoxa Ecclesia, delecta Christi sponsa. Extrà corpus Christi non est Spiritus Christi; qui autem Spiritum Christi non habet, non est ejus; qui Christi non est, æternæ vitæ particeps fieri non potest. Extrà arcam Noë omnes perire cogeantur in diluvio; extrà spiritua-lem Arcam Ecclesiæ omnes æterno involvuntur exitio. Non habebit Deum patrem in cœlis, qui non habet Ecclesiam matrem in his terris. Cogita, devota anima, quod singulis diebus multa animarum millia descendunt ad infernum, idèd, quod sunt extrà Ecclesiæ gremium: Non seperavit te ab illis natura, sed sola Dei misericordis gratia. Cum Ægyptus tenebris palpabilibus involveretur, apud solos Israëlitæ lux: ita in sola Ecclesia est lux divinæ agnitionis. Qui sunt extrà Ecclesiam, à tenebris ignorantiae

rantiz in vita præsente, transeunt ad tenebras damnationis æternæ in vita sequente. Qui non est portio Ecclesiæ militantis, nunquam erit portio Ecclesiæ triumphantis: hæc enim sunt intimè conjuncta; Deus, verbum, fides, Christus, Ecclesia & vita æterna. Sancta Dei Ecclesia est Mater, Virgo, Sponsa. Mater est, quia Deo quotidie spirituales generat filios: Virgo est, quia à Diaboli & mundi se integram servat complexibus: Sponsa est, quia Christus eam sibi desponsavit fœdere sempiterno, eique arrham Spiritus dedit. Ecclesia est navis illa, quæ Christum & ejus Discipulos vehit, ac ad portum felicitatis æternæ tandem perducit: navigat Ecclesia instructa fidei gubernaculo, felici cursu per hujus seculi mare, habens Deum, gubernatorem; Angelos, remiges; portos, choros omnium Sanctorum: erecta est in medio ipsa salutaris crucis arbor; in qua Evangelicæ fidei vela suspensa; quibus flante S. Spiritu ad securitatem quietis æternæ deducitur. Ecclesia est vinea illa, quam Deus in agro hujus mundi plantavit, sanguine suo rigavit, sepem Angelicæ protectionis ei circumdedit, torcular passionis in ea construxit, lapides & offendicula ex ea sustulit. Ecclesia est mulier illa amicta Sole; quia Christi justitia induta est: Lu-  
nam

nam sub pedibus calcatur: quia terrena variis obnoxia mutationibus despicit. Considera summam hanc Ecclesiae dignitatem, devota anima, & debitas Deo gratias age. Magna quidem in Ecclesia Dei beneficia, sed ea non sunt omnibus obvia. Est hortus conclusus, & fons signatus: nemo pulchritudinem horti conclusi videt, nisi qui in eo est; sic nemo summa hanc in Ecclesia beneficia agnoscit, nisi qui & ipse in ea est. Nigra est exterius hanc Christi sponsa, sed formosa interiorius; omnis enim gloria filiae Regis est ad intra. Navis hanc variis persecutionum concutitur tempestatibus: Vineam hanc ligata erigitur & recisa augetur: Mulieri huic ipse infernalis Draco variis modis insidiatur. Pulchrum est Ecclesia lilium, sed tamen inter spinas: Hortus pulcherrimus est Ecclesia; sed quando Aquilo tribulationum eam perflatur, tunc demum fluunt aromata illius. Dei Filia est Ecclesia; sed mundo admodum exosa celestem expectat hereditatem: igitur cogitur in hoc mundo peregrinari, in peregrinatione premitur, in pressione silet, in silentio fortis est, in fortitudine vincit. Mater spiritualis est Ecclesia, sed cogitur stare sub cruce: sicut etiam Maria, ex qua Christus in hunc mundum natus, sub cruce stabat. Ecclesia est palma, quia sub pondere tribulationum ac tentationum magis crescit. Cogita, devota anima, Ecclesiae dignitatem,

dignitatem, & cave ne quicquam ea indignū committas. Mater est Ecclesia, cave igitur ne vocem ejus contempnas. Mater est, semper igitur ab ipsius pendere debes uberibus: Ecclesiæ ubera sunt Verbum & Sacramenta. Virgo est Ecclesia, si ergò verus ejus filius, à mundi abstine complexibus: Membrum es Virginis Ecclesiæ; vide, ne virginea membra prostituas, & cum Diabolo per peccata scorteris. Sponsa Christi est Ecclesia, & omnis devota anima: Sponsa Christi es, vide ne arrham Spiritus Sancti tibi datam amittas. Sponsa Christi es, assiduus ora precibus, ut properet Sponsus, & ad nuptias cœlestes te introducat: Veniet autem sponsus in securitatis nocte; vigila ergò, ne, cum venerit Sponsus, inveniat te dormientem, & januam salutis æternæ tibi præcludat: Luceat oleum fidei tuæ, ne in adventu Sponsi cogaris frustrà id desiderare. Veheris in navi, vide ne in mundi mare te præcipites, antequam ad portam pervenias: Veheris in navi, precare, ne tempestatibus afflictionum & fluctibus tentationum absorbeatur. In vineam Domini vocatus es, vide ut strenuè labores; consideratio denarii minuat labores diei: Vineam Domini es, abjice inutilia sarmenta, infrugifera carnis opera; totum vitæ tempus æstima esse putationis tempus; Palmes es in vera

vera vite Christo, vide ut in eo maneat, & fructum feras multum, quia palmitem non ferentem fructum cœlestis agricola tollet, & ferentem fructum purgabit, ut copiosiores ferat. Induisti Christum per fidem, & sole hoc iustitiæ amictus es; vide ut Lunam, id est, omnia terrena sub pedibus calces, atque omnia respectu æternorum bonorum parvi æstimes. O bone Jesu, qui nos duxisti in Ecclesiam militantem, deduc aliquando etiam ad triumphantem.

---

## MEDITATIO XXIV.

### Meditatio de Prædestinatione.

#### *In Christo electio facta.*

Quoties, devota anima, cogitare vis de prædestinatione tua, aspice Christum in cruce pendentem, pro peccatis totius mundi morientem, propter iustitiam nostram resurgentem: Incipe à Christo jacente in præsepio, sic demum recto ordine procedet tua de prædestinatione disputatio. Elegit nos Deus ante jacta mundi fundamenta: sed tamen in Christo est electio facta: Si ergo es in Christo per fidem, ne dubites ad te quoque pertinere electionem: Si firma  
cordis

cordis fiducia adhæres, Christo ne dubites te esse in electorum numero. Si verò à priori extra limites verbi vis scrutari profundum prædestinationis, metuendum valdè, ne cadas in profundum desperationis. Extrà Christum Deus ignis consumens; cave ergò ne huic igni appropinques, ne consumaris. Extrà Christi satisfactionem Deus voce legis suæ accusat omnes, damnat omnes; cave ergò, ne ex lege prædestinationis mysterium haurias. Non inquiras omnes consiliorum divincrum rationes, ne te multùm seducant tuæ cogitationes. Habitat Deus in luce inaccessibili; ad eam ne coneris temerè progredi, sed tamen revelavit nobis Deus lucem Evangelii, in hâc rutò inquirere poteris doctrinam hujus secreti, in hoc lumine videbis verum lumen. Relinque æterni hujus & ab æterno facti decreti profunditatem, & converte te ad manifestationis in tempore factæ claritatem, justificatio facta in tempore speculum est electionis factæ sine tempore. Agnosce ex lege iram Dei propter peccata, & age pœnitentiam. Agnosce ex Evangelio misericordiam Dei propter Christi meritum, & illud applica tibi per fiduciam. Agnosce fidei naturam, & ostende eam per conversationem piam. Agnosce in cruce castigationem paternam, & sustine per patientiam.

Tunc

Tunc demùm incipe tractare prædestinationis doctrinam. Hanc methodum ostendit Apostolus : hanc methodum sequatur verus Apostoli discipulus . Tria sunt quæ, in hoc mysterio semper observanda , Misericordia Dei diligentis , meritum Christi patientis , gratia Spiritûs sancti per Evangelium vocantis . Universalis est Dei misericordia , quia totum mundum dilexit ; misericordiâ Domini plena est terra , imò major cœlo & terrâ : tanta enim est , quantus Deus ipse , quia Deus charitas ; testatus est in verbo suo , se nullius mortem velle ; si parum hoc est , etiam juramento confirmavit : si non potes credere Deo promittenti , crede saltem pro salute tua juranti . Vocatur Pater misericordiarum , quia ei proprium est , misereri & parcere , miserandi causam & originem sumit ex proprio : judicandi vel ulciscendi magi ex alieno : ut longè aliter de corde ipsius misratio , quàm animadversio procedere videatur . Universale etiam est meritum Christi , quia pro totius mundi peccatis passus est . Quid ergò misericordiam Dei probaret appertius , quàm quod dilexit nos , cum nondum essemus , quia dilectionis est , quod creati sumus ? Dilexit insuper , cum avergi essemus , quia dilectionis est , quod Filium Redemptorem nobis dedit . Peccatori , re-

mentis æternis adjudicato, & unde se redimat non habenti, Deus Pater dicit, accipe Unigenitum meum, & da pro te. Ipse Filius dicit, tolle me, & redime te. Flos campi, non flos horti est Christus, quia odor gratiæ ipsius non est quibusdam clausus, sed omnibus apertus; &, ne dubites de universalitate meriti; orabat Christus patiens pro crucifigentibus se, & sanguinem fundebat pro illis, qui sanguinem ejus fundebant ipsi. Universales etiam sunt Evangelii promissiones, quia omnibus dicit Christus: Venite ad me omnes, qui laboratis. Quod pro omnibus præstitum, omnibus etiam offertur: quantum in his bonis pedem fiduciæ porrexeris, tantum etiam obtinebis: nemini Deus suam denegat gratiam, nisi qui seipsum indignum eam existimat. Considera ergo, fidelis anima, hæc tria prædestinationis fulcra, & firmam cordis tui eis innitere fiduciâ; considera præterita misericordiæ divini beneficia, & de finali non dubitabis perseverantia. Quando nondum eras, creavit te Deus; quando per Adami lapsum damnatus eras, redemit te; quando extra Ecclesiam in mundo vivebas, vocavit te; quando ignorabas, instruxit te; quando errabas, reduxit te; quando peccabas, correxit te; quando stereris, tenuit te; quando cecidisti, erexit te; quando



do ivisti, duxit te ; quando ad ipsum venisti, suscepit te. Affuit ibi in expectando longanimitas . & in condonando facilitas. Misericordia Dei præcedit te : firmitèr spera, quod etiam subsequetur : prævenit te misericordia Dei , ut saneris ; subsequetur etiam, ut glorificeris : prævenit te , ut piè vivas ; subsequetur etiam , ut in æternum cum illo vivas. Quare cadens non es contritus ? Quis supposuit manum ? quis nisi Dominus ? Confide ergo etiam in posterum in Dei misericordia , & finem fidei salutem æternam firmitèr spera. In quibus enim manibus salutis tuæ materia tutius consistat , quam in iis , quæ cælum condiderunt & terram, in iis quæ nunquam abbreviantur , in iis, quæ adfluunt misericordiæ visceribus , nec desunt foramina per quæ effluant . Cogita autem , devota anima , quod à Deo electi sumus, ut essemus sancti & irreprehensibiles. In quibus ergo non est sanctæ vitæ studium , ad illos non pertinet electionis beneficium . Electi sumus in Christo , in Christo sumus per fidem ; fides se exercit per dilectionem : ubi ergò non est dilectio , ibi nec Christus , ubi non est Christus, ibi nec electio . Firmum quidem stat fundamentum Dei habens signaculum hoc ; Dominus novit , qui sint sui ; sed tamen discedat ab injustis , qui invocant nomen Do-

mini. Oves Christi nemo rapiet ex ipsius manu; sed tamen oves Christi audiant etiam ipsius vocem. Domus Dei sumus; sed fiduciam & gloriam spei usque ad finem firmam retineamus. O Domine, qui dedisti velle, da etiam perficere.

## MEDITATIO XXV.

De salutari precum efficacia

*Penetrant suspiria cælum.*

**M**AXIMUM hoc est Dei beneficium, quod familiare precum piarum requirit alloquium: ipse donat orationis affectum, ipse etiam donat orationis effectum. Magna vis orationis, quæ in terra funditur, sed in cœlo operatur: Oratio justî, clavis est cœli, ascendit precatio, & descendit Dei liberatio: oratio est salutare securû, quo omnia adversarii zela repelluntur. Moses cum extendebat manus suas, prævalebat Israël contra Amalechitas. Si ad cœlum extends manus tuas, non prævalebit tibi Satanas. Sicut hosti oppōitur murus, ita Dei ira Sanctorum frangitur precibus. Ipse Salvator noster orabat, non propter aliquam necessitatem, sed ut precum nobis commendaret dignitatem. Ora-  
tio

tio census est nostræ subjectionis , quia præcepit nobis Deus, ut preces velut spirituale quoddam tributum quotidie ei offeramus: Est scala nostræ ascensionis, quia nihil aliud est oratio, quam quædam mentis ad Deum peregrinatio: Est scutum nostræ defensionis , quia anima hominis viventis in precibus, tuta est à Dæmonum insultibus: Est nuncius fidelis legationis, quia ad thronum Dei ascendit oratio, & ad ferendum auxilium eum invitat. Hic nuncius sine suo nunquam frustratur; semper enim exaudit nos Deus, si non ad nostram voluntatem, tamen ad utilitatem, & salutem: unum indubitanter è duobus sperare possumus, aut dabit id quod petimus, aut illud quod novit utilius. Dedit Deus filium suum donum illud excellentissimum non rogatus. Quid faciet rogatus? Nec de Patris exauditione, nec de Filii intercessionem dubitare possumus. In qualibet causa per preces cum Mose intres in tabernaculum ad consulendum Dominum, & cito audies divinum responsum. Christus cum oraret, transfigurabatur; ita in oratione magnæ fiunt in anima mutationes, quia lumen animæ est oratio, quæ sæpius eum, quem invenit desperantem, relinquit exultantem. Qua fronte Solem intueris, nisi prius adoraveris eum, qui lumen illud

Iud dulcissimum oculis tuis mittit? Quo pacto frueris mensâ, nisi prius adoraveris eum, qui tantum bonum largitur ac supeditat? Quâ spe trades teipsum nocturno tempori, nisi te præmunieris orando? Quem fructum sperare poteris ex laboribus tuis, nisi prius adoraveris eum, sine quo labor omnis inutilis? Si ergo donâ spiritualia aut corporalia desideras, pete, & accipies: Si Christum desideras, per preces quære, & invenies: Si ostium divinæ gratiæ & salutis æternæ aperiri tibi desideras, per preces pulsa, & aperietur tibi: Si in deserto hujus mundi fitis tentationum & penuria bonorum spiritualium te affligit, accede ad petram spiritualem, quæ est Christus, per devotionem, eamque percutite virgâ orationis, & senties quod fluentia divinæ gratiæ restinguant sitim tuæ penuriæ. Vis gratum Deo exhibere sacrificium? Offer preces; sentiet Deus odorem suavitatis, & cessabit ipse ira. Vis assiduè cum Deo versari? Preces ama, quæ sunt spirituale Dei & devotæ animæ colloquium. Vis gustare, quam suavis sit Dominus? Invita precibus Dominum ad cordis tui domicilium. Placet Deo oratio, sed debito modo instituta. Qui ergo exaudiri desiderat, is oret sapienter, ardentèr, indefinentèr, humilitèr, fidelitèr, perseverantèr & confidentèr. Oret sapientèr,

sapienter, ut scilicet oret ea, quæ divinæ gloriæ & proximorum salutis serviunt. Omnipotens est Deus; ergo non statuas ei in precibus modum: Sapientissimus est; ergo non præscribas ei ordinem. Non temere prorumpant preces, sed fidem præeuntem sequantur, fides autem respicit verbum: quæ ergo absolute Deus in verbo promittit, absolute ores; quæ cum conditione promittit, ut temporalia, ea itidem cum conditione ores; quæ nullo modo promittit, ea etiam nullo modo ores. Sæpe Deus dat iratus, quod negat propitius: sequere ergo Christum, qui suam voluntatem Deo resignat. Ores ardentè: quomodo enim requirere potes, ut Deus te audiat, cum te ipsum non audias? Deum tui memorem esse vis, cum tui memor non sis? Cum orare vis intra cubiculum tuum, & fores claudere. Cubiculum est cor tuum; in illud debes intrare, si vis debito modo orare; fores ejus debes occludere, ne mundanorum negotiorum cogitationes te possint turbare: non sunt voces ad aures Dei nisi animi affectus: mens ardore cogitationis ita debet esse incitata, ut totum longè superet quod lingua exprimit: atque hoc est in Spiritu & veritate adorare, quod requirit Dominus. Christus orabat in monte, & oculos ad cælum levabat; ita mentem ab

omnibus creaturis averſa ad Deum debemus convertere: injuriam Deo facis, ſi precaris eum, ut tibi intendat, tu verò tibi ipſi non intendas. Inde ſinè tibi orare poſſumus ſi, in Spiritu oremus, ut ſcilicet mens noſtra Sanctis deſideriis ſemper ad Deum vigilet. Non ſemper clamore opus eſt: quia Deus etiam ſuſpiria cordis audit, cum habitet in piorum cordibus: non ſemper opus eſt multis verbis, quia etiam cogitationibus noſtris intereſt, unus interdum gemitus à Spiritu Sancto excitatus, & in Spiritu Deo oblatus, gravior eſt Deo, quàm prolixæ præcû recitationes, ubi lingua loquitur, ſed cor planè mutum eſt. Oret humiliter, ut non de ſuo merito, ſed tantùm de gratia Dei confidat: ſi preces noſtræ nituntur dignitate, damnatæ ſunt etiam ſi præ devotione cor ſanguinem exſudaret: nemo placet Deo niſi in Chriſto: ergò etiã nemo rectè orat, niſi per Chriſtum & propter Chriſtum: Non placebant Deo ſacrificia quæ non offerebantur in unica illa tabernaculi ara; non placet Deo oratio, quæ non in hæc unica ara Chriſto offertur. Iſraelitis precum exauditio promiſſa, ſi facie ad Hieroſolymam verſa orarent; ſic in precibus ad Chriſtum, qui eſt templum divinitatis, nos convertamus. Chriſtus in paſſione oraturus abjicit ſe in terram. Vide, quomodo ſanctiſſima illa anima humiliet ſe coràm majeſtate divina! Oret fideliter, ut ſe offerat ad omnia

gaudii carentiā, & omnis pœnæ patientiam: quanto quis orat citius, tantò utiliùs; quanto sapiùs, tantò utiliùs; quanto ferventiùs, tantò Deo acceptiùs. Oret perseverantèr, quia, cum tardius dat Dominus, cōmendat dona, non negat. Desiderata diutiùs, obtinētur dulciùs. Oret cōfidentèr, ut scilicet postulet in fide, nihil hæsītans. O clemētissime Deus, qui orare nos iussisti, da, ut etiā rectè oremus.

## MEDITATIO XXVI.

De sanctorum Angelorum custodia.

*Sanctis sacer Angelus astat.*

**C**Ogita, devota anima, quanta sit divina gratia, quod Angelorum tibi constituta est custodia. Cælestis Pater Filium suum mittit ad nos liberandos; Filius Dei incarnatus ad nos salvandos; Spiritus sanctus mittitur ad nos sanctificādos, Angeli mittuntur ad nos protegendos. Sic ergò tota cælestis curia nobis quasi inservit, & sua ad nos traducit beneficia. Non miror ampliùs, quod omnes creaturæ inferiores propter hominem conditæ, cum ipsi Angeli, qui longè digniores creaturæ, sua non denegent ministeria. Quid mirum est, quod cælum ministret nobis lucem in die, ut laboremus; tenebras in nocte, ut quiescamus; cum ipsi cælestis regni incolæ nobis ministrent? Quid mirum quod aer vitalem nobis præbeat flatum, & omne genus avium ad-

obsequium, cum cœlestes spiritus vitæ nostræ conservandæ invigilent? Quid mirum, quod aqua det potum, sordes purget, a-rentia riget, piscium genera præbear; cum nobis æstu calamitatum & tentationum defatigatis ipsi Angeli præstò sint, ut recreent? Quid mirum, quod terra nos portet, pane & vino nutriat, omnibus generibus fructuum & animalium mensas nostras repleat; cum Angelis mandatum sit, ut custodiant nos in omnibus viis, in manibus nos portent, ne fortè impingat ad lapidem pes noster? Solliciti erant Angeli de Christo, quia Angelus ejus conceptionem nunciat, Angelus ejus nativitatem manifestat, Angelus in Ægyptum fugere mandat, Angeli serviunt ei in deserto, Angeli ei ministrant in toto prædicationis ministerio, Angelus ei adest in mortis agone, Angelus apparet in ipsius resurrectione, Angeli præstò sunt in ascensione, aderunt Angeli in futura ad judicium reversione. Ut ergò Christo in diebus carnis suæ inservierunt Angeli, ita quoq; sciliciti sunt de omnibus illis qui per fidē Christo incorporati: Quo modo inservierūt capiti, eo modo inserviunt etiā mēbris: Gaudent inservire illis, quos aliquando socios habebunt in cœlis: Non renuunt illorū ministeria, quorum dulcissima aliquando sperant consortia.



confortia. Jacobo in via ad patriam apparent Angelorum castra: Sic piis in hac vita, quæ est ad cœlestem patriam via, Angeli custodes adduntur. Daniele inter medios leones Angeli protegunt: Sic ab insidiis infernalis leonis omnes pios tutos præstant. Angeli Lothum ex Sodomorum eripiunt incendio: Sic sanctis inspirationibus & contra diabolicas tentationes protectionibus, ex infernalibus flammis sæpius nos eripiunt. Lazari animam in sinum Abrahamæ deportant Angeli: Sic omnium electorum animas transferunt ad palatium cœlestis regni. Petrum ex carcere educit Angelus: Sic ex præsentissimis pios sæpè eripit periculis. Magno quidem est adversarii nostri diaboli potentia; sed protegit nos Angelorum custodia. Nec dubites in omnibus periculis hos auxiliares tibi adesse, quia Scriptura sub figura Cherubim & Seraphim alatos eos depingit, ut cerro statuas, incredibili celeritate ad ferendum auxilium eos præstò futuros. Ne dubites, in omnibus locis hos protectores tibi adesse, quia sunt subtilissimi Spiritus, quibus nullum obstitit corpus: cuncta illis cedunt visibilia, cuncta æquè corpora, quantumlibet solida vel spissa, penetrabilia eis sunt ac pervia: ne dubites pericula & afflictiones tuas hos spiritus scire, quia semper vident faciem

faciem cœlestis Patris , & ad omnia promptissimè ei præstò sunt ministeria. Cogita etiam, devota anima, sanctos esse hos Angelos, sanctitati ergò studeas, si eos vis habere socios: morum similitudo maximè conciliat amicitiam: sanctis assuesce actionibus, si Angelorum desideras custodiam. In omni loco atque Angulo reverentiam exhibe tuo Angelo, neque præsentem eo facias, quæ in conspectu hominis facere erubescis. Casti sunt hi Spiritus; igitur spurcis abiguntur actionibus. Apes expellit fumus, columbas fœtor: sic vitæ custodes Angelos fugiat lachrymabile & graveolens peccatum. Amisissis per peccata his presidiiis, quomodo tutus eris à Diabolorum insidiis? Destitutus Angelorum protectione, quomodo tutus eris à periculis variorum incurfione? Si anima tua caret muro Angelicæ defensionis, facile expugnabit eam Dæmon fallacia persuasionis. A Deo ad ministeria sancti illi Angeli mittuntur; reconciliandus ergò prius es Deo per fidem, si Angelum vis habere custodem. Ubi non est Dei gratia, ibi quoque non est Angelorum custodia. Intueamur Angelos, tanquam salutare quoddam Dei manus, quæ nullum ad opus, nisi ipso dirigente, se moveant. Gaudium est in cœlo coram Angelis super uno peccatore respiciente: lachrymæ pœnitentium peccatorum

catorum sunt quasi vinum Angelorum: cor autem impœnitens fugat custodes Angelos : Agamus ergò pœnitentiam, ut Angelis excitemus lætitiā. Cœlestis & spiritalis naturæ sunt Angeli ; cœlestia ergò & spiritalis cogitemus , ut nobis adesse eis volupe sit . Humiles sunt Angeli , & superbia penitus eis exosa , quia etiam tenellis pueris inservire non erubescunt ; quid ergò superbit terra & cinis , cùm tantoperè se humiliet Spiritus cœlestis ? In morte metuenda potissimùm Dæmonis astutia, quia scriptum est , quod serpens insidiatur calcaneo : extrema pars corporis calcaneus est ; extremus vitæ terminus mors : In ultima ista mortis agonia maximè necessaria est Angelorum custodia , quia ab ignitis diaboli telis liberent , & animam corporis domicilio egressam ad cœlestem Paradisum deportent . Cum Zacharias in Templo sacro fungeretur ministerio , Angelus Domini ad ipsum veniebat : Sic etiam , si verbi & precum gaudes exercitio , Angelorum quoque gaudere poteris patrocinio . O clementissime Deus , qui per sanctos Angelos deducis nos per hujus vitæ eremum , da, ut per eosdem deducamur ad cœleste regnum ?

## MEDITATIO XXVII.

De insidiis Diabolicis.

*Quis norit Daemonis astus?*

**C**Ogita, devota anima, in quanto ver-  
seris periculo, quod semper tibi imper-  
det à Diabolo, tuo adversario. Hostis ille  
est audaciâ promptissimus, viribus robustis-  
simus, artibus callidissimus, machinis om-  
nibus refertissimus, pugnandi studio infati-  
gabilis, in omnes formas variabilis. In  
varia crimina ipse illicit; & postquam ille-  
xit, coram tribunali Dei nos accusat: De-  
um apud homines, homines apud Deum,  
& homines inter se invicem accusat. Unius-  
cujusque propensionem exactè priùs perspi-  
cit, postea laqueos tentationum opponit.  
Quemadmodum in oppugnationibus, non  
ad firmas & munitas partes accedunt oppu-  
gnatores, sed ubi æstimant muros esse flux-  
os, fossas planiores, & turres incustoditas:  
Sic perpetuò animam hominis oppugnans  
Diabolus, id primùm adoritur, quicquid ser-  
serit molle & affectum in animo. Semel  
victus non penitus cedit, sed ad tentandum  
fortiùs insurgit, ut vincat eos rædio & neg-  
ligentiâ, quos vincere non potuit tentatio-  
num

nū violentia. A quo dolos suos iste contineat, qui ipsum majestatis Dominum ausus est calliditatis suæ fraude aggredi? A quo Christiano is abstineat, qui ipsos Christi Apostolos expetiit cribrare, sicut triticum? Decepit Adamum in natura instituta: quos non poterit decipere in Natura restituta? Decepit Judam in schola Salvatoris: quos non poterit decipere in mundo, schola erroris? In omnibus omnino diabolicæ meruendæ sunt insidiæ. In prosperis, invitat nos ad animi elationem; in adversis, invitat ad desperationem. Si parsimonia aliquem videt delectari, cum inexplebilis cupiditatis compedibus gaudet illigare; si quem heroicus spiritus animat, cum irarum stimulis inflamat; si quem videt paulò latiorrem, cum ad insanæ libidinis incitat favorem; quos videt ferventes in religione, eos implicare conatur vanâ superstitione; quos videt constitutos in dignitatibus, eos ambitionis percellit facibus. Cum impellit ad peccata, amplificat Dei misericordiam; cum in peccata præcipitavit, amplificat Dei justitiam: prius perducere vult ad præsumptionem, postea deducere conatur ad desperationem. Interdum oppugnat externè persecutionibus; interdum oppugnat internè ignitis tentationibus. Interdum nos impugnat apertè & violentè; interdum occultè

cultè & fraudulentè . In comestione  
posuit gulam , in generatione luxuriàm ,  
in exercitatione ignaviam , in conversa-  
tione invidiam , in gubernatione avariti-  
am , in correptione iram ; in dignitate  
superbiam , in corde posuit cogitationes  
malas , in ore posuit locutiones falsas ,  
in membras operationes iniquas ; in vi-  
gilando movet ad prava opera , in dor-  
miendo ad somnia turpia . Sic ergò ubi-  
que & in omnibus Diaboli cavendæ sunt  
insidiæ . Dormimus nos , & ipse vigi-  
lat ; securi nos sumus , & ille tanquam  
leo circumit . Si leonem irritatum in te  
impetum facere conspiceres , quàm vero  
timore cohorresceres ? & cum infernalem  
leonem tibi insidiari audias , in utram-  
que aurem adhuc securè dormitas ? Con-  
sidera ergò , fidelis anima , potentis-  
simi hujus hostis insidias , & spiritualium  
armorem quære suppetias . Sint lumbi cin-  
cti veritate , & induti loricâ justitiæ . Indue  
perfectam justitiam Christi , & tutus eris à  
tentationibus Diaboli . Absconde te in for-  
minibus vulnerû Christi , quoties terreris sa-  
culis serpentis hujus maligni . Verè credens  
est in Christo : Ut ergò nihil juris habet Sa-  
tanus in Christum : Ita etiam nihil juris ha-  
bet in verè credentem . Calceati sunt pedes  
in præparatione Evangelii pacis : Audiatur  
perpetuò

perpetuò, & sonet in ore nostro Christi confessio : Sic non lædet nos ulla diaboli tentatio. Verba incantatoris non tam pellunt serpentem corporalem, quàm eloquia constantis confessionis fugant hunc serpentem spiritualem. Assumatur scutum fidei, ut tela ignita extinguamus hostis nequissimi. Fides est, quæ etiam montes transfert; montes intellige dubitationum, persecutionum, & tentationum. Non percutiebantur à vastatore Israelitæ, quorum postes signati sanguine Paschalis agni; non læduntur ab hoc vastatore, quorum corda per fidem Christi sanguine aspersa. Fides recumbit in Dei promissiones. At promissiones Dei avertere non potest Satanas. Ergò etiam contrà fidem prævalere non poterit. Fides est animæ lumen : tentationes ergò maligni spiritus in hoc lumine facilè apparent. Per fidem peccata nostra projiciuntur in profundum misericordiæ divinæ mare; in illo ignita Diaboli tela facilè extinguuntur. Galeam etiam salutis, id est, sanctam spem assumere debemus. Tolerà tentationem, tentationis respiciens exitum; est enim Deus moderator certantium & corona vincientium. Si nullus hostis, nulla pugna, si nulla pugna, nulla victoria; si nulla est victoria, nulla corona : melior illa pugna, quæ Deo proximum facit; quam illa pax, quæ à Deo

Deo abalienat. Assumendus etiam gladius Spiritus, quod est verbum Dei: plus apud te valere finas Scripturæ consolationes, quàm Diaboli contradictiones. Christus omnes Satanæ tentationes verbo vicit; verbo adhuc omnes Satanæ tentationes vincunt Christiani. Denique, in præcibus maximum habes contra tentationes subsidium: Quoties navicula animæ fluctibus tentationum obruitur, Christum precibus excita: Hostes visibiles vincimus feriendo; hostem invisibilem vincimus preces fundendo. Pugna, ô Christe pro nobis; in nobis, ut etiam in te vincamus.

---

## MEDITATIO : XXVIII.

Generales piè vivendi regulæ.

*Pietas sapientia summa est.*

**Q**uolibet die, morti, judicio, & æternitati magis appropinquas. Cogita ergò quolibet die, quomodo in mortis & judicii severa discussione consistas, & quomodo in æternum vivas. Omnium cogitationum, verborum & actionum, accurata cura habenda, quia de omnibus cogitationibus, verbis, & actionibus olim accurata ratio



ratio reddenda. Mortem hâc nocte instare cogita tempore vespertino ; mortem hâc die instare cogita tempore matutino . Conversionem & bonam operationem nè differ in crastinum , quia incerta est dies crastina , sed mors impendens semper est certa. Nihil magis adversum pietati , quam dilatio. Si contemnis internam Spiritûs sancti vocationem , nunquam pervenies ad veram conversationem . Conversationem & bonam operationem ne differ in senectutem , sed offer Deo ipsam floridam juventutem , Incerta est juveni senectus ; certus paratus est juveni impœnitenti interitus. Nulla ætas servitio Dei magis apta , quàm viribus corporis & animi vicens juvenia . In nullius hominis gratiam suscipere debes actionem malam ; non enim homo iste , sed Deus tuam aliquando judicabit vitam : Nullam ergo hominum gratiam divina statuas gratiæ præferendam . In via Domini aut proficimus aut deficimus : Singulis ergo diebus vitam tuam examina , an in pietatis studio proficias aut deficias. Stare in via Domini , est retrogredi : non ergo te delectet in cursu pietatis stare ; studeas autem semper in via Domini ambulare . In conversatione tua omnibus sis suavis , nemini gravis , paucis familiaris ; Deo vivas piè , tibi castè , proximo justè ; amico utaris ad gratiam , inimico

inimico ad patientiam, omnibus ad benevolentiam, quibus potes, ad beneficentiam. In vita tibi tuisque vitiis quotidie morere: sic in morte Deo poteris vivere. Appareat misericordia in affectu, benignitas in vultu, humilitas in habitu, modestia in cohabitatione, patientia in tribulatione. Semper cogites tria præterita, malum commissum, bonum omissum, tempus amissum. Semper cogites tria præsentia: Vitæ præsentis brevitatem, salvandi difficultatem, salvandorum paucitatem. Semper cogites tria futura: mortem, qua nihil horribilius; judicium, quo nihil terribilius, pœnam inferni, qua nihil intolerabilius; Preces vespertinæ præterlapsæ diei emendent peccata: Ultimus septimanæ dies precedentium dierum emendet delicta. Vesperis cogita, quàm multi ad infernum eo die præcipitati; & a Deo gratias age, quod tempus tibi concesserit pœninendi. Tria sunt suprà te, quorum cogitatio nunquam recedat à memoria tua: Oculus omnia videns, auris omnia audiens, & libri, in quos omnia scribuntur. Totum se Deus tibi communicabit; totum te communices etiam proximo tuo. Optima vita est, quæ tota aliis inservit. Exhibe superiori obedientiam & reverentiam, æquali consilium & auxilium, inferiori custodiam &

& disciplinam. Corpus tuum subiciatur animo, & animus Deo. Mala tua præterita defleas, præsentia bona parvi pendas, futura bona toto cordis desiderio concupiscas. Memento peccati tui, ut doleas: memento mortis, ut desinas: memento justitiæ divinæ, ut timeas: memento misericordiæ divinæ, nè desperes. Quantum potes, è mundo te abstrahe, & servitio Domini te totum devove: Semper cogita periclitari castitatem in delitiis, humilitatem in divitiis, pietatem in negociis. Nulli placere appetas, nisi Christo: nulli displicere times, nisi Christo. Semper ora Deum, ut jubeat quod velit, & det quod jubeat: Quod factum est, regat; quod futurum regat. Qualis videri vis, talis etiam esse debes: Non enim judicat Deus secundum speciem, sed secundum veritatem. In verbis cave multiloquium, quia de omni verbo vano rationem exigit judicium. Opera tua qualiacunque sint, non transeunt, sed velut æternitatis quædam semina jaciuntur: si seminas in carnem, à carne metes corruptionem; si seminas in spiritum, à spiritu metes æternæ tribucionis præmium. Non sequentur te post mortem honores mundi, nec sequentur te divitiarum cumuli; non sequentur te voluptates, nec sequentur te mundi vanitates; sed post ultima vitæ fata se-  
quentur

quentur te omnia tua opera. Qualis ergo vis esse in judicio, talis hodie appareas in Dei conspectu. Non æstimes quæ tibi adsunt, sed potius æstimes ea quæ tibi desunt; non superbias propter id quod est datum, sed humiliteris potius propter id quod est negatum. Disce vivere, dum adhuc licet vivere: in hoc tempore æterna vita acquiritur aut amittitur: post mortem non restat tempus operandi, sed incipit tempus compensandi. In futura vita non expectatur operatio, sed operum retributio. Sancta meditatio pariat in te scientiam, scientia compunctionem, compunctio devotionem, devotio faciat orationem. Magnum bonum pro pace cordis silentium est oris. Quanto magis fueris à mundo separatus, tanto magis Deo eris gratus. Quicquid habere desideras, à Deo pete; quicquid habes, Deo tribue. Non est dignus, qui non agit gratias pro datis: cessat gratiarum decursus, ubi non fuerit recursus. Quicquid tibi accidit, in bonum converte: quoties tibi obveniunt prospera, æstima, quod exhibeatur benedicendi & laudandi materia: quoties obveniunt adversa, æstima, quod pœnitentiæ & conversionis sint monitoria. Vim potentiæ tuæ ostende in juvando, vim sapientiæ tuæ in erudiendo, vim divitiarum in benefaciendo. Non frangat te adversitas, neque extollat te prosperitas.

speritas. Sit scopus vitæ tuæ Christus, quem sequaris in via, ut eam assequaris in patria. In omnibus maximæ tibi curæ sit profunda humilitas, & ardens charitas. Elevet cor tuum charitas ad Deum, ut ei adhæreas; deprimat cor tuum humilitas, ne superbias. Æstima Deum Patrem clementiâ, Dominum disciplinâ, Patrem potestate blandâ, Dominum severâ, dilige ut Patrem piè, time ut Dominum necessariò; dilige eum, quia vult misericordiam; time eum, quia non vult peccatum. Time Dominum & ipe-  
ra in eum: agnosce tuam miseram, & ipsius prædica gratiam. O Deus, qui dedisti velle, da etiam perficere.

---

## MEDITATIO XXIX.

De securitate excutienda.

*Secure vivere mors est.*

**C**Ogita, devota anima, salvandi difficultatem; & faciliè excuties omnem securitatem. Nunquam & nullibi securitas est, neque in cælo, neque in Paradiso, multò minus in mundo. Cecidit Angelus sub præsentia divinitatis, cecidit Adam in loco voluptatis. Adamus creatus erat ad imaginem Dei, nihilominus infidiis deceptus est Diaboli.

boli. Salomon omnium hominum erat sapientissimus; nihilominus à Domino per mulieres est averſus. Judas erat in ſchola Salvatoris, & quotidie percipiebat ſalutaria verba iſtius ſummi Doctōris, nec tamen tutus fuit à laqueis ſeductoris; præcipitatus eſt in barathrum avaritiæ, & ex avaritia in barathrum æternæ triſtitiæ. David vir erat ſecundum cor Dei, & erat Jehovæ chariſſimus filius, ſed per homicidium & adulterium factus eſt mortis filius. Ubi ergo in hac vita ſecuritas? Adhære firmâ cordis fiducia Dei promiſſionibus; & tutus eris à Dæmonis impugnationibus. Nulla in hac vita ſecuritas, niſi quam credentibus, & in via Domini ambulantibus, promiſſionem præſtat infallibilitas: ſi ad futuram pervenerimus felicitatem, tunc demum plenam habebimus ſecuritatem. In hac vita connexa ſunt timor & religio, nec alterum debet eſſe ſine altero. Ne ſis ſecurus in adverſis, ſed quæcunque accidunt adverſa, peccatorum tuorum cogita flagella ſæpius occulta delicta punit Deus per flagella: manifeſta. Cogita gravem peccatorum tuorum labem, & time juſtum peccatorum vindictam. Ne ſis ſecurus in proſperis; illi enim Deus irſcitur, qui in hac vita non corripitur: quid ſunt afflictioneꝝ piorum? Amaraſque ſagittæ ex dulci Dei manu emiſſæ.

Multos

Multos Deus indignos præfenti punitione æstimat, quos tamen in æternum reprobat ; Successus felicitatis humanæ sæpè indicium est damnationis æternæ ; Nihil infelicius peccantium felicitate ; nihil miserabilius eo , qui miseriam ignorat. Quocunque vertis oculos ; materiam doloris invenis , & contrà securitatem remedia aspicias ; sursum Deum cogita , quem offendimus , deorsum infernum , quem meruimus , retrorsum , peccata , quæ commisimus ; antrorsum judicium , quod timemus ; introrsum conscientiam , quam fœdavimus ; extrorsum mundum , quem amavimus . Vide unde venis , & erubescere , ubies , & ingemisce ; quo iturus es , & contremisce : Arcta est salutis portæ ; sed adhuc arctior salutis via . Thesaurum fidei dedit tibi Deus ; sed thesaurum istum portas in vasis fictilibus . Angelos tibi dedit Deus ad custodiendum ; sed non longè abest diabolus ad seducendū . Renovavit te spiritu mentis tuæ ; sed habes adhuc multū de carnis vetustate . Constitutus es in Dei gratia ; sed nondū constitutus es in æterna gloria . Parata est in cœlo mā sio ; sed tamē affligit prius mūdi impugnatio . Promisit Deus veniā pœnitētis ; sed voluntatē pœnitēdi dare non promisit dilinquēti . Expectante te æternæ vitæ cōsolationes ; sed tamē per multas

te oportet ingredi tribulationes. Promissa est æterni præmii corona; sed gravis prius superanda restat pugna. Non mutat Deus suum promissum; sed nec tu mutare debes sanctæ vitæ studium. Non faciente servo quod præcipitur, faciet Dominus quod minatur: Ingemiſcendum ergò jugiter, & de posita securitate lugendum, nè justo & secreto Dei judicio homo deferatur, & perdendus in potestate Dæmonum relinquatur. Sic, quamdiu adest divina gratia, delectare in ea; ut tamen non existimes, te donum Dei jure hæreditario possidere; ita scilicet securus de eo, tanquam nunquam perdere, possis, nè subito, cum fortè Deus subtraxerit donum, & retraxerit manum, tu animo concidas, & tristior, quàm oportet, fias. Beatus omninò, si omni satagas curâ malorû omniû parentem cavere incuriam. Non te deseret Deus, sed cave, nè à te deferatur Deus. Dedit Deus gratiam; ora ut det etiâ perseverantiâ. Jubet Deus, ut sis de salute certus; non autem jussit, ut sis securus. Pugnandum tibi est fortiter, ut tandem triumphes suaviter. Caro tua intrà te, contrà te pugnat, hostis quo propinquior, eo formadabilior: Mundus circà te, contrà te pugnat, hostis quo copiosior, eo formidabilior: Diabolus suprà te, contrà te pugnat, hostis quo potentior, eo formidabilior. In virtute Dei nè timeas cū  
his



his hostibus cōgredi; in vir tute Dei victoriā poteris consequi. Non autē vinces tantos hostes securitate , sed pugnandi assiduitate. Tempus vitæ, tempus pugne; tunc maximè impugnaris , cum te impugnari nescis; tunc potissimum colligunt vires suas , cum quasdam videntur concedere inducias. Vigilant illi; & tu dormis? Parant se illi ad nocendum; & tu non paras te ad resistendum? Multi deficiunt in via , antequam locus illis detur in patria. Quàm multi Israelitæ in deserto moriebantur, quorum nullus promissam terram consequebatur? Quàm multi spirituales Abrahamæ filii, in vitæ hujus deserto pereunt, antequam promissam cœlestis regni hæreditatem adeant? Nihil efficacius ad excutiendam securitatem , quàm si cogitemus perseverantium raritatem. Tantùm ergò cœlestis gloriæ in nobis sit desiderium , & eò perveniendi amor; tantus sit dolor, quod nondum pervenerimus; tantus sit timor, nè perveniamus; ut nullam sentiamus lætitiā, nisi de his, quæ aut auxilium aut perveniendi spem præstent. Quid juvat in momento gaudere, si in æternum cogaris lugere? Quæ possit esse in hac vita lætitiā, si transit quod delectat , non autem transit quod cruciat? Securi vivimus , quasi horam mortis & judicii transferimus? Dicit Christus, quod ad judicium venturus sit , quā hō-

ra non putamus ; dicit hoc veritas , & altera vice repetit , audi & time. Si venturus est Dominus in ea hora , qua non putamus , metuendum valdè , ne imperati ad judicium accedamus : Si accedimus imparati , quomodo sustinere poterimus severam discussionem hujus judicii ? Nihilominus quod in uno hoc amittitur momento , non poterit reparari in omni sæculo : In unius momenti judicabitur brevitate , quales futuri sumus in omni æternitate : In uno hoc momento Vita & Mors , Damnatio & Salus , Poena & Gloria æterna cuilibet adjudicabitur. O Domine , qui dedisti ad bonum gratiam , da insuper ad bonum perseverantiam.

### MEDITATIO XXX.

De sanctæ vitæ Christi imitatione.

*Sit vitæ regula Christus.*

**S**ancta Christi vita est perfectissima virtutum idea : omnis Christi actio est etiam nostra institutio. Multi volunt Christum consequi , sed detrectant sequi : Volunt Christo frui , sed non & imitari. Disce à me , quia mitis sum , & humilis corde dicit Salvator . Nisi Christi velis esse Discipulus , nunquam eris verus Christianus.  
Non

Non solum Christi passio sit tuum meritum, sed & Christi actio sit vitae tuae exemplum. Dilectus tuus candidus & rubicundus, sis & ipse rubicundus sanguinis Christi asper- sione, & candidus vitae Christi imitatione. Quomodo verò Christum amas, si ipsius sanctam vitam non amas? Si diligitis me, di- cit Salvator, praecepta mea servate. Qui er- go mandata ejus non servat, eum etiam non diligit. Sancta Christi vita est perfecta vitae nostrae regula. Omnibus regulis Francisci aut Benedicti praefenda est unica regula vitae Christi. Si vis esse adoptivus Dei fi- lius, vide quomodo converteretur Filius ille unigenitus. Si vis esse cohaeres Christi, de- bes etiam esse imitator Christi. Qui vivere vult cum vitiis, ille diaboli dedit obsequiis. Qui verò vult esse cum Diabolo, quomodo poterit esse cum Christo? Vitia amare, est Diabolum amare, quia omnia peccata sunt à Diabolo; quomodo ergò poterit esse verus amator Christi, qui est amator Diaboli. De- um amare est sanctam vitam amare, quia à Deo omnis sancta vita; quomodo ergò poterit esse amator Dei, qui non est ama- tor sanctae vitae? Probatio dilectionis est exhibitio operis; veri amoris proprium est amato obsequi, idem cum amato velle, eadem cum amato sentire. Si ergò verè Christum amas, mandatis ejus obsequentem

te præstabis, sanctam vitam cum ipso amabis, & spiritu mentis tuæ renovatus cœlestia cogitabis. Vita æterna est in cognitione Christi: Qui verò Christum non amat, eum etiam non cognoscit: Qui humilitatem, castitatē, mansuetudinem, temperantiā, charitatē non amat, etiam Christum non amat; quia Christi vita nihil aliud erat, quā humilitas, castitas, mansuetudo, temperantia, charitas. Christus dicit, se non nosse eos, qui voluntatem Patris non adimplent. Ergo etiam Christum non norunt, qui voluntatem Patris cœlesti non faciunt. Quæ verò est voluntas patris? Sanctificatio nostra, dicit Apostolus. Non est Christi, qui Spiritum Christi non habet: Ubi verò Spiritus sanctus, ibi etiam cum donis & fructibus suis adest. Qui verò fructus Spiritus? Charitas, gaudium, pax, lenitas, benignitas, bonitas, fides, mansuetudo, temperantia. Sicut super Christum requiescebat sanctus Spiritus; ita etiam requiescit super omnes illos, qui in Christo sunt per veram fidem, quia Sponsa Christi currit in odore unguentorum Christi. Qui Domino adhæret, est unus Spiritus cum eo. Sicut carnalis copula viri & uxoris facit ex eis carnem unam; ita spiritualis conjunctio Christi & fidelis animæ facit ex eis spiritū unū; ubi vero spiritus unus, ibi eadē voluntas: ubi voluntas eadem,

eadem, ibi etiam actiones eadem. Qui ergo vitam suam Christi vitæ non conformat, nec Domino adhærere, nec Spiritum Christi habere convincitur. An non æquum est, ut omnis vita nostra illi conformis reddatur, qui ex amore se totum nobis conformavit? Deus in carne se manifestans, exemplar sanctæ vitæ nobis proposuit, nè quis sanctam vitam detrectans ad carnis confugeret excusationem. Nulla vita jucundior aut tranquillior, quàm Christi vita; quia Christus verus Deus: quid Deo tanquam summo bono jucundius aut tranquillius? Sæculi vita brevem affert lætitiā, sed æternam secum trahit tristitiā. Cui in vita te conformas, ei etiam in resurrectione conformaberis: si Christi vitæ te hic conformare incipis, illi in resurrectione etiam plenius conformaberis: si Diabolo te conformas per flagitia, in resurrectione ei conformaberis per tormenta. Qui me sequi vult, abnegat seipsum dicit Salvator, & tollat crucem suam quotidie. Si in hac vita abnegas teipsum Christus in iudicio agnoscet te pro suo. Si propter Christum proprio honori, proprio amori, propriæ voluntati in hac vita renuncias, Christus in futura, sui honoris, sui amoris, suæ voluntatis compotem te faciet. Si in hac vita particeps es crucis, in futura particeps eris æternæ lucis: Si in hac vita particeps es tribulationis

bulationis, in futura particeps eris consolationis : Si in hac vita particeps es persecutionis, in futura particeps eris largissimæ retributionis. Qui me confitetur in hoc sæculo, inquit Christus, confitebor & ego eum coram Patre cœlesti; Jàm verò non solum doctrinæ professione, sed etiam vitæ conformatione Christum confiteri debemus; ita demùm pro suis nos agnoscet in judicio. Quisquis me negaverit coràm hominibus, negabo & ego eum coram Patre cœlesti. Christus non solum verbis, sed etiam, & multò magis, impiâ vitâ negatur. Qui ergò factis negat Christum in hoc sæculo, eum etiam factis negabit in judicio. Christianus non est, qui veram Christi fidem non habet : Vera autem fides Christo spiritali viti nos inserit tanquam palmites : Omnem palmitem in Christo non ferentem fructum, cœlestis Agricola tollit : qui verò in Christo manet, & in quo Christus per fidem habitat, hic fert fructum multum. Non est palme in vite, qui non trahit succum ex vite; non est anima in Christo perfidem, quæ non spirituales charitatis succum ex Christo trahit per fidem. Conforma nos vitæ tuæ, bone Jesu! in hoc sæculo, ut plenè tibi cõformemur in futuro.

## MEDITATIO XXXI.

De sui abnegatione.

*Ille negat Christum, qui se non abnegat ipsum.*

**Q**ui me sequi vult, seipsum abneget, dicit Salvator. Seipsum abnegare, est proprio suo amori renunciare. Amor proprius amorem Dei prohibet. Si vis esse Christi Discipulus, necesse est, ut radix amoris proprii moriatur in te penitus. Nemo Christum diligit, nisi qui seipsum odit. Nisi granum frumenti lapsum in terram, fuerit mortuum, fructum non affert: ita quoque fructus Spiritus sancti percipere non poteris, nisi in corde tuo moriatur amor proprius. Dicebat Dominus ad Abrahamum: Egredere e terra tua, & e cognitione tua & e domo patris tui, ad terram, quam ostendam tibi. Non poterat Abraham tantus fieri Propheta, nisi prius egrederetur ex sua patria: Non eris prius verus Christi discipulus, & verè spiritualis homo, antequam ab amore discedas proprio. Jacob ex contactu Angeli uno pede claudicabat, altero sano & integro: Per duos hos pedes duplex amor intelligitur, proprius & divinus. Tunc homo particeps erit divinæ benedictionis, cum pede amoris proprii claudicabit;

altero illo amoris Dei manente sano & integro. Fieri non potest, ut uno eodemque oculo cœlum intuearis & terram; ita fieri nequit, ut unâ eadêmque voluntate seipsum inordinatè quis amet ac Deum. Amor est summum animæ nostræ bonum; tribuendum; ergò hoc summum animæ bonum, summo bono, scilicet Deo. Amor tuus, Deus tuus, id est, quicquid summè amas, id in Dei locum collocas, quicquid summè amas, id summum esse judicas; Deus autem verè est summum Ens: Qui ergò seipsum amat, seipsum Deus judicat, & in locum Dei collocat; quæ est omninò maxima idololatria. Quod summè amas, hoc rerum omnium finem æstimas, & desideriorum tuorum ultimum complementum judicas: solus autem Deus est principium & finis creaturarum; ipse est primus & novissimus; ipse solus implet desiderium cordis nostri, & nihil quicquam creati tua potest satiare desideria; amorem ergò Dei præferre debes amoris proprio. Deus est principium & finis: In illo ergò debet amor noster incipere, in illo etiam debet desinere. Dei essentia est extrâ omnes creaturas, sicut ab æterno fuit Deus in seipso: Ab omnibus ergò creaturis amorem tuum abstrahas. Qualis amor tuus, talia etiam opera tua. Si opera tua procedunt ex vera fide & Dei amore, Deo sunt grata, & coràm



coram oculis ejus magna, licet coram omnium hominum oculis sint parva: Si procedunt ex amore proprio, nunquam poterunt placere Deo. Amor proprius præstantissima quæque opera contaminat. Cum esset Christus in domo Simonis, mulier quædam unguenti pretiosi vas confringit, & caput Christi inungit; apparet opus parvum; nihilo minus Christo erat gratum, quia procedebat ex fide vera, charitate pura, contritione seria. Sacrificium erat opus Deo gratum in V. T. Interim tamen Deo non placebat, quod Saul prædam Amalecitarum ad offerenda Deo sacrificia segregabat: quare? quia hoc non procedebat ex amore Dei. Si enim verè Deum dilexisset, mandatum Dei de omnibus prædis exurendis non contempsisset; seipsum diligebat, & suam devotionem. Amor est quidam ignis: ita enim orat Ecclesia; Veni sancte Spiritus, & tui amoris ignem accende in fidelibus. Ignis non hæret in terra fixus, sed semper tendit sursum: sic amor tuus non debet in te quiescere, sed sursum ad Dominum se debet elevare. Seipsum abnegare, est insuper honori suo renunciare. Summo bono soli debetur sumus honor: Deus summum bonum est. Qui suam quærit gloriam, non potest Dei gloriam quærere: Sicut Salvator dicebat ad Phariseos. Quomodo potestis credere, qui

qui gloriam ab invicem accipitis? Christi exemplum intueri & sequere. Sæpius de se testatur, quod non quærat suam gloriam, quod non accipiat honorem ab hominibus, quod sit ex corde humilis. Omnia tua dona à Deo accipis; omnia ergò Deo vicissim tribuas: omnes bonorum rivuli ab hoc fonte bonitatis divinæ procedunt, omnia ergò bona vicissim in hoc mare transferenda. Herbæ, quæ solsequia dicuntur, semper convertunt se ad solem; à quo vitam & succum hauriunt: Sic & omnibus tuis donis & omni tuo honore ad Deum te converte, & nihil quicquam tibi tribue. Si aliquid à teipso habes, honorem tuum quærere, & tibi ipsi tua dona tribuere potes; sed quia nihil habes à teipso; omnia verò à Deo, ideò non tuum, sed Dei honorem quærere debes. Proprius honor avertit hominem à Deo. Exemplum est in Nabuchadnezzar, qui dicebat. Hac est illa Babylon, quam ædificavi in domum regni, in robore fortitudinis meæ, & in gloriam decoris mei. Sed quid sequitur; Adhuc sermo erat in ore Regis, & vox è cælo ruit; tibi dico, Nebuchadnezzar, regnum transivit à te; ab hominibus te ejicient, & cum bestiis agri erit habitatio tua. Sic si ex proprio honore & superbia spirituales tuas Babilonem, id est, operum bonorum structuram æstimas, & gloriam eorum tibi tribuis

tribuis, & non soli Deo, abjiceris à conspectu Dei. Seipsum denique abnegare, est, propriæ voluntati renunciare. Optimæ voluntati semper parendum, Dei autem voluntas semper est optima: Illius voluntati parendum, à quo omnia nostra habemus; **A** Deo autem omnia ad nos deveniunt: Illius voluntati parendum, qui nos semper ad vitam & ad bonum deducit; Dei voluntas semper ducit ad vitam & bonum. Delectare in Domino, & ipse dabit tibi petitiones cordis tui. Propria voluntas ad mortem & damnationem nos deducit. Per quid primus noster parens ex Dei gratia & statu salutis in æternam damnationem prolapsus est? Seposita Dei voluntate propriam sequebatur voluntatem: præceptum Domini negligebat, & suasionem diaboli audiebat. Verus ergò Christi discipulus propriæ voluntati renunciat; & divinam voluntatem sequi desiderat. Aspice Christum, is in agone passionis constitutus, propriam voluntatem, tanquam gratissimum sacrificium, Deo offert: Offeras & tu propriam Deo voluntatem; & sic perficies eam, quam Christus requirit, tui abnegationem. O Domine, tua sancta voluntas fiat, sicut in cœlo, ita & in terra.

## MEDITATIO XXXII.

De vera quiete animæ.

*Domino mens nixa quieta est.*

**I**N transitoriis & mundanis rebus quietem suam anima sæpè quærit, sed non invenit: quare? quia anima omnibus creaturis dignior. Non ergò potest in illis vilioribus quietem & pacem invenire. Omnia mundana fugacia sunt & transitoria; anima autem immortalis: Quomodò ergò veram quietem in illis inveniret? Omnia illa terrena sunt; anima autem nostra cœlestis est originis: quomodò ergò illis desiderium suum explere posset? In Christo requiem invenit, ille potest satiare & explere desiderium illius. Contra irâ Dei, quiescit in vulneribus Christi: contra accusationes Satanæ, in potentia Christi: contra terrorem legis, in prædicatione Christi: contra peccata accusantia, in sanguine Christi, qui meliùs coràm Deo loquitur, quàm sanguis Abel: contra mortis terrorem, in sessione Christi ad dextram Patris acquiescit & confidit. Atque ita fides nostra quietem invenit in Christo; sed & charitas nostra summam quietem tibi invenit. Qui amore rebus terrenis inhæret, non habet veram quietem, quia ipsæ res terrenæ eam non habent: non possunt plenè appetitum animæ satiare, quia omnia finita sunt; anima  
autem

autem nostra ad imaginem Dei facta, infinitum illud bonū, in quo omnia bona sunt, appetit. Ut ergo fides nostra nulli ex omnibus creaturis inniti debet; sed soli Christi merito: Ita quoque amor noster nulli creaturæ adhærere debet, imò nec nobis ipsis. Nam proprius amor itidem amorem Dei impedit: Omnibus debemus amorem Dei præferre. Anima nostra Sponsa Christi est; huic ergo uni adhærere debet: Anima nostra Dei habitaculum; huic ergo soli locum dare debet. Multi quærunt in divitiis quietem; sed extra Christum nulla animæ quies: Ubi autem Christus, ibi paupertas, si non actu, tamen affectu. Non habebat ille cæli & terræ Dominus, quo caput reclinaret; sicque paupertatem nobis commendare & consecrare voluit. Divitiæ sunt extra nos; at, quod animam quietam reddere debet, illud internum esse oportet: Cui verò in morte adhærebit anima, quando omnia in mundo relinquenda? Aut nos divitiæ deserunt, aut nosmet illas; sæpius in vita, semper autem in morte. Ubi ergo tunc pacem & quietem inveniet anima? Multi in voluptatibus quærunt quietem, sed corporis hæc aliquando quies & delectatio esse potest, non autem animæ. Tandem sequitur comes, dolor & luctus. Voluptates ad hanc vitam spectant; anima autem non est creata hujus vitæ gratiâ, quia  
per

per mortem exire compellitur : quomodo ergò in voluptatibus quietem invenire possit . Extra Christum non est animæ quies : Qualis autem erat vita Christi ? Summus dolor à primo nativitatis tempore usque ad mortem . Sic ille verus rerum æstimator docere nos voluit , de voluptate quid nobis sentiendum sit . Multi in honoribus quærunt quietem : Miseri verò , qui ad quamlibet popularis auræ mutationem quiete carere coguntur . Honor est exterius & fugacissimum bonum ; quod autam quietem animæ largire debet , id in nobis esse oportet . Quid de humana laude & gloria plus referes , quam Apellis pictura laudata ? Considera angulum , in quo latitas : quanta ejus proportio ad totam provinciam ! ad Europam ! ad totum orbem habitalem ! Ille demum verus honor , qui à Deo electis olim obringeret . Quies rei est in ipsius fine ; nec quiescit res naturaliter , nisi postquam finem & locum suum adepta est . Finis creatæ animæ Deus est ; facta siquidem est ad Dei imaginem . Ergò non potest esse quieta & pacata , nisi in illo suo fine , scilicet in Deo . Ut corporis vita anima ; ita animæ vita Deus . Sicut ergò verè vivit anima , in qua , spiritali gratia , Deus habitat ; ita mortua est anima , quæ Deum inhabitantem non habet :  
quæ

quæ verò potest quies esse mortuæ animæ ?  
Prima ista mors in peccatis necessariò trahit secundam mortem damnationis. Qui proinde amore suo firmitè adhæret Deo, & interiùs divinâ consolatione fruitur; illius quietem exteriora mala perturbare non possunt: In rebus tristibus lætus est, in paupertate dives, in tribulationibus sæculi securus, in turbis mundanis tranquillus, in conviciis & hominum contumeliis pacatus, in ipsa morte vivus. Non curat Tyrannorum minas, quia interiùs sentit divinæ consolationis divitias. In adversis non tristatur, quia sanctus Spiritus efficacitè eum interiùs consolatur. Non angitur in paupertate, quia dives est in Dei bonitate. Non turbatur hominum contumeliis, quia divini honoris fruitur delitiis. Non curat carnis voluptatem, quia magis gratam habet Spiritûs suavitatem. Non quærit amicitias mundanas, quia Dei sibi propitii ac amici sentit delitias. Non inhiat thesauris terrenis, quia summum thesaurum habet reconditum in cœlis. Mortem non metuit, quia in Deo semper vivit. Non desiderat magnoperè sapientiam mundanam, quia habet interiùs docentem sanctum Spiritum. Perfectum tollit imperfectius. Non timet fulgura & tempestates, incendia & aquarum vastitates, tristes planetarum configurationes, & luminarium cœlestium obscuraciones,

scurationes , quia supra Naturam evectus, in Christo fide recumbit , in Christo vivit. Non abstrahitur blanditiis sæculi , quia audit in se suaviorem vocem Christi. Non timet Diaboli potentiam, quia divinam sentit indulgentiam . Fortior est qui in ipso vivit & vincit, quam Diabolus , qui vincere eum frustra satagit . Non sequitur carnis illecebras, quia in spiritu vivens, spiritus sentit delicias: mortificat & crucifigit carnem Spiritus vivificatio . Non metuit diabolum accusatorem , quia Christum novit esse suum intercessorem. Hanc veram quietem animæ nostræ velit concedere autor & dator illius unicus . Dominus noster , Deus in secula benedictus.

---

### MEDITATIO XXXIII.

De conscientia puritate.

*Mens recti conscia , vita est.*

**I**N omni tuo opere maximam curam habet conscientia. Si instigat te Diabolus ad quendam peccatum, internum conscientia reverere judicium. Si times in aliorum hominum peccare præsentia, multò magis , à peccato revocet te propria conscientia; Internum testimonium , efficacius est , quam externum : Quamvis ergò peccata tua fugiant omnium hominum accusationē , nunquam tamen effugere poteris internam conscientia testificationem. Conscientia erit inter



libros illos, quos Apocalypsis testatur in judicio olim aperiendos. Primus liber est divinae omniscientiae, in quo manifestè relucebunt omnium omninò hominum facta, verba, cogitata. Secundus liber est Christus, qui est vitae liber: in hoc qui scriptus invenietur per veram fidem, is ab Angelis deducetur in curiam coelestem. Tertius liber est Scriptura, juxta cujus præscriptum judicabuntur fides & nostra opera: Sermo, quem locutus sum, dicit Salvator, judicabit eos in die novissimo. Quartus liber continet externa testimonia pauperum, qui in die judicii recipient nos in æternum tabernaculum. Quintus liber continet internum testimonium conscientiae, quia conscientia est codex, in quo omnia conscribuntur peccata: Granda volumen conscientia, cui omnia stylo veritatis inscripta: Non poterunt damnati negare peccata sua judicio, quia propriae conscientiae convincentur testimonio: Non poterunt fugere à peccatorum accusatione, quia tribunal conscientiae internum est & domesticum. Conscientia pura est speculum animae clarissimum, in quo se intuetur, & Deum veri luminis splendorem sordens acies videri nequit. Hinc dicit Salvator; Beati mundi corde, quia Deum videbunt. Sicut pulchra & munda facies hominis aspectui grata: ita pura & munda conscientia coram

ram

ram oculis Dei accepta ; sed putrifacta conscientia vermes progignit immortales . In præfenti igitur conscientia vermis sentiendus, & suffocandus, non autem in immortalitatem fovendus. Ad hunc librum emendandum omnes alii inventi sunt. Quid prodest magna scientia , si adsit immunda conscientia? non ex scientia sed conscientia libro judicaberis aliquando coram Dei throno . Si hunc librum rectè vis scribere , scribe eum secundum exemplar libri vitæ : Liber vitæ Christus est: ad normam doctrinae Christi conformetur professio tuae fidei : ad normam vitæ Christi conformetur vitæ tuæ ductus. Bona erit conscientia , si habeat in corde puritatem , in ore veritatem, in actione honestatem. Conscientia pro lucerna utere in omnibus actionibus; ea enim, quæ in vita bonæ sint actiones, quæ malæ, ostendet penitus. Fuge hoc conscientia judicium , in quo idem simul reus , actor, testis, judex, torcor, carcer , flagellum, executor , carnifex. Quodnam hic possit effugium , ubi ipsa testis est, quæ accusat , & nihil potest esse occultum ei qui judicat ? Quid prodest, si omnes te laudent , & conscientia accuset ? Quid obesse poterit , si omnes derogent , & sola conscientia defendat ? Solus hic judex unicuique ad accusandum , ad judicandum , ad damnandum

damnandum sufficit : Incorruptus hic iudex , nec flecti potest precibus , nec corrumpi muneribus. Quocunque vadis , ubicunque es , semper conscientia tua tecum est , secum portans quicquid in ea posuisti , sive bonum sive malum : Servat hæc vivo & restituit defuncto depositum , quod accipit servandum : Sic verè inimici hominis domestici ejus , sic in domo propria , & à propria familia habes accusatores , observatores , & tortores . Quid prodest vivere in copia omnis abundantiae , & torqueri flagello conscientiae ? Fons humanæ felicitatis & miseriæ in ipso animo est. Quid prodest febribus æstuanti in aureo collocari lecto ? Quid prodest conscientiae facibus agitato externæ felicitatis lætari cumulo ? Quanta cura est salutis æternæ , tanta etiam cura sit conscientiae : Amissa enim bona conscientia amittitur fides , amissa fide amittitur Dei gratia ; amissa Dei gratia , quomodo potest sperari vita æterna ? Quale est conscientiae tuæ testimonium , tale expectabis à Christo iudicium : Peccatores nullo arguente , vel in medium quippiam afferente , ipsi sui ipsorum acculatores fient . Sicut ebrius , quando multum vini ingurgitat , nullum sentit à vino damnum ; postea autem , è sopore excitatus ebrietatis sentit incommodum : Iter &

& peccatum, donec consumetur, obtenebrat mentem, & quasi densa nubes, veri judicii splendorem obfuscat; postea demum insurgit conscientia, & quovis accusatore gravius arrodit. Ita sunt judicia; judicium mundi, judicium tui & judicium Dei. Ut autem non potes effugere judicium Dei: Ita etiam non poteris effugere judicium tui, licet aliquando effugias judicium mundi: Nulli obsistunt parietes, quo minus hic testis videat tuas actiones: Quæ te poterit defendere accusatio, quando damnat internam accusatio? Tranquilitas conscientiae initium est vitæ æternæ. Verius & jucundius gaudebis de bona conscientia inter angustias, quam de mala inter delitias: Contrà omnem malevolorum obrectationem confidenter obvertere poteris conscientiae excusationem. Te interroga de te, quia te longè nosti melius, quàm ullus homo alius. In extremo judicio quid proderunt aliorum falsæ laudes? Quid oberunt aliorum falsæ obrectationes? Dei & tuo stabis aut cades judicio? non aliorum stabis aut cades testimonio. Nunquam finitur conscientia, quemadmodum nunquam finitur anima. Tamdiu prement damnatos infernales pœnæ, quamdiù durabit accusatio conscientiae. Nullus exterior ignis tantoperè corpus affligit, quàm graviter hæc interior flamma animam adurit.

rit. Aeterna est anima, quæ uritur; æternæ conscientiae ignis, qui urit. Nulla exteriora flagella corpori tam sunt molesta, quam gravia sunt animæ hæc interiora verbera. Fuge ergò peccati reatum, ut conscientiae effugias cruciatum: Dele per veram poenitentiam peccata ex libro conscientiae, nè in iudicio ea legantur, & metuenda tibi sit vox divinæ sententiae. Extingue verem conscientiae per devotionis fervorem, nè morsus ejus æternum tibi pariat horrorem: Extingue hunc interiorem ignem per lachrymas, ut ad cœlestis refrigerii pervenias delicias. O Domine, da, ut militemus bonam militiam, retinentes fidem ac bonam conscientiam, ut tandem solvi & incolumes perveniamus ad cœlestem patriam.

---

MEDITATIO XXXIV.

De studio veræ humilitatis.

*Quid homo? quid bulla? Nihil sunt.*

**C**Ogita, ô fidelis anima, miseram hominis conditionem, & facile effugies omnem superbiae tentationem. Homo vilis ingressu, miser in progressu, flebilis in egressu. Impugnatur à Dæmonibus, laceffitur tentationibus, allicitur delectationibus, de jicitur tribulationibus, implicatur criminibus, denudatus est virtutibus, irretitur malis consuetudinibus. Unde ergò superbis, terra & cinis?

Quid

Quid fuisti antè ortum? Sperma foetidum.  
Quid in vita? Saccus stercorum. Quid  
post mortem? Cibus vermium: Si quid in  
te boni, id tuum non est, sed Dei: nihil tu-  
um est, nisi peccata, nihil ergò arroges  
tibi ex his, quæ in te sunt, præter  
peccata tua. Fatuus & infidelis est  
servus, qui de bonis Domini sui vult su-  
perbire. Vide, ô homo, exemplum Chri-  
sti: famulatur ipsi omnis gloria cælorum,  
imò ipse solus est vera gloria; & tamen om-  
nem mundanam à se abjicit gloriam. Cla-  
mat is adhuc: Discite à me, quia mittis-  
sum, & humilis corde. Verus Christi a-  
mator, qui etiam Christi imitator. Cui  
Christus charus est, huic etiam ipsius humi-  
litas chara est. Erubescat & confundatur  
superbiens servus, quando ita humilis est  
cælorum Dominus. Dicit de sese Salvator  
noster, quod sit lilium convallium; scilicet  
quia ipse, qui nobilissimus flos, nascitur &  
conservatur, non in montibus, id est, su-  
perbis & elatis cordibus, sed in humilioribus  
vallibus, id est, contritis & humilibus pio-  
rum mentibus: Verè enim anima humilis,  
est sessio & delectabile cubile Christi, ut di-  
cit quidam sanctus. Vera gratia non extol-  
lit, sed humiliat; nondum ergò particeps  
veræ gratiæ, qui non ambulat in cordis hu-  
militate. Fluente divinæ gratiæ deorsum,  
non

non sursum fluunt. Ut aquæ per naturam non quærunt loca sublimia: Ita gratia divina non fluit, nisi ad corda humilia. Dicit Psalmus: Dominus in altis habitat, & humilia respicit in Cœlo & in terra. Verè hoc mirabile est, quod ad summum & altissimum Deum non nisi humilitate appropinquimus. Qui sibi vliis, Deo magnus: Qui sibi displicet, Deo placet. Ex nihilo fecit Deus cœlum & terram: Ut fuit in creatione, ita adhuc est in hominis reparatione. Creat Deus ex nihilo, reparat ex nihilo. Ut ergò particeps fias regenerationis & reparationis, sis nihil in oculis tuis, id est, nihil tibi tribuas, nihil arroges. Omnes sumus infirmi & fragiles; te autem judica fragiliorem neminem. Non nocet, si omnibus te inferiorem judices, & per humilitatem omnibus supponas; sed plurimum nocet; si vel uni te præponas; Viginti quatuor seniores; id est, tota triumphans Ecclesia, abjicit coronas ante thronum; omnem justitiam & gloriam Deo tribuit; quid ergo faciat vilis peccator? Seraphin, sancti Angeli, velât facies suas in aspectu majestatis divinæ: quid faciat homo tā vilis creatura, & creatori suo tot modis ingrata? Christus verus & unigenitus Dei Filius ex admiranda humilitate descendit de cœlo, & fragilem nostram naturam in se suscepit; demisit se

in carnem, in mortem, in crucem. Quid faciat homo, qui per peccata tam longè recessit à Deo? Vide, ô fidelis anima, quam stupendâ humilitate superbiâ nostram Christus sanaverit; & tu adhuc superbire cupis? Per humilitatis & passionis vitam Christus ingressus est in gloriam; & tu in superbiæ via incedens, ad cœlestem gloriam pervenire te posse statuis? Diabolus propter superbiam ex cœlesti regno expulsus; & tu, cum cœlesti gloria nondû erueris, per superbiæ viam eò contendis? Adamus propter superbiam ex Paradiso ejectus: & tu ad cœlestem Paradisum per superbiæ viam pervenire cupis? Optemus potius servire & lavare pedes aliorum cum Christo, quam digniorem locum ambire cum Diabolo: humiliemur in hac vita, ut exaltemur in futura. Non quid habeas, sed quid tibi desit, ô fidelis anima, sēper cogita: magis dole de virtutibus, quas non habes, quam quod gloriari velis de virtutibus, quas habes. Virtutes cela, peccata manifesta: valde enim metuendum est, nè si thesaurum operum bonorum manifestes per gloriam, Diabolus tibi eum deprædetur per superbiam. Ignis optimè servatur, si cinere regatur: ita ignis charitatis nunquam securius custoditur, quam cum cineribus humilitatis sepelitur. Superbia est omnium peccatorum semen; caveas ergò extolli, nè contingat



gat te in abyſſum peccatorum præcipitari. Superbia eſt gratum cubile Diaboli: caveas ergò extolli, nè contingat miſeram tuam animam à Diabolo ſubjugari. Superbia eſt ventus urens & exſiccans divinæ gratiæ fontem: caveas ergò extolli, nè contingat à divina gratia ſeparari. Sana, ô Chriſte, tumorem ſuperbiæ noſtræ: ſancta tua humilitas ſit nobis vitæ noſtræ meritum: ſit etiam vitæ noſtræ exemplum: fides noſtra humilitatem tuam firmitèr amplectatur, & vita noſtra eandem conſtantèr ſequatur.

---

### MEDITATIO XXXV.

De Avaritia fugienda.

*Quis verè pauper? Avarus.*

**Q**uam gratus eſt ſalus animæ, tam odioſum eſſe debet peccatum avaritiæ. Avarus omnium pauperiſſimus eſt; quia tam de eſt illi quod habet, quàm quod non habet. Avarus eſt omnium afflictiſſimus; quia in neminem bonus eſt, in ſe autem peſſimus. Initium omnis peccati ſuperbia; radix malorum omnium avaritia: illa per averſionem à Deo: hæc per converſionem ad creaturas. Pariunt divitiæ ſudorem in acquirendo, creant timorem in poſſidendo, pariunt dolorem in amittendo, &, quod pejus eſt, avarorū labor non ſolùm periturus, ſed etiam peremptorius; aut divitiæ te deſerunt, aut tu illas. Si ergò ſperas

in divitiis ; quæ erit spes tua in hora mortis ? Quomodo animam tuam Deo credes , si corporis tui curam ei non credis ? Omnipotenti Deo curæ es ; quare dubitas , ne sustentare te possit ? Sapientissimo Deo curæ es ? quare ambigis , quomodo sustentare velit ? Largissimo Deo curæ es ; quare dubitas , an sustentare te velit ? Habes syngrapham Christi , universorum in cælo ac terra Domini , nihil eorum , quæ opus sunt homini , defuturum iis , qui quærent regnum Dei : Confide huic Christi promisso ; non faller. Est enim veritas . Avaritia est summa idololatriæ , quæ creaturas in locum Dei collocat : Avarus fiduciam Deo debitam ad creaturas transfert . Quicquid plus diligitur quam Deus , id Deo præfertur : quicquid Deo præfertur , in Locum Dei collocatur . Esau jus primogenituræ vendebat edulio ! Ita multi hæreditatem regni cœlestis à Christo paratam , amittunt pro acquirendis temporalibus bonis . Judas Christum vendidit trigenta argenteis . Avari gratiam Christi pro temporalibus vendunt divitiis . Quomodo potest aspirare ad regnum cœlorum plenus quotidie siliquis porcorum ? Quomodo potest ad Deum cordis elevatione contendere , qui animæ quietem in divitiis studet invenire ? Divitiæ sunt spinæ , dicit Veritas :  
Qui

Qui ergò amat divitias, is verè amat spinas. O spinæ, quam multas suffocatis animas! Spinæ impediunt seminis proventum: Ita divitiarum sollicitudo spirituales verbi impedit fructum. Spinæ corpus puncturis affligunt: ita divitiæ animum curis angunt. Periturus es, si perituros solùm colligis thesauros: Qui in terris thesauros congregant, similes sunt iis, qui fruges suas in imis & humidis locis recondunt, non animadvertentes, fore, uti quam citissimè putrescunt. Quam stolidi sunt, qui in divitiis finem desideriorum suorum collocant! Quomodo res corporalis animam, quæ spiritus est, implere possit, cum potius spiritualis natura, virtute propria, sic comprehendat corporalia, ut nulla quantitate distendatur? Anima ad æternitatem creata; injuriam ei facis, si desideriorum ejus finem temporalibus & momentaneis constituis. Anima quo magis ad Deum elevatur, eo magis ab amore divitiarum abstrahitur. Omnia animalia, quo cœlestibus viciniora sunt, eo minus capiunt & congregant inferiora: sicut volatilia cœli nec merunt. Magnum est indicium, quod anima cogitet cœlestia, si parvi æstimat & contemnit terrestria. Mures & reptilia congerunt in cavernas; deteriores enim conditionis sunt & ignobilioris naturæ quàm aves. Magnum signum, quod ani-

ma à Deo averſa, & terrenis affixa, ſi divitiis inordinato amore adhæret. Animam tibi dedit Deus, & tu carnis curam ei non concredis? volucres cœli paſcit Deus, & tu dubitas, an velit te ſuſtentare, cum ſis ad imaginem ipſius creatus? Lilia agri veſtit Deus; & tu dubitas, an proſpecturus ſit tibi de veſtibus? Pudeat, non poſſe efficere fidem & rationem in homine, quod naturalis inſtinctus efficit in volucre: nec ſerunt, nec metunt volucres, ſed corpuſculi ſui curam Deo committunt. Avari verbis Dei fidem non adhibent, antequam ſibi metiſſis de ſuſtentatione proſpiciant. Avarus eſt injuſtiſſimus: Quare? Quia nihil ſecum in mundum intulit; & tamen ita de bonis terrenis eſt ſolicitus, ac ſi plurima omninò ex mundo ſecum auferre velit. Avarus eſt ingratiſſimus: Quare? Quia multis Dei fruitur bonis, & nunquam ad bonorum datorem cordis fiducia evahitur. Avarus eſt ſtolidiſſimus: Quare? Quia relinquit verum bonum, ſine quo nihil verè bonum, & adhæret ei, quod ſine Dei gratia non eſt bonum. Qui terrenorū obſtringitur amore, non poſſidet, ſed poſſidetur ipſe. Avaritia nec copiâ nec inopiâ extinguitur: Inopiâ ideò non minuitur, quia habendi creſcit deſiderium, quâdo obtineri nequit, quod diù eſt deſideratū: Copiâ ideò non minuitur, quia avarus, quâto magis acquirit, tanto amplius quærit; quâdo

do acquiritur, quod ab avaritia desiderabatur, simul nova desiderandi materia subministratur; & sic more ignis, cum ligna, quæ consumit, exceperit, accrescit. Avaritia torrens est in principio parvus, sed postea in immensum crescit: præfige ergo divitiarum cupiditati terminum, nè cupiditas ista ad æternum te trahat exitium. Multi in hac vita devorant, quod postea apud inferos digerant: multi, dum sitiunt lucrum, ad præsentissimũ currunt interitum. Hæc cogitans, devota anima, quantum potes, fuge ab avaritia: Nihil de bonis ad iudicium tecum feres, nisi pauperibus peritura & caduca tua bona, pro quibus Christus vitam dare non recusavit, reliqueris. Da pauperi, ut des tibi: quicquid pauperi non dederis, habebit alter. Nimis est avarus, cui non sufficit dominus: Nondũ verè sperat cœlestia, qui magni æstimat bona terrestria. Quomodo pro fratre poneret animam, qui fratri potenti denegat temporalem substantiam? Thesaurus cœli est manus pauperis; quod ea suscipit, nè in terra pareat, in cœlo ponit. Vis gratum Christo præstare officium? Exhibe pauperi beneficium. Membris quod beneficit, id tanquam sibi factum caput accipit. Dicit tibi Christus, da mihi de eo, quod dedi de meo; fac bonum de bono, ut acquiras tibi bonum; largire terrena, ut ea serves: quia ea parcè nimis servando

amitte. Audi Christum monentem, ne cogaris in judicio eum audire dicentem, Ite in æternum igne maledicti, quia non cibastis me, quando esurivi. Sanctum semen Eleemosyna, prout parvè vel largè sparsum, messis erit vel parca vel copiosa. Si vis esse in numero ovium, exhibe etiam ovibus beneficium. Terreant te hœdi ad sinistram constituti, non quia rapuerunt, sed quia non paverunt. Inclina ô Deus, cor nostrum ad testimonia tua, & non ad avaritiam.

### MEDITATIO XXXVI.

De proprietatibus veræ charitatis.

*Sanctos dilectio signat.*

**V**era & sincera charitas est constans piorum proprietas. Nullus Christianus sine fide, nulla fides sine charitate: ubi non est charitatis splendor, ibi etiam non est fidei fervor. Remove lucem à Sole, & remove-re poteris charitatem à fide. Charitas est actus exterior interioris vitæ hominis Christiani. Corpus mortuum est sine respiratione: ita fides mortua est sine dilectione. Non est Christi, qui non habet Spiritum Christi; non habet Christi Spiritum, qui non exerit charitatis donum, quia fructus Spiritus est charitas: Arbor bona non cognoscitur, nisi ea fructus proferre bonos perspicitur. Charitas vinculum est Christianæ perfectionis

perfectiōis, sicut corporis membra per spiritum, id est, animam, conjunguntur: ita vera corporis mystici membra per Spiritum Sanctum charitatis vinculo uniuntur. In templo Solomonis omnia auro obducta erant intus & exterius: sic in spirituali Dei templo charitate omnia ornata sint intus & exterius: charitas moveat cor ad compatiendum, charitas manum moveat ad elargiendum; non sufficit compassio, si non accedat exterior elargitio; nec sufficit elargitio exterior, si non accedat compassio interior. Omnia accipit fides à Deo; charitas vicissim omnia sua donat proximo: Per fidem divinæ naturæ consortes reddimur; Deus autem charitas est. Ubi ergo non se exerit charitas exterius, nemo credat, quod adsit fides interius. Nemo in Christum credit, qui non Christum diligit: nemo diligit Christum, nisi qui etiam diligit suum proximum. Non dum vera cordis fiducia apprehendit Christi beneficiū, qui proximo debitum denegat officium. Non est verè opus bonum, quod non procedit ex fide; nec est verè opus bonū quod non procedit ex charitate: charitas enim semen est omnium virtutum: non est bonus fructus, nisi qui de radice charitatis exsurgit. Charitas est spiritualis gustus animæ; huic enim soli sapit omne bonum, omne ar-

duum, omne adversum, omne laboriosum :  
charitatis gustus etiam mortem facit suavissi-  
simam, quia fortis, ut mors, dilectio; imò for-  
tior quam mors; quia charitas Christum de-  
duxit ad mortem, charitas etiam verè pios,  
ut pro Christo mori non dubitent, excitat.  
Omnia Dei opera procedunt ex charitate,  
etiam poenæ ipsæ: Sic omnia opera Chri-  
stiani hominis ex charitate procedant. In om-  
nibus creaturis proposuit nobis Deus specu-  
lum charitatis. Sol & sidera non sibi, sed no-  
bis lucent. Herbæ, non seipsas, sed corpora  
nostra purgant. Aër, aqua, bruta, & omnes  
creaturæ, homini inserviunt. Ita quoque te-  
ipsum totum exhibeas proximi ministerio.  
Non profunt linguæ sine charitate, lingua-  
rum cognitio inflat, charitas, autem edificat.  
Non prodest scientia mysteriorum sine cha-  
ritate, quia etiam Diabolo nota sunt myste-  
ria, charitas autem soliùs verè pii propria.  
Fides etiam montes transferens non prodest  
sine charitate, quia talis fides est solùm mira-  
culosa, non salyifica. Charitas dono miracula  
faciendi præstat, quia illa verorum Christi-  
anorum indubitata nota, hoc impiis inter-  
dum conceditur. Non prodest omnes facul-  
tates pauperibus distribuere, si non adsit  
charitas, quia hypocritica est actio exterior,  
si non adsit charitas interior. Non profunt  
rivi beneficentiæ, si non oriantur ex chari-  
tatis



tatis fonte. Charitas patiens est; quia nemo facile irascitur ei quem verè diligit. Charitas benigna est; qui enim cor suum, bonum animæ suæ, donavit per charitatem, quomodo minora bona exteriora negaret? Charitas non æmulatur; quia alterius bona aspicit tanquam sua. Charitas non agit perperam; quia nemo facile eum lædit, quem verè & ex animo diligit. Charitas non inflatur; quia per charitatem unius corporis membra reddimur; membrum autem unum alteri se non præfert. Charitas non gerit se indecèter; quia irati proprium est indecèter se gerere; charitas autem iræ frenum est. Charitas non quærit quæ sua sunt, quia quod quis amat, sibi ipsi præfert, ejusque commoda magis quærit, quam sua. Charitas non irritatur; quia ex superbia omnis ira: charitas autem infra alios se abjicit. Charitas non cogitat malum; quia, cui quis malum struere cognoscitur, eum nondum verè diligere convincitur. Charitas non gaudet super injustitia; quia charitas aliorum miseriam facit suam, omnia suffert, omnia credit, omnia sperat, omnia sustinet charitas. Quod enim sibi præstari charitas exoptat, id aliis præstare non recusat. Cessabunt linguæ, evacuabuntur prophetiæ, destruentur scientiæ: non cessabit charitas; sed ejus imperfectio in futura vita complebitur, & ejus perfectio in futura

vita

vita augebitur. Duo altaria constituti Deus jussit in tabernaculo : ignis ab exteriori transferebatur ad interius : duplicem Ecclesiam Deus congregavit, militantem & triumphantem, ignis charitatis à militante olim transferetur ad triumphantem. Hæc cogitans, devota anima, sanctæ stude charitati. Proximus quisquis sit, is tamen est, pro quo Christus mori voluit : quare ergo proximo denegas charitatem impendere, cum Christus non dubitaverit vitam pro eo impendere? Si verè Deum diligis, etiam imaginem ipsius diligere debes. Unum spirituale corpus omnes sumus: sit ergo omnium una spiritualis anima: iniquum est, ut dissideant in terris, qui aliquando unà victuri sunt in cœlis: dum mentes consentiunt in Christo, voluntates etiam conjunctæ sunt: unus Dominus, servi sumus; dissidere invicem non est æquum: mortuū est corporis membrum, quod alterius non sentit affectum: non se verum mystici corporis Christi membrū æstimet qui alteri patienti non condolet. Unus omnium Pater Deus, quem à Christo edoctus, quotidie Patrem compellas; quomodo iste te verum agnoscat filium, nisi vicissim ipsius filios pro fratribus agnoscas? Hominem tibi à Deo commendatum, si dignus est, ama, quia dignus est, quem ames; si indignus, ama idcirco, quia Deus dignus cui pareas :

pareas. Per amorem hominis inimici amicus ostenderis Dei: non attende, quid faciat tibi homo, sed attende, quid tu faceris Deo: Non attende injurias, quas infert inimicus, sed attende beneficia, quæ cōfert tibi is, qui jubet, ut inimicum diligas. Proximi sumus conditione terrenæ nativitatis, & fratres spe cœlestis hæreditatis: diligamus ergo invicem. Accende in nobis, ô Deus, charitatis ignem per Spiritum tuum.

---

### MEDITATIO XXXVII.

De studio castitatis.

*Christi, mens casta, cubile.*

**Q**ui vult esse verus discipulus Christi; sanctæ studere debet castitati. Casta & pura mens est benignissimus Deus; hunc castis invocare debes precibus. Dixit quidam Sapiens, quod corporis castimonia & animæ sanctimonia sint duæ claves religionis & felicitatis. Si corpus non servatur purum & immaculatum à scortatione, vix poterit anima exardescere in oratione. Corpus nostrum Spiritus Sancti templum est; cavendum summo studio, nè polluamus sanctum hoc S. Spiritus habitaculum. Membra nostra Christi membra sunt, cavendum, nè tollamus membra Christi, & faciamus membra meretricis. Domino per fidem & castitatem adhareamus, ut simus cum eo unus spiritus  
non

non adhæreamus meretrici , nè efficiamur  
cum ea unum corpus. Sodomitæ æstuentes  
libidinibus percutiebantur à Domino cæci-  
tatibus; corporali scilicet & spiritali: eadem  
adhuc hodiè hominum impurorum est pœ-  
na. Sodomitarum libidines sulphure &  
igne cœlitùs delapso vindicabantur: sic De-  
us fervorem pravæ istius concupiscentiæ, in  
scortatoribus, æterno igne accender. Ignis  
hic non extinguitur, sed fumus tormento-  
rum ascendit per omnia sæcula. Foris, id est,  
extra cœlestem Hierosolymam, sunt canes,  
id est, impuri & libidinosi homines. Abluit  
nos Christus pretioso suo sanguine in Ba-  
ptismo; cavendum summo studio, ne impu-  
ris libidinibus nos contaminemus. Ipsa natu-  
râ duce, talia flagitia erubescunt impii perpe-  
trare in conspectu hominum: & tamen non  
erubescunt ea perpetrare in conspectu Dei &  
Angelorum: nulli parietes oculos Dei sole  
lucidiores impediunt, nulli anguli sancto-  
rum Angelorum præsentiam excludunt; nul-  
li secessus internum conscientiæ testimoni-  
um tollunt. Mirabile hoc est, quod ardor lu-  
xuriæ ascendat quasi ad cælum, cum tamen  
foetor ejus descendat ad infernum. Brevis vo-  
luptas ista æternum pariet dolorem: mo-  
mentaneum est, quod delectat; æternum,  
quod cruciat: brevis voluptas fornicationis;  
perpetua pœna fornicantis. Memoria cruci-  
fixi

fixi crucifigat in te carnem tuam : memoria  
gehenne extinguat in te concupiscentiae fer-  
vorem : lachrymae poenitentiae extinguant in  
te libidinis ardorem. Configat carnem tuam  
divinus timor , nè te decipiat carnalis amor.  
Cogita , quod appetitus libidinis plenus sit  
anxietatis & vecordiae , actus abominationis  
& ignominiae , exitus poenitudinis & veri-  
cundiae. Non blandientem Dæmonis ad  
libidinem incitantis faciem, sed pungentem  
fugientis caudam respice: Non cogita brevi-  
tatem delectationis , sed potius æternitatem  
damnationis. Ama scientiam scripturarum;  
& vitia carnis non amabis : Semper aliquid  
operis facito, ut cum venerit tentator, te sem-  
per inveniat occupatum. Davidem decepit in  
otio: Josephum non poterat decipere in mi-  
nisterio. Cogita instantem omnibus horis  
mortem; & facile spernes omnem carnis vo-  
luptatem. Ama temperantiam; & facile vin-  
ces pravam concupiscentiam : Venter mero  
æstuans citò despumat in libidinem: Pericli-  
tatur in deliciis castitas : si ergò immodicis  
deliciis pascis carnem , nutris tui ipsius ho-  
stem. Sic nutrienda caro, ut serviat; sic do-  
manda, ut non superbiat. Cogita iudicii ex-  
tremi terrorem , & facile extingues libidinis  
fervorem. Revelabuntur occulta cordium ;  
quanto magis facta in occulto perpetrata ?  
Reddenda erit ratio de verbis inutilibus ,  
quanto

quanto magis de spurcis sermonibus ? Reddenda erit ratio de spurcis verbis ; quanto magis de impuris factis ? Quam longa fuit vita tua , tam longa erit accusatio : quot fuerunt peccata tua , tot erunt accusatores. Illæ cogitationes , quæ apud nos usu viluerunt ; in discessu non manebunt. Quid ergò prodest scortationem tuam aliquandiu coram hominibus occultari , cum in die judicii omnium omninò oculis debet revelari ? Quid prodest effugere tribunal judicis terreni , cum tamen non possis effugere tribunal judicis supremi ? Non poteris hunc judicem corrumpere muneribus , est enim judex justissimus : Non poteris eum precibus flectere ; est enim judex districtissimus : non poteris ex ipsius provincia & jurisdictione fugere , est enim judex potentissimus : Non poteris eum fallere vanis excusationibus , est enim judex sapientissimus . Non poteris à lata & promulgata sententia appellare , est enim Judex supremus . Erit tibi veritas in inquisitione , nuditas in publicatione , severitas in executione . Ergò , devota Deo anima , semper obversetur judicis hujus terror , sic non decipiet te libidinis fervor : Sis rosa charitatis , viola humilitatis , & lili-um castitatis : Disce à Christo Sponso tuo humilitatem ; disce etiam ab eo castitatem : magna dignitas castitatis , quæ in corpore

corpore consecrata est : magna dignitas castitatis , quia in carne præter carnem vivere facit . Ut nihil vilius , quam carne vinci ; ita nihil gloriosius , quam carnem vincere . Nec solum exteriores fugiendæ sunt scortationes , sed etiam impuræ fugiendæ sunt cogitationes ; quia Deus non solum Judex exteriorum actuum , sed etiam interiorum cogitationum . Vultu , sæpè læditur pietas ; oculis sæpè læditur castitas . Audi quid dicat veritas : Qui aspicit mulierem ad concupiscendam eam , jam fornicatus est cum ea . Quam difficilis hæc pugna , tam gloriosa erit victoria : difficile est libidinis incendia restringere ; impuberes stimulat , juvenes inflammant , senes & decrepitos fatigat , non aspernatur turguric , non reverentur palatia sed quā difficile est hic pugnare , tam laudabile erit triumphare . Restringendi statim primi impetus , nec fermenta parvarum cogitationum huic flammæ subministranda . Apostolus cum sensuerit vitiis omnibus reluctandum , adversus scortationem non congressus , sed fugam indicit : Fugite , inquit , scortationem . Quemadmodum enim peregrinus , ficta simplicitate mendicus , nos decipiendi gratiâ accedit ; si eum non admittimus , recedit ; si sinimus eum ingredi , fit hospes , colligit vires , tandem , si assentiamur , fit dominus : Ita motus pravæ concupiscentiæ stimulant

stimulant nos; si eis non blandiamur, recedunt. Si non vis hunc hostem tibi dominari, non recipias eum in domum cordis tui. Conserva nos o Deus, in animi sanctitate, & corporis castitate.

---

### MEDITATIO XXXVIII.

De præsentis vitæ fugacitate.

*Hominum quid vita? Cylindrus.*

**C**Ogita, devota anima, vitæ hujus miseriam & fugacitatem, ut cor tuum elevetur ad desiderandam cælestem hæreditatem. Vita hæc, dum crescit, simul decrescit; dum augetur, simul minuitur; quicquid ei accedit, simul etiam decedit. Punctum est temporis, quod vivimus, & adhuc puncto minus, dum nos vertimus, immortalitas aderit. Sumus in hac vita, tanquam in domo aliena. Non habebat Abraham in terra Canaan habitandi fundum, sed tantum sepulchrum hæreditarium: Sic vita præsens locus est diversorii & sepulchri. Vitæ hujus principium statim mortis est exordium. Naviganti similis est rota nostra: qui navigat, sive stet, sive sedeat, sive jaceat, semper ad portum accedit propius, & eò vadit, quò impulsu navis ducitur, sic & nos, sive dormientes, sive vigilantes, sive jacentes, sive ambulantes, sive nolentes, per momenta temporum semper ad finem ducimur. Vita hæc potius mors est, quia



quia singulis diebus morimur, siquidem singulis diebus aliquid de vita absumimus. Plena est hæc vita dolore præteritorum, labore præsentium, timore futurorum. Ingressus in vitam flebilis, quia à lachrymis vitam auspicatur infans, quasi prævidens futura mala: Progressus debilis, quia multi morbi affligunt, multæ curæ angunt: Egressus horribilis, quia non egredimur soli, sed egrediuntur nobiscum opera nostra, & per mortem egredimur ad severum Dei judicium. Conceptio nostra est culpa, nasci miseria, vivere pœna, mori angustia. In sordibus generamur, in tenebris fovemur, in doloribus parturimus, ante exitum miseras oneramus matres, in exitu more vipereo laceramus: advenæ sumus nascendo, & incolæ vivendo, quia compellimur migrare moriendo. Prima pars vitæ nostræ sese nescit, media curis obruitur, ultima senectute molesta premitur. Omne vitæ tempus aut est præsens, aut præteritum, aut futurum. Si præsens, est instabile: si præteritum, jam nihil est: si futurum, est incertum. Putredo sumus in exortu, bullæ in omni vita, esca vermium in morte. Terram gerimus, terram terimus, terra erimus. Nascendi necessitas abjecta, vivendi misera, moriendi dura. Corpus nostrum est terrenum habitaculum, in quo habitant mors & peccatum: quæ singulis diebus illud consumunt,

munt. Tota nostra vita est spiritualis militia : superne in exitium excubant demones , à dextra & sinistra mundus oppugnat , inferius & interius caro excubat : militia est hominis vita , quia in ea perpetua carnis & spiritus lucta. Quæ ergo possit esse vera hominis lætitia in hac vita , cum nulla in ea sit felicitas secunda ? Quid potest nobis de præsentibus contingere ad delectationem , quando cunctis simul transeuntibus , non tamen transit quod imminet : quando hoc penitus finitur quod diligitur , & illud semper accedit propius , ubi dolor nunquam finitur : id vitâ longiore lucremur , ut plura mala faciamus , plura mala videamus , plura mala patiamur : id nobis præstat vita longior , ut in extremo judicio sit peccatorum accusatio major. Quid est homo ? mancipium mortis , viator transiens , bulla levior , momento brevior , imagine vanior , sono inanior , vitro fragilior , vento mutabilior , umbra fugacior , somno fallacior. Quid est hæc vita ? mortis expectatio ; ludibriorum scena ; miseriarum mare ; hæmina una sanguinis , quam quilibet levis casus rumpit , quælibet febricula corrumpit. Cursus vitæ , labyrinthus , in illum ex utero ingredimur , per limina mortis abimus . Nil nisi terra sumus ; sed terra est nil nisi fumus ; sed nihil est fumus ; nos  
nihil

nihil ergò sumus. Vita hæc ut vitrum fragilis; ut amnis, labilis; ut malicia, miserabilis: Et tamen multis apparet valde desiderabilis. Pretiosa nux apparet hæc vita exterius; sed si cultro veritatis aperias, videbis quod nil nisi vermes & putredo sint interiùs. Nascuntur poma circa regionem Sodomæ, quæ delectant exteriori pulchritudine, sed contracta, in pulverem abeunt; felicitas hujus vitæ exterius delectat, quod si pressiori consideratione eam tangas, fumo & pulveri similis apparebit. Noli ergò, dilecta anima, summam tuarum cogitationum referre ad hanc vitam, sed mente semper ad futuram aspira lætitiâ. Confer inter se brevissimum temporis punctum, quod in hac vita nobis conceditur, cum infinitis & nunquam terminandis sæculorum sæculis; & apparebit, quam stolidum sit, fugacissimæ huic vitæ adhærere, æternam negligere. Fugacissima est hæc vita nostra; & tamen in ea æterna vita acquiritur aut amittitur. Miserrima est hæc vita, & tamen in ea æterna felicitas acquiritur aut amittitur. Calamitosissima est hæc vita; & tamen in ea æterna lætitiâ acquiritur aut amittitur. Si ergò ad æternam aspiras vitam, in hac fugaci vita ea toto corde desidera. Utere mundo; sed cor tuum non ad hæreat mundo. Negotiare in hac vita; sed tua non sit mens

affixa huic vitæ. Non nocet usus mundanorū exterior, si non adhærescat illis amor interior. In cœlo patria est, in mundo hospitium: noli ita delectari in diario hujus mundi hospitio, ut abstraharis à cœlestis patriæ desiderio. Mare est hæc vita; æternæ, portus: noli ita delectari in momentanea maris tranquillitate, ut non aspires ad portum tranquillitatis æternæ. Labilis est hæc vita, & suis amatoribus fidem non servat, quoniam præter omnem opinionem sæpius ab illis fugit, quare ergò tu fidem illi habere velis? Periculosum est, si vel unius horæ tibi certo pollicearis securitatem, quia sæpissimè in una illa hora fugacissima hæc vita finitur. Turbissimum est omni horâ præsentis vitæ abutū expectare, & ad illum seria pœnitentia se præparare. In hedera, qua delectabatur Jonas, parabat Deus vermem, ut exaresceret: Ita in rebus mundanis, quibus amore multi adhærescunt, nihil est stabile, sed vermes corruptionis in illis nascuntur. Mundus tanta rerum labe jam contritus est, ut etiam speciem seductionis amiserit: nam quantum illi laudandi sunt aut prædicandi, qui dignati sunt cum mundo florente florere, tantum increpandi & accusandi sunt, quos perire cum pereunte delectat. Abstrahe, ô Christe, corda nostra ab amore hujus sæculi, & desiderium in nobis excita cœlestis regni.

M E D I=

## MEDITATIO XXXIX.

De mundi vanitate.

*Præstant æternæ caducis.*

**N**Oli anima diligere ea, quæ sunt in mundo. Peribit mundus, & omnia quæ sunt in eo exurentur, ubi ergò tunc erit amor tuus? Ama æternum bonum, ut in æternum vivere possis. Omnis creatura vanitati subiecta est; qui ergò amore adhæret creaturis, vanus efficietur & ipse. Ama verum & stabile bonum, ut stabile & quietum reddatur cor tuum. Quid te delectat honor mundanus? honorem hominum quærens non potest honorari à Deo: qui honorem mutandum quærit, hic mundo se conformari cogitur, hic mundo placet, Deo placere non potest. Peritura & instabilia sunt omnia: quæ à perituris & instabilibus exhibentur: unde honor mundanus stabilis esse nequit. Quem pridie ad cælum summâ extulerunt gloriâ, illum sæpè postridie summâ afficiunt ignominiâ. Deo placere desidera, ut à Deo honoreris: divinus honor verus est & stabilis. Quid est homo indè melior, quod reputatur ab homine major? quantum unusquisque est in oculis Dei, tantum est, & non amplius. Christus, ad regnum quæsitus, fugiebat: quæsitus ad probra & ignominiosum crucis supplicium, sponte se offerebat: Ut ergò Christo conformeris, magis

magis deleat mundi ignominia quam gloria. Qui propter Christum non spernit mundanum honorem, quomodo vitam suam profunderet? Ad veram gloriam nulla alia via, nisi per contemptum mundanæ gloriæ, sicut Christus per crucis ignominiam intrauit in suam gloriam. Ames ergo contemni, vilipendi, repudiari hoc sæculo, ut honoreris in futuro. Quid de honore mūdano sit habendum, Christus nos vita sua docuit, famulatur ipsi omnis gloria cœlorum; imò ipse solus est vera gloria, sed ipse quasi abjicit gloriam: quanto ergo quis magis honoratur, & pluribus consolationibus corporalibus abundat, tanto debet profundius & intimius contristari, videns se eò magis abesse à Christi conformitate. Vana est laus humana, si accusat intus mala conscientia. Quid prodest febricitanti, si in lectulo collocetur eburneo, cum nihilominus æstu torqueatur interno? Verus honor & vera laus est testimonium conscientiaæ tuæ. Nemo æquior factorum tuorum Judex quam Deus & conscientia tua; huic judici facta tua probare desidera. An non sufficit, te tibi notum esse, & quod maximum est, Deo? Quid verò divitias tanto perè appetis? Nimis est avarus, cui non sufficit Dominus. Via est hæc vita ad æternam patriam, quid ergo prosunt magnæ opes? onerant magis viatorem, ut navem ingentia onera.

onera. Divitiæ servorum Dei, est Christus Rex cœlorum. Verus thesaurus debet esse in homine, non extra ipsum; Verus thesaurus est, quem ad iudicium illud universale tecum afferre poteris: Omnia verò illa exteriora bona auferuntur à nobis in morte. Pereunt illa congregata, sed pejus perit congregator eorū, si non in Deo dives fuerit. Pauper in mundum venisti, pauper decedes; quare medium à principio & fine distare debeat? Usus spectare debent divitiæ, & quam tenues sufficere possint. Minimum donum gratiæ & virtutis præstantius est cunctis terrenis divitiis: quare? quia virtus placet Deo, divitiæ non nisi per virtutem. Christi paupertas gratior nobis esse debet quam totius mundi divitiæ: Sanctificata est in Christo paupertas. Pauperis erat in nativitate, pauperior in vita, pauperrimus in morte. Quid dubitas paupertatem mundi divitiis præferre; cum Christus regni cœlestis divitiis eam prætulerit? Quomodo animam suam credit Deo, qui carnis curam ei non credit? Quomodo vitam ponet pro fratre, qui divitias suas illi non erogat? Pariunt divitiæ laborem in accessu, in possessione timorem, in amissione dolorem; ac, quod magis dolendum; labor avarorum non tantum periturus, sed etiam peremptorius, docente Bernhardo. Amor tuus, Deus tuus: Ubi thesaurus

H

tuus,

tuus, ibi etiam cor tuum. Amans divitias illas corporales, mundanas, perituras, non potest amare divitias spirituales, cœlestes, æternas; quare? quia illæ deprimunt cor hominis, & deorsum trahunt, illæ verò sursum erigunt. Amor rerum terrenarum viscus est spiritualium pœnarum, dixit quidam ex veris Christi amatoribus. Uxor Lothi in statuam salis conversa adhuc nobis concionatur, ne retrospiciamus ad ea quæ sunt in mundo, sed recta via ad cœlestem Patriam contendamus. Apostoli relictis omnibus Christum sequebantur. Quare? quia cognitio verarum divitarum tollit desiderium falsò dictarum divitiarum. Gustato spiritu desipit caro: cui Christus charus verè est, huic mundus amarus. Quid verò voluptates tantoperè expetis? Memoria crucifixi crucifigat in te omne voluptatis desiderium. Memoria ardoris gehennæ extinguat in te omnem libidinis ardorem. Confer brevissimum voluptatis momentum cum æternis suppliciis. Brutales sunt voluptates, & brutis nos similes reddunt. Non sapit ei suavitas regni cœlorum, qui plenus quotidie siliquis porcorum. Mortificemus omnes sensuum voluptates; & cum Abraham offeramus Deo in spirituali sacrificio filium illum dilectum, id est, animæ nostræ cupiditates, voluntariè renuntiando omnibus voluptatibus & asperitatem crucis amplectendo.

Non



Non plana & rosas strata, sed aspera & spinis obsita via ad regnum cœlorum ducit. Exterior homo augefcit per voluptates; interior per crucem & tribulationes: quantum augefcit exterior, tantum minuitur interior. Corpori serviunt voluptates; sed verè piis minima est corporis cura, animæ maxima. Voluptates captivant cor nostrum, nè in amore Dei liberum sit. Non voluptates, sed voluptatum contemptum tecum in morte auferes, & ad iudicium adferes. Configat ergo carnem tuam divinus timor, nè te decipiat carnalis amor. Obversetur jugiter animo memoria iudicii divini, nè te in servitutem abducatur perverfum iudicium appetitûs sensitivi. Nec respice vultum serpentis blandientem, sed cogita caudam acriter tandem pungentem. Per Christi gratiam vince, ut tandem à Christo victor coroneris.

## MEDITATIO XL.

De utilitate Tentationum.

*Crescit sub pondere palma.*

**U**Tile est fidei animæ, tentationibus in hoc sæculo probari & confirmari. Ipse Salvator noster cum Diabolo in eremo luctari voluit, ut pro nobis & in nostram salutem eum superaret, ac nostri certaminis fidelis promachus esset. Descendit prius ad infernum, postea demùm ascendit ad cœlum.

Ita fidelis anima ad infernum tentationum prius descendat, ut ad cœlestem gloriam ascendat. Non poterat Israeliticus populus promissam terram Canaan occupare, nisi devictis prius variis hostibus: Nec sibi fidelis anima cœlorum regnum promittat, nisi carnis, mundi ac Satanæ victrix extiterit. Tentatio probat, purgat, illuminat. Probat tentatio, quia fides adversis concussa, in salutis petra roboratur firmius, in boni operis ramos se propagat latius, in liberationis spem exsurgit altius. Abrahamo, cum filium immolare iussus, divino se promptum gereret imperio, post tentationem Angelus Jehovæ apparet, dicens: Nunc cognovi, quod Deum timeas, cum non peperceris filio tuo unico propter me. Ita si dilectum animæ tuæ filium, videlicet propriam voluntatem in tentationibus Deo obtuleris, verè timens Deum reputaberis, & in corde tuo divinum senties alloquium. Aurum probat ignis, fidem tentatio. Quàm fortis sit miles, apparet in proelio: ita, quam firma sit fides nostra, ostendit tentatio. Quando ventorum turbines & procellosi aquarum fluctus in navem Christi irruunt, tunc apparet quàm exigua fide præditi quidam ejus discipuli. Israelitæ, quos ad Midianitas vincendos deduci jubebat Dominus, a-

pud

pud aquas priùs probabantur; ta in aquis tribulationum ac tentationum priùs probantur, qui superatis hostibus in coelestem introducendi patriam. Quicquid ergò aduersi, quicquid tentationum fideli obtingit animæ, probationis, non reprobationis esse existimet. Tentatio etiam purgat. Ad pestiferum amoris proprii & mundani humorem extrahendum multis granis aloes Medicus Christus utitur. Tribulatio ad perscrutandam conscientiam excitat, & peccata vitæ præteritæ in memoriam revocat; quin etiam, sicut medicina corporis à contagiosis morbis, ita tribulatio præservat a peccatis. Semper quidem ad lapsus proclivis homo, magis tamen felicitatis quàm aduersitatis tempore. Multis spinæ sunt divitiæ; evellit ergò Deus spinas, nè suffocare possint animas. Multos varietas negotiorum mundanorum à divino impedit obsequio; immittit ergò Deus morbos, ut in se conversi incipiant mori mundo, vivere Deo. Pluribus excelsa vel opum vel honoris ab arce Profuit ad mediæ sortis cecidisse quietē. Multos honor mundanus ad superbiam erigit: immittit ergo Deus contemptum, & superbiæ fomentum subtrahit. Deniq; tentatio illuminat. Quā fragilis & vana sit omnis mundi consolatio, non nisi in tentationibus agnoscimus. Stephanus

cum lapidaretur, gloriam Christi videbat: Ita in calamitatibus contritæ animæ sese ostendit Christus. Verum & solidum gaudium non nisi ab inhabitatione Dei: Deus habitat in spiritu contrito & humiliato: Afflictio est, & tentatio, quæ spiritum conterit & humiliat: Ideò verum & solidum gaudium est in anima afflictorum. Tentatio est via quædam ad Dei agnitionem: idcò ait Dominus: Cum ipso ero in angustia: eruam eum, & videre faciam eum salutem meam. Tobias cæcus nihil eorum, quæ suprâ, infrâ, aut coràm se erant, adeoque nec seipsum videbat, sed à Deo per Angelum Raphaëlem illuminatus cernebat omnia quæ priùs videre non poterat, non alio medicamine usus, quàm felle piscis: ut per hoc declaretur, felle amaritudinis oculos nostros liniendos atq; illuminandos esse, ut ad veram nostri ac bonorum mundanorum cognitionem perveniamus. Quare dicit Apostolus, quod cognoscamus in ænigmate? quia in tentationibus agnoscimus, quod Deus electos sub specie tristitiæ exhilaret, sub specie mortis vivicet, sub specie morborum sanet, sub specie paupertatis ditet. Grata ergò debet esse crux & tentatio ei qui Christo pro nobis crucifixo, & tentato non est ingratus. O bone Jesu, hic ure, hic percutite, ut parcas in futuro, & bone Jesu, qui, parcendo sæpiùs nos à te abjicis, feriendo effice, ut ad te redeamus. Afflige, & preme

exteriorem hominem, ut interior crescat & vegetetur. Pugna, ô bone Jesu, in me, pro me. Sis moderator certantis, & corona vincentis. Sit robur & augmentum meæ fidei, quicquid in vita sentio adversi. Succurre, ô bone Jesu, infirmæ meæ fidei: Ita namque apud Prophetam sanctum promisti: Sicut mater consolatur filio, ita consolabor vos. Majore cura foveat & nutrit mater infantem lactantem; ita bone Jesu, erige & confirma languentem meam fidem. Concede, ut plus apud me valeant internæ tuæ consolationes, quam omnium hominum & Diaboli contradictiones, imò & proprii cordis cogitationes. O clemens Samaritane, infunde vinum mordens in vitia mea; sed adde etiam oleum divinæ consolationis. Multiplica crucem, sed adde etiam tolerandi virtutem.

## MEDITATIO XLI.

Fundamentum patientiæ Christianæ.

*Tandem patientia victrix.*

**Q**uiesce, devota anima, & crucem à Deo tibi impositam patienter tolera. Cogita Christi sponsi tui passionem. Passus is est pro omnibus, ab omnibus, in omnibus. Pro omnibus passus est, etiam illis, qui passionem istam pretiosam contemnunt, & sanguinem ejus pedibus conculcant nefarie. Passus est ab omnibus. A cœlesti Patre traditur, con-

teritur, derelinquitur: A dilectis Discipulis deseritur: A populo Judaico, peculio suo, rejicitur, qui latronem Barrabam ipsi præferunt: A gentibus crucifigitur. Omnium omnino hominum delicta sustinet, ideò etiam ab omnibus affligitur. Passus est etiam in omnibus. Tristis est anima usque ad mortem, & sensu judicii divini pressa, à Deo se desertam clamat. Omnia membra sanguinum exsudent sudorem: caput coronatur spinis, lingua myrrharum gustat poculum, manus ac pedes perforantur clavis, latus vulneratur, totum corpus flagellatur, & in cruce expanditur: Ipse passus est famem, sitim, frigus, contemptum, paupertatem, convicia, vulnera, mortem, crucem. Quam verò iniquum foret, pati Dominum, & lætari servum? quam iniquum foret, Salvatorem pro peccatis nostris tam graviter puniri, & nos in illis jucundari? quam iniquum foret, affligi caput, & reliqua membra non condolere? Quin potius, ut Christum oportuit per passionem suam intrare in cœlestem gloriam: ita & nos per multas tribulationes oportet ingredi in regnum cœlorum. Cogita etiam largam retributionem. Non sunt condignæ passionibus hujus temporis futura gloria: quantacunque passio nostra sit, temporalis est, imò interdum diaria, sed illa gloria æterna. Omnia nostra adverbia accuratè observat Deus, & in  
judicium

judicium aliquando adducet : Quàm igitur turpe fuit in augustissimo illo orbis conven-  
tu sine crucis & passionem monilibus con-  
spici? Ipse quoque omnes lachrymas abster-  
get ab oculis suorum. O felix lachryma,  
quam talis ac tanti domini manus absterget!  
O beata crux, quæ in cœlo invenis remune-  
rationem! David non integros decem annos  
versabantur in exilio, sed quadraginta in im-  
perio; Præfigurata hic brevitās passionis; sed  
gloriæ secuturæ æternitas. Punctum tempore  
est, quo exercentur per crucem sancti: mi-  
serationes sæculi, quibus colliguntur; atque  
ita verè matutinis adversis prospera vesperti-  
na succedunt. Cogita insuper omnium san-  
ctorum tribulationem. Aspice Jobum lugen-  
tem in sterquilinio, Johannem esurientem in  
eremo, Petrum extensum in patibulo, Jaco-  
bum decollatum ab Herodis gladio. Aspice  
Mariam benedictam Salvatoris matrem sub-  
cruce Filii stantem, quæ typum gerit Eccle-  
siæ spiritualis Domini matris. Beati estis, in-  
quit Christus, si persecuti vos fuerint propter  
nomen meum; ita enim fecerunt Prophetis.  
O gloriosa persecutio, quæ nos Prophetis, &  
Apostolis, adeo quæ omnibus sanctis, imò  
ipsi Christo, conformes reddit! Patiamur  
ergò cum patientibus, crucifigamur cum cru-  
cifixis, ut glorificemur cum glorificatis. Si  
verè filii sumus, sortem reliquorum filiorum

non detreſemus. Si verò Dei hæreditatem  
deſideramus, integram acceptemus; Jam ve-  
rò filii Dei non ſolùm hæredes ſunt gaudi  
& gloriæ in futuro ſæculo, ſed etiam trifti-  
tiæ & paſſionum in præſenti; quia flagellat  
Deus omnem filium quem recipit; punit ip-  
ſorum peccata, ut in futuro parcat judicio;  
multiplicat hic tribulationem, ut poſſit illic  
multiplicare mercedẽ; atque ita non tam per-  
ſecutio quam remuneratio augetur. Cogita  
beatam crucis conditionem. Radicem mun-  
dani amoris in nobis extinguit, & ſemen di-  
vini amoris cordibus noſtris inferit. Crux  
in nobis generat odium mundanorum, & a-  
nimus ad cæleſtia evehit. Mortificata carne,  
vivit ſpiritus, amareſcente mundo, dulceſcit  
Chriſtus. Magnum eſt crucis myſterium;  
quippe per eam ad contritionem, ad verum  
timorem, ad patientiæ exercitium nos vocat  
Deus: aperiamus pulſanti, & audiemus, quid  
in nobis loquatur Dominus. Contemptus  
eſt crucis aſpectus coram mundo, & coram  
oculis carnalibus hominis exterioris; glorio-  
ſus coram Deo, & coram oculis ſpiritualibus  
hominis interioris. Quid Chriſti paſſione vi-  
lius & abjeſtius à Judeis reputabatur? quid  
verò in oculis Dei eadem dignius & pretio-  
ſius? quippe quæ eſt pretium pro totius mun-  
di peccatis. Ita quoque juſtus affligitur, ju-  
ſtus



Aut moritur, & nemo considerat: sed pretiosa crux, pretiosa mors Sanctorum in conspectu Domini. Nigra est Ecclesia, Christi Sponsa, exterius propter calamitates & persecutiones: Intus formosa, propter divinam consolationem. Hortus conclusus est Ecclesia, & quælibet fidelis anima, quippè nemo agnoscit ejus pulchritudinem, nisi qui in ea est. Nunquam plenè & perfectè sentiemus consolationem Spiritus, nisi caro nostra affligatur exterius. Si habitat in nobis amor mundi, non est quo intret amor Dei: Vas plenum non potest impleri liquore novo, nisi prior evacuetur: Effundamus ergò amorem sæculi, ut impleatur amore Dei. Idè Deus ipse per crucem mundi amorem in nobis extinguit, ut divino amoris locus esse possit. Præterea crux ad preces compellit, & virtutis est occasio: quando aquillo hortum perflat, id est, quando persecutiones exercent Ecclesiam, tunc fluunt aromata ejus, tunc illius virtutes augentur, quæ gratum coram Deo odorem spirant. Dilectus animæ Sponsus candidus est & rubicundus; candidus innocentia; rubicundus passione: ita quoque, ut dilecta Christi Sponsa sit candida virtutibus, rubicunda redditur passionibus. Et sicut ex durissimo afflictionum lapide oleum & mel divina gratia producere potest: sic ex amara calamitatis radice novit dulcissimum

dulcissimum fructum æternæ gloriæ producere. Ad quam nos eadem provehat & introducat ; Amen.

---

## MEDITATIO XLII.

Quomodo vincenda tentatio à  
Perseverantia.

*Spes confisa Deo nunquam  
confusa recedet.*

**S**ANCTE Domine Jesu, Sponse animæ meæ charissime, quando erit, ut ad solennitatem nuptiarum tuarum me perducas ? Peregrinus sum, & exulo à te; sed firmissimè credo, nullatenus dubitans, brevi fore, ut corporis solutis vinculis appaream coràm facie tua. Timor & tremor venerunt suprà me, quia thesaurum meum in fictilibus vasis porto : prona est mens ad errores, prona est voluntas ad peccata : unde nec spiritus in me semper promptus, caro autem semper infirma, captivum me ducit peccatum, & lex membrorum repugnat legi mentis. Timor & tremor venerunt super me, quia Satanas insidiatur thesauro meo, caliditas ipsius magna, nocendi studium ardentissimum, potentia maxima. Adamum decepit in Paradiso, Judam in schola Salvatoris ; quomodo miser ego

ego ab ipsius insidiis securus ero? Timor & tremor venerunt supra me, quia adhuc in mundo sum, qui totus in maligno positus est: invitant delitiæ mundanæ, terrent adversa in via Domini, allubescunt quandoque mundi illecebræ: totus mundus laqueis repletus: miser ego, quomodo eos potero effugere: Oppugnant me læta, oppugnant me tristitia: quomodo miser ego consistere poterō? Timor & tremor venerunt super me, quia Deus est, qui operatur in me velle & perficere: Timeo, nè fortè negligentia & incuria mea cogat Deum auferre etiam illam, quam dedit, voluntatem bonam: Indignè utor peccatorum remissione, & primam gratiam gratis datam respuo; unde timeo, nè secreto & justo Dei iudicio auferatur digne, quo indigne utor: Vereor, nè ab eo deserar, quem post primam meam conversionem sæpiùs deserui. Quàm gravitèr crucior, cogitans, hæc Dei beneficia iudicium graviùs & severius sequi, si injustè illis usus fuero. Sed erigit me infinita Dei misericordia, qui, ut dedit velle, ita dabit etiam perficere; quia ipse Deus est, & non mutatur. Misericordia quoque ipsius confirmata est super me, & non mutabitur: firmum stat fundamentum Dei, utique firmum, quia in ipso Deo, apud quem nulla variatio: utique firmum, quia Christi sanguine confirmatum, qui

qui semper loquitur coràm throno Dei: utiq; firmu, quia certis Sacramentorum sigillis ob-  
signatum. Si modiculum salutis in me quæ-  
rerem, utique dubitandum mihi foret de sa-  
lute mea: Sed ut omnis mea justitia, ita  
quoque omnis spes salutis est in Christo. Si  
ex voluntatis arbitrio Christum apprehen-  
dissem, utique verendum mihi esset, nè mu-  
tato voluntatis arbitrio Christum amitte-  
rem: Sed quia inventus est ab eo, qui ipsum  
non quæsierat, ipse utique postquam semel  
inventus, non sese vicissim subtrahet: Qui  
ex umbra mortis ad lucis participationem  
me traduxit, non permittet, ut ad tenebras  
detrudas priores. Immutabilia sunt dona  
& vocatio Dei ex parte voluntatis Dei: uti-  
nam verò & ipse immutabilis in bono es-  
sem! Thesaurus ille semper adest; sed ma-  
nus apprehendens, aliquando languet. Ap-  
prehendere autem potero Christum, qui, ut  
se in verbo & promissionibus revelavit, ita  
ut verbo & promissionibus fidem adhibere  
possim, concedet benignissimè. Precum  
adminiculo & præsidio usus muniam fidem  
meam: neque dimittam Dominum ex cubi-  
culo cordis mei, antequam salus mihi obve-  
niat. Virtute Domini custodiri potero ad sa-  
lutem. Erigit me & confortat virtus Domi-  
ni; sed deprimit & contristat infirmitas mea.  
Atqui in infirmitate mea virtus Domini perfici-  
etur

cietur: roboravit me, à quo omne fidei robur.  
Erigit me gratia divina, sed terret me indignitas mea: atqui si dignus essem, jam non esset gratia, sed merces; si ex operibus, utique non ex gratia: enim non est gratia ullo modo, nisi sit gratuita omni modo. Ideo ad opera mea non respicio. Quod erratur, corrigit; quod deficit, supplebit; quod peccatum est, abolebit: quod ille mihi imputare non voluerit, perinde est, ac si non erit. Tantum ergò ex Deo salus mea; proinde firma.

---

### MEDITATIO XLIII.

De quotidiana mortis consideratione.

*Mortis meditatio vita est.*

**O** Fidelis anima, expecta mortem omnibus horis: quia illa tibi insidiatur omnibus horis: Mane, ô homo, surgens, cogita ultimum fore hunc vitæ diem: Vespere cubitum iturus, cogita, ultimam hanc fore tibi in terris noctem. Quicquid agis, quicquid suscipis, semper prius cogita, & tecum dispice, num talia ageres, si hac horâ tibi moriendum, & ad Dei iudicium veniendum. Num putas, si de morte non cogitas, illam tibi non appropinquare? Vocari mortem, si de ea cogitaveris? Sive de illa cogitaveris, sive minus, sive de illa locutus fueris, sive minus; semper instat cervicibus tuis: commodato  
vita

vita tibi data est, non mancipio; hac conditione intrâsti, ut exires; nudus venisti, abibis nudus. Peregrinatio vita est: diu cum deambulaveris, tandem redeundum; colonus es, & inquilinus mundi, non perpetuus dominus. Singulis horis cogita, quo singulis momentis properes. In eo fallimur, quod in ultimo vitæ halitu nos mori existimamus, singulis diebus, singulis momentis morimur: quicquid vitæ accedit, simul recedit; quicquid vitæ additur, simul detrahitur. Non repente in mortem incidimus, sed minutatim procedimus. Vita hæc nostra via est; quotidie aliquid de ea conficiendum. Mors & vita distantissima videntur, cum tamen nihil alteri vicinius quam mors vitæ: Semper illa præterlabitur, semper hæc instat. Ut navi iter agentibus, nec sentientibus sæpè qui vehuntur, nec cogitantibus, finis adest: Ita quicquid agimus, siue edamus, siue bibamus, siue dormiamus, semper morti appropinquamus. Multi vitam transierunt, dum vitæ instrumenta quærunt & subsidia: mortem venientem nemò hilaris accipit, nisi qui se diu ad illam composuit. In vita quotidie tibi morere; sic in morte Deo poteris vivere. Antequam moriaris, moriantur in te vitia: in vita tua moriatur in te vetus Adam; in morte vivet in te Christus: in vita tua cor  
rumpatur

rumpatur quotidie homo exterior ; in morte renovabitur in te interior . Mors ex tempore in æternitatem transfert , quia lignum, ubi ceciderit , manebit. Quam ergo sollicitè de mortis hora cogitandum . Præterit tempus, & æternitatis infinita restant spatia ! in tempore ergo te ad æternitatem præpara . Quales in æternū futuri simus, beati an miseri , una mortis hora decernitur : in uno hoc momento æterna felicitas aut possidetur aut amittitur. Quare, ô fidelis anima, quam sollicitè ad hanc horā te præparare debes: Facile contemnes omnia mundana, si te morituum cogitabis, cogita oculos caligantes in morte, & facile avertes eos à vanitate : cogita aures obsurdescentes in morte, & facile tibi erit ad impia & obscœna verba eas obstruere: cogita linguam obrigescentem in morte: & majorem habebis curam tuæ loquelæ: obversetur tibi morientium sudor & anxietas , ita facile contemnes mundanas delicias: obversetur tibi egredientium nuditas, & non erit tibi gravis in hac vita paupertas: Cogita totius corporis in morte horrorem , & facile contemnis mundi splendorem : vide animæ ex corporis domicilio egredi compulsæ ejulatum , & facile cavebis omnis peccati reatum : Cogita putredinem mortem tuam consequentem , & facile humiliabis carnem tuam superbientem: cogita quam vacuus & nudus,

nudus , ab omnibus creaturis in morte tua relinquare , & facile amorem tuum ab illis avertere , & ad creatorem convertere poteris : cogita quam anxie mors scrutetur , nè quidquam tecum ex hac vita rapias , & facile contemnes omnes mundi divitias . Qui in hac vita quotidie moritur per vitia , ille per mortem ad æternæ mortis transit supplicia : Nemo ad æternam vitam transit , nisi qui in Christo hinc vivere incipit : Ut in morte vi-vas , Christo per fidem te inseras . Mors semper sit in tua cogitatione , quia semper est in tui expectatione . Semper circumferimus mortem , quia semper circumferimus peccatum , peccati enim stipendium mors est . Si verò mortis amaritudinem effugere cupis , Christi sermonem serva . Fides conjungit & unit nos cum Christo : qui ergò in Christo sunt , illi non moriuntur , nam Christus est ipsorum vita . Qui per fidem Deo adhæret , unus est Spiritus cum eo ; & proinde fidelis in æternum non moritur , quia Deus est ipseus vita . Populus Israeliticus per mare rubrum ad terram promissam transit , Pharaoh & ipsius exercitus in eo extinguitur : ita mors piorum est ipsis veræ vitæ principium , & janua ad Paradisum : malorum autem mors non est malorum terminus , sed antecedentium & sequentium copula ; transeunt illi de morte prima ad mortem secundam . Tam arcta est



est Christi & fidelium unio, ut per mortem ea dissolvi nequeat; in ipsa densissima mortis umbra præluceat illis divinæ gratiæ facula; in mortis periculosa profectioe prospicit Christus dilectis suis de Angelorum protectione. Sanctorum corpora sunt Spiritus sancti templa; non permittet Sanctus ille Spiritus templa sua per mortem destrui penitus. Verbum Dei est incorruptibile semen; non illud per mortem extinguatur, sed occultatur in piorum cordibus, & ea suo tempore vivificabit.

---

MEDITATIO XLIV.

Consolatio in morte amicorum.

*Vitam moriendo lucramur.*

**C**Ogita semper, ô devota anima, Christum tuum Salvatorem. & non timebis mortis terrorem. Si te contristat mortis violentia, erigat te vicissim Christi potentia. Israelitæ non poterant bibere aquas de Mara propter amaritudinem; sed Jehova ostendebat Moyse lignum, quod projectum in aquas eas efficiebat dulces. Si terreris ob mortis amarorem, ostendit tibi Deus lignum, quod eam convertit in dulcorem, surculum scilicet ex radice Isai progerminatum; Surculus iste Christus est; cujus sermonem si quis servaverit, mortem non videbit in æternum. Plena est oneris vita; bonum igitur eis allevamentum.

mentum. Miseria hominis Christiani, non homo Christianus, moritur; profectio quædam est, quam mortem putamus; non exitus, sed transitus: nostros non amittimus, sed præmittimus, non moriuntur nostri sed oriuntur; præcedunt, non recedunt, non discedunt; non obitus est, sed potius abitus. Piorum migratio est vitæ iteratio: piorum funera sunt quædam scœnora. Moriuntur nostri, hoc interpretare, quod desinant peccare, desinant jactari, desinant miseri esse: Moriuntur in fide, hoc interpretare, quod ex umbra vitæ discedunt, ut ad veram vitam transeant; ex tenebris, ut ad lucem; ab hominibus, ut ad Deum. Vita navigatio est, mors portus est tutissimus; non igitur dolendum, quod nostri mortui sint, sed potius illis gratulandum, quod ex turbulento mari in portum pervenerint. Vita hæc carcer animæ est, mors autem liberatio; idcò merisurus Simeon exclamat: Nunc dimittis servum tuum, Domine. Dimitti desiderat, veluti corporeo ergastulo inclusus: gratulandum ergò nostris, quod ex hoc carcere soluti ad veram libertatem aspiraverint. Dissolvi rogat itidem Apostolus, tanquam terreno corpori misera quadam servitute alligatus: Num igitur tristabimur, quod nostri ex his vinculis eluctati verè sint liberi? Accipiemusne propter illos vestes atras,  
cum

cum illi sumpserint indumenta alba ? quia scriptum est, quod electis data sint vestimenta propter innocentiam, & palmæ in manibus eorum propter victoriam. Num lachrymis & gemitibus nos propter eos macerabimus, cum Deus ab oculis illorum omnes absterferit lachrymas ? Num propter eo lugebimus, & in mœrore nostro labores nobismet ipsis creabimus, cum illi sint in tali loco, ubi nec luctus, nec clamor ultra auditur. & requiescunt à laboribus suis ? Num propter eorum obitum tristitia immoderata conficiemur, cum ipsi in Angelorum consortia vera & solida fruantur lætitia ? Num flebilem propter eos extollemus vocem, cum illi coram Agno cantent canticum novum, habentes citharas & phialas aureas ? Num dolebimus, eos ex his terris discessisse, cum sibi metipsis gratulentur quod discesserint ? Quantum profit exire de hoc mundo, Christus ostendit, qui cum discipuli ejus tristerentur, quod se recessurum diceret, respondit : Si me diligeritis, gauderetis utiq;. Si te navigante turbida & procellosa tempestas fluctibus vi ventorum excitatis, futura prænunciaret naufragia, nonne portum velociter peteres ? Mundus ecce nurat & labitur, & ruinam sui non solum senectute, sed & fine rerum testatur ; & non Deo gratias agis, non tuis gratularis, quod ex itu maturiore subtrahi ruinis & naufragis & plagis

plagis imminentibus eximantur? In cujus manibus tuorum salus tutiùs collocatur, quàm in manibus Christi? In quo loco tuorum anima tutiùs commorabitur, quàm in regno Paradisi? Audi, quid de morte dicat Apostolus, Mors lucrum est. Lucrum est, evasisse incrementa peccati; lucrum, fugisse deteriora; lucrum transisse ad meliora. Si illi, quos per mortem amisisti, fuerunt admodum chari; charior sit Deus, qui eos voluit ad se traduci: Ne indigneris Domino, qui nihil abstulit, nisi quod dedit; sua recepit, tua non abstulit: Ne indigneris, Dominum repetere, quod commodato tantum dederat. Ventura solus Dominus prospicit mala, tuis ergò prospicere voluit, nè venturis implicarentur infortuniis. Mortui in Domino suaviter quiescunt in suis sepulchris, quando superstites graviter torquentur in ipsis regni sui palatiis. Si charos per mortem amisisti, crede quod chariores olim recipies. Brevè temporis spatium te ab illis sejungit; beata & secunda æternitas te illis vicissim conjunget: Veracissima enim promissione speramus, nos de hac vita migraturos, undè quosdam nostros migrantes præmissimus; ad eam vitam esse venturos, ubi nobis erunt quanto notiores, tanto chariores, & sine timore ullius dissensionis amabiles. Quotquot erunt animas, & quot nos ante fuerunt,

fuerunt, Accipient' læto magna theatra finu : Fas erit hic nostræ vultus agnoscere gentes : Atque dare alternis mutua verba lionis: Hic cum fratre soror, nati cum patribus ibunt, Vespera nec festos finiet ulla dies . Non ergò tantum respice tempus desertionis, quod scilicet tui te deserunt in morte , sed, etiam respice tempus restitutionis , quod scilicet tui tibi restituentur in resurrectionis. Ubi firma fides resurrectionis, ibi non est species mortis , sed potius quietis. Tota rerum universitas resurrectionis speculum est. Lux sub æstatis tempus quotidie occidens , quotidie resplendet : herbæ per hyemem emortuæ reviviscunt , Phoenix in morte seipsam reseminat: tempora ubi finiuntur , incipiunt : fructus consumuntur & redeunt ; semina non nisi corrupta & dissoluta fecundius surgunt : omnia pereundo servantur, omnia de interitu reformantur: Num ergò frustra Deus tales typos in natura proposuisse æstimandus ; Num potentior erit natura Deo corporum nostrorum resurrectionem promittente? Qui grana seminum mortua & putrefacta vivificat, per quæ in hoc sæculo vivas, multo magis teipsum & tuos resuscitabit , ut cum illis in æternum vivas . Vocavit Deus dilectos tuos ad cubilia sua , nè quæso securam quietem illis invidere velis ; breve aderit tempus resurrectionis. Sperabas forsitan, tuos an-

te obitum futuros membra utilia Ecclesiæ militantis: Sed placuit Deo, illos esse membra Ecclesiæ triumphantis: Placuit id Deo, placeat etiam tibi. Sperabas forsan, tuos antè obitum debuisse variarum rerum acquirere scientiam: Sed placuit Deo, illos in cœlesti Academia veram discere sapientiam. Placuit hoc Deo: placeat etiam tibi. Sperabas forsan, tuos ante obitum ex pulvere debuisse priùs elevari, & cum Principibus collocari: Sed placuit Deo, illos cœlestibus Principibus, Angelis sanctis, associari: Placuit hoc Deo, placeat etiam tibi. Sperabas forsan, tuos antè obitum multas debuisse conquirere divitias: Sed placuit Deo, illos cœlestis regni percipere delicias: Placuit hoc Deo, placeat etiam tibi. Sancte Deus, tu, quod dedisti, abstulisti; sit nomen tuum benedictum in sæculum.

## MEDITATIO XLV.

De judicio extremo.

*Christi reverere tribunal.*

**P**ater non judicat quemquam, sed omne judicium dedit Filio. Scio, Domine Jesu, quod districtus arbiter omnium venturus clandestina hominum facta & verba & cogitata in lucem proferes. Supra erit judex  
severus

severus, subitè patens infernus, intus conscientia mordens, extra ignis ardens, à dextris peccata accusantia, à sinistris Dæmona terrentia, aderunt boni Angeli à cœlis pel-  
lentes, & mali ad infernum trahentes. Domine Jesu, in hisce meis angustiis ad quem confugiam? Vereor omnia mea opera, sciens quod non parcis omni delinquenti. Positus ibi ero inter tempus & æternitatem; tempus præterit, æternitatis adhuc infinita restant spatia. Maligni spiritus opera sua requirent mala, quæ suaserunt; in districtissimo illo judicio producent omnia, ut animam secum ad tormenta trahant sociam. Tabescet omnis militia cœlorum, & complicabuntur sicut liber cœlio; omnis militia eorū defluet, sicut defluit folium de vinea & ficu. Erubescet Sol, & Luna confundetur. Quod si hæc manuum tuarum opera, quæ nulla unquam commiserunt mala, à conspectu tuo fugiunt; quomodo miser ego peccator coram facie tua apparere possum? Cœli cœlorum non sunt immaculati coram te; quomodo miser ego, qui bibo velut aquam iniquitatem? Quod si justus vix salvabitur; peccator ubi comparebit? Quo igitur fugiam, ad quem convertar, nisi ad te Domine? Tu peccatorum meorum Judex eris, qui pro peccatis meis mortuus es. Pater enim non judicat quenquam, sed omne judicium tradidit Filio: Pater

tradidit judicium Filio, sed Filius vicissim propter peccata nostra traditus est. Sic enim Deus dilexit mundum, ut Filium suum unigenitum daret, non ut judicet mundum, sed ut servetur mundus per eum. Quomodo igitur me judicabis, Domine Jesu, cum misus sis à Patre, ut per te server? Voluntatem Patris tui in omnibus perfecisti; quomodo igitur in me misero salvando eam non perficies? Non est voluntas Patris tui, ut pereat unus de Parvulis. Parvulus & ipse sum in conspectu tuo; parvulus etiam in conspectu meo: quid enim sum nisi cinis & pulvis? Neque solum cinis & pulvis, sed etiam in pietatis profectu nimis parvulus & pusillus. Perfice igitur in me parvulo voluntatem Patris tui. Venisti, ô Jesu, salvare quod perierat, quomodo igitur poteris eum, qui salvari desiderat, judicare? Accusabunt me peccata mea, & districtam judicis exigent sententiam, sed tu peccata mea transtulisti in te: peccata mundi tollis; quomodo non mea? Quomodo propter peccata mea me condemnabis, qui pro eis moruus es? Mortuus es pro peccatis mundi totius; quomodo non & pro meis? Utrique, Domine Jesu, si voluisses districtè me judicare, quid te coegisset de cælo descendere in carnem, in mortem, in crucem? Accusabunt me dæmones; & opera, quæ  
suaserint



suaserint, ab anima mea requirent. Sed judicatus est princeps hujus mundi, neq; quicquā habet in te; quod si in te non habet quicquam, utique nec in me; credo enim in te, Domine; ideò manes in me, & ego in te. Accusabit me amicum tuum, accusabit me fratrem tuum, accusabit me æterni Patris filium dilectissimum: Quomodo igitur severe judicabis amicum, fratrem, & filium tuum? Accusabit me in judicio illo Moyses. Maledictum me dicet, siquidem non servavi omnia, quæ scripta sunt in libro legis. Verum tu, Christe, maledictum pro me factus, ut à maledictione legis me liberares. Maledictus ero Mosis; sed benedictus tibi: audire enim desidero vocem illam; Venite benedicti, possidete regnum Patris mei. Accusabit me Moyses; tu verò non accusabis me apud Patrem, imò pro me intercedes. Non igitur maledictionem Moysis timeo, quia sustulisti chirographum ipsius, quod erat contrà me. Accusabunt me damnati, & similis culpæ reum me proclamabunt. Fateor ô Domine Jesu, reatus me cum illis conjungit; sed reatus agnitio & salvifica tuæ cognitio ab illis me disjungit. Qui audit verbum tuum, & credit ei qui misit te, habet vitam æternam, neque veniet in judicium. Audio verbum tuum, Domine, & in te credo, fide languida, sed tamen fide. Credo,

Domine , sed succurre incredulitati meæ .  
 Credo, Domine, sed adauge fidem meam.  
 Quamvis ab omnium damnatorum peccatis  
 non sim liber , à sola tamen incredulitate  
 liberabis me Domine . Accusatores illi om-  
 nes terrent me , sed tu Judex erigis me. Ti-  
 bi Pater tradidit omne judicium , omnia in  
 manus tuas dedit; sed vicissim pro nobis om-  
 nibus te tradidit, ipse etiam tradidisti te pro  
 Ecclesia, ut illam sanctificares & mundares la-  
 vacro aquæ in verbo. Quomodo severo judi-  
 cio judicabis eos, pro quibus tradidisti te in  
 mortem, mortem autem crucis? Carnem tu-  
 am odio non habebis ; membra sumus cor-  
 poris tui, de carne tua, & ossibus tuis.

## MEDITATIO XLVI.

De vitæ æterno desiderio.  
*Semper mens respice sursum.*

**D**EVOTA anima , non debes amare vitam  
 fugientem , sed potius permanentem .  
 Eò ascende per desiderium , ubi juvenus  
 sine senectute , vita sine morte, gaudium si-  
 ne tristitia , regnum sine commutatione .  
 Si delectat te pulchritudo , justî fulgebunt  
 sicut Sol ; si velocitas aut fortitudo , ele-  
 cti erunt similes Angelis Dei ; si longa  
 & salubris vita , ibi sana est æternitas, &  
 æterna

æterna sanitas; si satietas, satiabuntur electi; cum apparuerit Domini gloria; si melodia, ibi Angelorum chori concinunt sine fine; si munda voluptas, torrente voluptatis inebriabit suos Deus; si sapientia, ipsa Dei sapientia seipsam eis ostendet; si amicitia, diligant illi Deum plus quam seipsos, & invicem tanquam seipsos, & Deus illos plus quam illi seipsos; Si delectat concordia, omnibus ibi erit una voluntas; si potestas, electis omnia erunt facilia, nihil desiderabunt quod non poterunt; nihil autem desiderabunt, nisi quod Deus ipsos vult velle & desiderare: si delectat honor & divitiæ, Deus servos suos fideles super multa constituet; si vera securitas, ita certi erunt nunquam & nullatenus istud bonum sibi defuturum; si certi erunt se non sua sponte illud amissuros, nec delectorem Deum illud diligentibus invitis ablaturum, nec aliquid Deo potentius invitos Deum & illos separaturum. Quicquid desiderare poterunt electi, illic inveniunt, quia coram à facie ad faciem intuentur eum qui est omnia. Tã magna sunt illius vitæ bona, ut nō possunt mēsurari, tã multa ut non possint numerari, tã pretiosa ut non possint æstimari: erit ibi corporum æterna sanitas, erit animorū summa puritas, erit gloriæ & voluptatis divinæ ubertas, erit perpetua Angelorū & sanctorū familiaritas, erit stupenda

I ; corporum

corporum claritas : Gaudebunt electi propter loci amœnitatem , quem possidebunt : propter jucundam societatem , in qua regnabunt ; propter glorificationem , quam habebunt ; propter mundum , quem contempserunt ; propter infernum , quem evaserunt . Minima æternæ vitæ corona præstantior erit , quàm mille mundi ; quia infinita illa , hi autem omnes finiti . Neque etiam metuenda illis invidia disparis claritatis , quia regnabit in omnibus unitas charitatis , propter summam illam charitatem , quicquid uni electorum accidit , tanto gaudio afficiet reliquos , ac si illis ipsis foret datum . Nullum in cœlo & terra majus bonum quàm Deus . Ideò etiam non potest esse majus ac perfectius gaudium , quam Deum videre , Deum possidere : Ideò etiam per unicum momentum Deum videre superabit omnia gaudia . Videbimus enim Deum seipso , Deum in nobis , & nos in Deo . In via hujus vitæ habemus Christum nobiscum , sed sub Verbi & Sacramentorum velamine tectum : non autem cognoscimus eum per scientiam : In futura vita coràm eum intuebimur , quando panem æternæ satietatis nobis distribuet : quemadmodum discipuli non agnoscebant Christum in via , sed demùm in hospitio , quando panem illis frangebatur . Cœlestis illa Hierosolyma non habet templum manu factum ,

factum, nec Solem nec Lunam; quia templum ejus æternum est Deus ipsius luminare & lucerna. Fidei succedet visio, spei comprehensio; dilectioni perfecta fruitio. In ædificatione templi Salomonis vox securis & mallei non audiebatur: sic in cœlesti Jerusalem nec pœna nec tribulatio sentitur; quia materia hujus templi, lapides scilicet spirituales, jam antè in mundo per tribulationes præparati. Regina ad Salomonem veniens est anima ad Christum in cœlestem Hierosolymam contendens, ingreditur cum multo comitatu sanctorum Angelorum, cum auro & pretiosis lapidibus diversarum virtutum, mirabitur Christi regis sapientiam, & ministrorum, Angelorum scilicet & Sanctorum, ordinem; ciborum mensæ, id est, æternæ refectionis, plenitudinem; vestium pretium, id est, corporum glorificationem; domus pulchritudinem, id est, cœlestis palatii magnitudinem; sacrificiorum, id est, laudum divinarum multitudinem; fatebitur in stuporem conversa, se non potuisse credere ea quæ jam oculis videt. Erigat ergo sese fidelis anima, & parata sibi consideret bonas: eò dirigendus est Spiritus quò aliquando est iturus: in tempore eò contendendum, ubi aliquando in æternitate manendum. Non intrabit in hanc Domini sui gloriam, qui non intrare desiderat. Co-

ram facie Dei aliquando apparere speras ;  
sanctitati ergò studendum , quia & ipse san-  
ctus est : Cœlestium Angelorum expectas  
confortium , vide ergò , nè per peccata repel-  
las ipsorum à te ministerium . Æterna speras ,  
quare ergò tēporalia tantoperè de sideras ?  
Futuram inquis civitatem , quare ergò desi-  
deras hīc locum permanentem ? Ad Christū  
venire desideras , quare ergò mortem times ?  
ejus est mortem timere , qui ad Christum  
nolit ire . Ad cœlestem Hierosolymam in-  
trare desideras , quare ergò tot ac tantis pec-  
catis te contaminas ? cum tamen scriptum  
sit , quod nihil intrabit in eam conquinatum .  
Ligno vitæ aliquando frui desideras , Chri-  
stum verum vitæ lignum in hac vita per ve-  
ram fidem prius apprehendas , quia scriptum  
est : Beati , qui lavant stolas suas in sangui-  
ne Agni , ut sit potestas eorum in ligno vitæ ,  
& per portas intrent in civitatem . Foris  
sunt canes & venefici ; cave ergò impu-  
dicitiam : foris sunt homicidæ : cave  
ergò iracundiam : foris sunt idolis servi-  
entes ; cave ergò avaritiam : foris sunt  
mendaces ; cave ergò omnem peccati ma-  
litiā . Si desideras intrare ad nuptias A-  
gni , Sponsi adventum desidera : Spiritus &  
Sponsa dicunt , Veni . Si non habes artham  
Spiritus , per quem clames , ut veniat Domi-  
nus , nunquam ad cœlestes nuptias te intro-  
ducat

ducat Sponsus; Sponsa non es, si Sponsi adventum non desideras. Vis locum habere in novo cœlo ac nova terra; quare ergò veteribus hisce adhæres? Vis particeps fieri Creatoris, quare ergò egenis adhæres creaturis? Expectas ædificationem ex Deo, Domum non manu factam, æternam in cœlis; quare ergò terrestrem domum hujus nostræ habitationis dissolvi non desideras? Superindui desideras? quare ergò non prospicis; nè nudus inveniaris: Si in hac vita S. Trinitas non inhabitat cor tuum per gratiam, nunquam in futura te inhabitabit per gloriam: Si in hac vita non gustes æternæ felicitatis initium, nunquam plenum percipies complementum.

---

### MEDITATIO XLVII.

De beatissima Dei in cœlo visione.

*Sanctorum patria cœlum.*

**I**N domo patris mei mansiones multæ sunt, verba sunt Salvatoris nostri. Desidero videre locum illum, Domine, in quo æternā mihi præparasti mansionē. Advena enim hic sum & peregrinus, sicut omnes patres mei, dies peregrinationis meæ parvi & mali, igitur in hoc mudi exilio patriā cœlestē desidero: *πολίτευμα* enim meū in cœlo: desidero videre bona Domini in terra viventium.

In imagine pertransit hæc vita , mensurabiles sunt dies mei , & substantia mea tanquam nihilum coràm te: quæ igitur expectatio mea ? nonnè Dominus ? Domine Jesu , quando erit , ut ad te veniam ? quando apparebo ante faciem tuam ? Quemadmodum desiderat cervus ad fontes aquarum , ita desiderat anima mea ad te, Deus . O verum & perfectum & plenum gaudiũ ! ô gaudium super gaudium, vincens omne gaudium, exrà quod non est gaudium; quando intrabo in te , ut videam Deum meum, qui habitat in te ? Adimplebis me lætitia cum vultu tuo Domine, delectationes in dextra tua usque in finem : inebriabor ab ubertate domus tuæ, & torrente voluptatis tuæ potabis me . Apud te est fons vitæ ! O desideratam vitam ! O beatam felicitatem ! in qua sanctissima Trinitas erit perfectio desideriorum nostrorum , quæ sine fine videbitur , sine fastidio amabitur , sine defatigatione laudabitur . Deum videre superabit omnia gaudia . Christum videre, cum Christo vivere, Christum audire , superabit omnia cordis nostri desideria . O Jesu Christe , Sponse animæ meæ suavissime, quando Sponsam tuam in regium adduces palatium ? quid ibi deesse poterit ? quid ibi amplius desiderari poterit aut expectari , ubi Deus erit omnia  
in



in omnibus? Pulchritudo erit visui, mel gustui, cithara auditui, balsamum olfactui, flos tactui: Omnia erit Deus, & distribuet unicuique secundum desiderium cordis sui bona; si vitam desideras, si sanitatem, si pacem, si honorem, ibi Deus erit omnia in omnibus. Quæ summis in Ecclesia doctoribus obsignata modo sunt mysteria, vel puellulis ibi erunt obvia. Aderit nobis benedicta Christi humanitas, & de absconditis salutis nostræ mysteriis voce concionabitur suavissima. Vox ipsius dulcis, atque facies ejus decora; diffusa est gratia in labiis ipsius, gloria & honore incedit coronatus. Quod si Deus erit omnia in omnibus, utique etiam erit plenitudo luminis intellectui, multitudo pacis voluntati, continuatio æternitatis memoriæ. Saturabit Filius intelligentiam plenissima cognitione; Spiritus S. voluntatem suavissima dilectione; Pater memoriam secunda utriusq; recordatione: Tu, ô Deus, lumen eris, in cujus lumine videbimus lumen, te scilicet in te, in splendore vultus tui, quando te videbimus à facie ad faciem. Neque solum te videbimus, sed etiam tecum vivemus, sed etiam te laudabimus; neque solum te laudabimus, sed gaudii tui consortes erimus; neque solum tecum gaudebimus, sed Angelis etiam similes erimus; neque

neque Angelis solum, sed ipsi etiam Deo benedicto in sæculum. Obstupeſcat hæc fidelis anima, & miſericordiam Salvatoris ſui adoret. Non in gratiam ſolum inimicos recepit, ſed peccata remittit, ſed juſtitiam donat, ſed ad cœleſtem deducit hæreditatem, imò Angelis & ſibi ipſi nos ſimiles reddit. O beatiffima civitas! O cœleſtis Hieruſalem! O ſancta ſanctiffimæ Trinitatis ſedes! quando erit, ut ingrediar templum tuum? Templum cœleſtis Hieruſolymæ Agnus eſt, Agnus nimirum, qui peccata mundi tollit, & pro eis ab origine mundi occiſus. Quando erit, ut adorem in templo illo Deum meum, Deum ſcilicet in Deo? Quando orietur mihi Sol iſte, qui illuminat civitatem illam Sanctam? Exulo adhuc à patria mea, ſed repoſita mihi eſt hæreditas ampla. Credentibus poteſtas per Chriſtum facta filios Dei fieri. Quod ſi filii ſumus, utique etiam hæredes, hæredes quidem Dei, cohæredes verò Chriſti. Erige, te anima mea, & aspira ad hæreditatem tuam. Dominus pars hæreditatis meæ, & merces mea magna valdè. Quid præter hoc donare poſſet miſericordiſſima Dei benignitas? Vitam donat: Filium donat: Semetiipſum donat: quod ſi adhuc majus aliquid in cœlo atque terra ſciret, illud ipſum nobis donaret. In Deo vivimus, templum Dei ſumus, Deum poſſi-

demus,

demus , hic quidem in Spiritu atque myste-  
rio , illic autem in veritate . Ibi nostra spes  
erit res , ibi non solum permanebimus sed  
etiam habitabimus in æternum.

---

## MEDITATIO XLVIII.

De suavissima Angelorum in cœlo  
associatione.

*Cœlestis curia nostra est.*

IN resurrectione mortuorum neque nubent,  
neque uxores ducent , sed erunt sicut An-  
geli Dei in cœlo. Ecquis hanc beatorum di-  
gnitatem, dignis celebrare potest encomiis ?  
In cujus hominis cor hæc beatorum gloria  
ascendit ? Electi gloria resurrectionis inno-  
vati , absque ullo mortis metu , abs-  
que ulla corruptionis labe , salvifica Dei  
fruentur visione. Vidi Dominum à facie ad  
faciem, & salva facta est anima mea, exclamat  
divus Patriarcha. Quod si momentanea Dei  
visio tantum potuit apportare lætitiæ cumu-  
lum, quid poterit visio ejus æterna? Si Dei in  
forma hominis apparentis intuitus salutē &  
vitā attulit animæ, utiq; visio ejus à facie ad  
faciem vitam & beatitudinē afferet æternam.  
Quid igitur ad hanc felicitatē accedere præ-  
terea possit. Quid præter Dei visionem desi-  
derare

derare poterunt electi? Nihilo tamen minus beatissimo & suavissimo Angelorum fruuntur consortio. Neque solum consortio illorum fruuntur, sed etiam similes illis erunt, corporum scilicet agilitate, claritate, immortalitate. Induemur eadem cum illis veste: in stolis albis coram throno Agni assistentes æternum psallemus Domino canticum: in eadem virtutum fulgebimus corona; eodem immortalitatis gaudebimus privilegio. Vidimus Angelum Domini & moriemur, exclamat Manoah: nos autem videbimus millia millium, & decies millies centena millia Angelorum, & vivimus in æternum. Quod si ἰσάγγελοι erimus, utique metuendum non erit amplius, nè peccatorum dissimilitudine ab illis separemur. Exuemur pannosa naturæ peccatricis tunica, & nuditas nostræ salutis operietur vestimento, atque candidissima induemur innocentie stola. Nemo ibi læditur, irascitur nemo, invidet nemo, cupiditas nulla exardescit, nulla honoris aut potestatis pulsat ambitio. Peccatorum pondere non gravabimur, neque peccatorum maculas poenitentibus lachrymis deflere cogemur, neque metuenda amplius lethalia animæ vulnera. Vicitenim Leo de tribu Juda; vicimus in virtute ipsius omnes. Quod si ἰσάγγελοι erimus, utique nullum aderit cibi aut potus desiderium. Deus

us erit cibus noster, in cuius delectatione satiabimur ; Deus erit cibus noster , qui solus reficit nec deficit. Non esurient beati, nec sitient , non percutiet eos æstus & Sol, quia Miserator eorum reget eos , & ad fontes aquarum potabit eos : ibi de ventre fluent flumina aquæ vivæ : ibi paratum convivium pinguium medullatorum, convivium vindemiæ defecatæ . Epulabimur & lætabimur, & præ lætitia cordis jubilabimus. Domine Jesu, perficiantur hæc in Spiritu & veritate! de fructu vitis bibemus in regno Patris tui , sed in Spiritu & veritate. Verba enim quæ locutus nobis, Spiritus & vita sunt, atq; huius sæculi verbis futuræ vitæ declaras gaudia. Quod si ἰσχυροὶ erimus , utique etiam mortis auferetur metus: absorpta erit mors in victoria : præcipitata erit mors in sempiternum, & absterget Deus omnem lachrymam ab oculis populi sui. Gaudium igitur erit sine tristitia , quod continet æternam lætiam! Salus erit sine dolore, vita sine labore , lux sine tenebris : amor nunquam tepescet , gaudium nunquam decrescet , gemitus non audietur , neque dolor sentietur, triste nihil videbitur lætitia semper habebitur; ibi summa & certa securitas , secunda tranquillitas , tranquilla jucunditas , jucunda felicitas, felix æternitas, æterna beatitas beata Trinitas, Trinitatis unitas , & unitatis Deitas , & Deitatis

Deitatis beata visio. Erige te, anima mea, & honorem à Christo nobis collatum altius perpende. Consociabimur Angelorum & Archangelorum cœtibus, thronis, & dominationibus, principibus & potestatibus, neque solùm sociabimur, sed etiam similes erimus. Agnoscemus ibi Angelum custodiæ in vita olim deputatum: neque egebimus ipsius ministerio, sed suavi ejus lætabimur contubernio. Non desiderabimus ipsius protectionem, sed ob suavem gaudebimus societatem, & claritatem ipsius oculis intuebimur clarificatis. Quod si ἰσχυροὶ erimus, utique corpora nostra fragilia, debilia, mortalia immutabuntur, & spiritualia, agilia, immortalia efficientur. Lucida erunt quia Deo propinqua, qui habitat in luce inaccessiblei, & luce vestitus est: incorruptibilia erunt, quia Angelis, imò corpori Christi clarificato conformia. Seminantur hic in corruptione, resurgent in incorruptione: Seminantur in ignobilitate, resurgent in gloria: Seminantur in infirmitate, resurgent in virtute: Seminatur corpus animale, resurget corpus spirituale, quod fulgebit sicut splendor firmamenti in æternum. Veni, Domine Jesu, & gloriæ illius participes nos effice.

MEDITATIO XLIX.  
De tormentorum infernalium.  
gravitate.

*Semper meditare gehennam.*

**C**Ogita, devota anima, pœnarum inferni gravitatem, & facilè superabis omnem pravam peccandi voluptatem. Erit ibi præsencia omnis mali, & erit absentia omnis boni. Quid mali illis deesse poterit, qui puniuntur propter summum malum, scilicet peccatum? Quid boni illis adesse poterit, qui sunt remoti à summo bono, scilicet à Deo? Erit ibi calor ignis, & rigor frigoris, erunt ibi perpetuæ tenebræ; erit ibi fumus & perpetuæ lachrymæ; erit ibi aspectus terrificus Dæmonum; erit clamor in perpetuum; erit ibi ariditas, sitis, fautor sulphuris, vermis conscientiæ, timor, dolor, pudor & confusio peccatorum omnibus manifestorum, invidia, odium, tristitia, divinæ visionis carentia, omnis spei ablatio. Separabitur Dei virtute claritas ignis ab ejus adustiva virtute: claritas cedit in gaudium Sanctorum; vis adustiva in tormentum damnatorum. Lucebit miseris non ad consolationis objectum, ut videant, unde gaudeant, sed ad miseriæ augmentum, ut cernant, unde magis doleant. Visus aspectu solis ac stellarum omnium privabitur, sicut etiam visione

visione Christi & Sanctorum omnium : punietur autem fletu , fumo , dæmonum ac omnium damnatorum aspectu. Aures damnatorum ejulatus & assiduas blasphemias , ut , & horribiles dæmoni rugitus audient. Gustus affligetur siti & fame , ac omni ciborum ac potus privabitur voluptate. Odoratus fœtore sulphureo torquebitur. Tactus ignem intus & extra urentem , atque ad medullas usque penetrantem sentiet. Corpora damnatorum erunt deformia , obscura , tarda , ponderosa . Torquebitur memoria peccatorum recordatione ; neque tam dolebit se peccasse , quam voluptates suas perdidisse . Una scintilla gehennæ ignis plus peccatores lædet , quàm si fœmina in labore & partu prolis perseverando mille annos perduret : Erit ibi fletus ex dolore , & stridor dentium ex furore : In carne cruciabuntur per conscientiae vermem : nullum erit vitium , quod non habeat ibi proprium aliquem cruciatum. Sicut nihil in regno Dei desideratur , quod non inveniatur ; ita in inferno nihil invenitur quod desideratur. Nihil ibi proderit damnatis , quod in hac vita delitiis variis usi fuerint ; quin potiùs earum recordatio graviùs torquebit . Nihil proderit damnatis , quod in hac vita in perpetua saturitate & ebrietate vixerint ; quia tunc nè guttulam quidem aquæ obtinere possunt . Nihil proderit eis ,  
quod



quod vestibus usi fuerint splendidis; quia induentur confusione, & corpora ipsorum vestientur ignominia. Nihil proderit eis, quod in hac vita constituti fuerint in honoribus, quia in inferno nullus erit honor, sed continuus gemitus & dolor. Nihil proderit eis, quod in hac vita cumulaverint divitias; quia ibi æqualis erit omnium paupertas. Remoti erunt à beatifica Dei visione. Deum non videre, omnia gehennæ superat supplicia: Dei faciem si in carcere inferni inclusi viderint damnati, nullam pœnam, nullum dolorem, nullamque tristitiam sentirent: Iram Dei experientur, & tamen beatificam Dei faciem nunquam intuebuntur: Sentient pœnas à facie ejus, cujus tamen faciem nunquam contemplabuntur. Ira Dei ignem æternæ damnationis perpetuò instar sulphurei torrentis succendit. Nec solum à Dei contemplatione removebuntur, sed etiam à dæmonum conspectu miserabiliter cruciabantur: Sentient eorum flagella, quorum in hac vita secuti sunt magisteria. Si spectari alicujus intuitus hominem in hac vita fermè exanimat: quid poterit horribilis dæmonum in æternum duraturus aspectus? Neque solum cogentur damnati dæmonibus perpetuò conversari; sed etiam sentient se in æternum ab illis cruciari. Si in hac vita ex permissione divina diabolus tam graviter

vitè, cruciabit damnatos, potestati suæ in æternum traditos? Dammati non solum cruciabuntur per dæmones exterius, sed etiâ per conscientie vermẽ interiùs: omnia omnino, quæ unquam perpetraverunt peccata, oculis eorum assiduè erunt objecta: tanto autem erit gravius tormentum, quia non amplius restat pœnitentie beneficium: quando virgines paratæ intraverint cum Sponso, statim claudetur janua; januam intellige indulgentiæ, januam misericordiæ, januam consolationis; januam spei, januam gratiæ, januam conversionis sanctæ: clamabunt damnati, & dicent montibus ac petris; Cadite super nos, & abscondite nos, ab ira Agni: sed clamor iste erit frustraneus, quia cœlum & terra fugient ab ira ejus: sicut scriptum est. Fugit in omnis insula, & montes non sunt inventi. Quicquid datum fuerit electis ad gloriæ augmentum; id omne cedit damnatis ad dolorum incrementum. Erunt quidem pœnarum gradus; sed tamen qui minora sentit tormenta, nulla exinde percipiet levamenta; qui majoribus torquetur cruciatibus, invidebit illi, qui affligitur minoribus. Non percipient damnati inde aliquod levamentum, quod quidam cognatorum vel amicorum in cœleste recepti sunt palatium; quia etiam electi nullam inde sentiunt tristitiam, quod

quod sciunt quosdam suorum cognatorum ad æternam transiisse gehennam. Tanta ibi in damnatis erit dolor & cruciatus, ut mens ad aliud dirigi non possit, nisi ad quod vis doloris impellit; Prosequentur damnati odio omnes Dei creaturas, prosequentur odio se ipsos invicem: Prosequentur odio Angelos sanctos, homines electos, adeoque Deum ipsum, non quidem in se & in natura sua sed in iustitiæ effectis. Omnia mala hujus vitæ singularia sunt: unus gravatur paupertate, alter torquetur morbi gravitate: unus dura premitur servitute, alter conviciorum oneratur mole: sed illic simul omnes omnibus torquebuntur malis; dolores ibi erunt universales in omnibus sensibus & membris. In hac vita omnes molestias mitigat spes levationis; sed illic nulla relicta est spes liberationis: Pœna inferni non solum est æterna: sed etiam nunc per momentum quidem interrupta. Atque hinc est, si omnes homines nati ab Adam usque ad hodiernum diem, & amplius nascituri viverent usque ad novissimū diem, & si unam pœnam quam anima pati cogitur pro uno peccato in inferno, ex æquo paterentur, tunc particula quævis illius pœnæ unius hominis major esset, quam omnia tormenta, quæ omnes raptores & malefici unquam essent perpeffi.

perpeffi. O domine, da ut gehennam cogitemus, ne in gehennam incidamus.

---

## MEDITATIO L.

De pœnarum infernalium æternitate.

**C**Ogita, devota anima infernalium pœnarum æternitatem, & rectius perpicies earum gravitatem. Est in inferno flamma fluens, & sine fine perurens; Vita damnatorum est sine fine mori; Mors eorum est in æternitatis pœnis vivere. Nec qui torquet, fatigatur; nec qui torquetur aliquando moritur; sic igitur ibi consumit, ut tamen semper reservet; sic tormenta ibi augentur, ut tamen semper renoveantur; sic damnati morientur, ut semper vivant; sic vivent, ut semper moriantur. Sine ullo unquam fine aliquem torquendum esse, id verò ultra omnes desperationis fertur terminos. Quid enim gravius, quam semper velle quod nunquam erit, & semper nolle quod nunquam non erit? In æternum damnati non assequantur quod volunt, & quod nolunt, in æternum pati cogentur. Quando cessabit Dei ira, cessabit etiam damnatorum pœna; sed æterna est ira; æterna igitur & pœna: Quando pœnitentiam veram agent damnati, à peccatis suis poterunt liberari; sed præclusum est tempus pœnitentiæ; nulla ergo spes

spes restat indulgentiæ . Quando torquere cessabunt Diaboli , torqueri cessabunt damnati; sed nunquã cessabit furor Diaboli; nunquã ergò cessabit cruciatus hominis damnati Quando mutabitur Dei justitia, mutabuntur etiam damnatorum supplicia; sed invariabilis Dei justitia; æterna igitur erunt damnatorũ supplicia . Ad districti judicis sententiam pertinet , ut nunquam careant supplicio, qui in hac vita nunquam carere voluerunt peccato. Æquum est , ut nullus detur damnato terminus ultionis; qui quam diu valuit, habere noluit terminum criminis: Damnati peccarunt in suo æterno , id est, quamdiũ vixerunt , justum est, ut puniantur in Dei æterno . Cum fine deliquerunt , quia cum fine vixerunt ; non voluissent utique cum fine delinquere si potuissent sine fine vivere, ut possent sine fine peccare . Æterna quoque est ignis infernalis materia , peccati scilicet macula; meritò igitur æterna etiam pœna. Non removebitur ab oculis Dei peccatorum in damnatis turpitudine; quomodò ergò remove-ri poterit suppliciorum in peccata constitutorum magnitudo ? Peccatum insuper est infinitum malum, quia contrà infinitum bonum commissum & Christus pro eo persolvit infinitum pretium ; meritò ergò in eos , qui moriuntur in peccatis infinitum constituitur supplicium. Peremit in se homo bonum

num æternum ; justo ergò Dei judicio incidit in malum æternum . Creavit Deus ab initio hominem ad sui imaginem , ut in æternum eò secum vivere posset : reformavit Deus hominem in peccatum prolapsum per Christum ad sui imaginem ; paravit omnibus æternæ salutis media ; & obtulit omnibus æternæ vitæ præmia , justum igitur est , ut , qui æternis carere voluerunt præmiis , æternis subjiciantur suppliciis . Nunquam à damnatis auferetur voluntas mala ; nunquam ergò auferetur malæ voluntatis pœna . Elegerunt damnati momentaneam voluptatem & finita mundi bona præ infinito bono Deo : aspirarunt potiùs ad fugacis & brevissimæ hujus vitæ delicias , quam ad æternæ vitæ divitias : æquum igitur est , ut infinitas sentiant pœnas . O æternitas interminabilis ! ô æternitas nullis temporum spatiis mensurabilis ! ô æternitas nullo intellectu humano perceptibilis ! quantum auges damnatorum supplicia ? post innumera annorum millia semper cogitare cogentur , hoc ipsis tantum esse tormentorum principium . Quàm grave est in mollissimo lecto per triginta annos immobilem jacere ; quid erit in sulphureo isto lacu triginta millia millium annorum ardere ? O æternitatis , æternitas ! tu sola ultra omnem modum supplicia damnatorum exaggeras . Gravis est damnatorum

damnatorum poena propter suppliciorum  
diversitatem ; gravissima propter supplici-  
orum æternitatem. Mors erit ibi sine mor-  
te, erit finis sine fine, defectus sine defectu ;  
quia mors semper vivit, & finis semper inci-  
pit, & defectus deficere nescit. Quærent  
damnati vitam, & non invenient, quærent  
mortem, & mors fugiet ab eis. Post anno-  
rum centum millena millium millia sine ul-  
lo fine ad rediviva revertentur tormenta.  
Plus cruciabit eos cogitatio de continuatio-  
ne doloris, quàm sensus tormenti exterioris.  
Quid potest esse miserum magis, quàm  
ita mori, ut semper vivas, ita vivere, ut  
semper moriaris ? Vita ista erit mortifera,  
& mors immortalis. Si vita es, cur occidis ?  
Si mors, quomodo semper duras ? Æter-  
nitas qualis sit, perfectè non cognoscimus ;  
non enim dubium, quin id, quod nulla tem-  
poris mensura circumscribitur, nullâ etiam  
creatâ mente comprehendatur : si quid ta-  
men de spatio æternitatis vis æstimare, tem-  
pus antemundanum debes cogitare : si potes  
invenire Dei principium, poteris etiam inve-  
nire quando finem habiturum sit damna-  
torum supplicium. Finge tibi montem  
quendam altissimum, qui magnitudine ex-  
cedat cœli & terræ spatium ; finge, quandam  
volucrum quibuslibet mille annis deportare  
ex hoc monte granulum tenuissimi pulveris :

K

sperandum

sperandum esset, ut tandem post incomprehensibilia multa annorum milia finiretur magnitudo illius montis: sed non potest sperari ut finiatur aliquando infernalis iste ignis. Nunquam finientur electorum præmia; nunquam etiam finientur damnatorum supplicia: quia, ut infinita est Dei misericordia erga electos, ita infinita est Dei justitia erga reprobos. Statue, tot esse tormentorum species in damnatis, quot sunt guttulæ magni maris: finge, post millesimum quemque annum advolare quandam aviculam, & exhaurire tenuam maris guttulam; sperandum esset fore, ut exhauriatur tandem maris copia: sed sperari non potest finienda esse aliquando damnatorum supplicia. O devota anima, semper tibi obversetur poena damnatorum æterna: Gehenna meminisse, prohibet in gehennam incidere. Sit cura agendæ poenitentiae, dum adhuc tempus est indulgentiæ. Quid aliud devorabit ignis iste quem peccata tua? Quo magis peccata cumulas, eò majorem comburandi materiam reservas. O Domine Jesu, qui pro peccatis nostris satisfacisti tua passione, custodi nos ab æterna damnatione; Amen.



## MEDITATIO LI.

De spiritali piorum resurrectione.

*Cum Christo surgere vita est.*

**N**on prodest Christi resurrectio, nisi in te quoque Christus resurgat. Sicut Christum oportet in te concipi, nasci, vivere: Ita quoque oportet in te eum resurgere. Omnem resurrectionem præcedit mors, quia non resurgit, nisi quod cecidit: Ita quoque res se habet in spiritali hac resurrectione. Non resurget in te Christus, nisi prius Adam in te moriatur: Non resurgit homo interior, nisi sepeliatur prius exterior: Non prodibit novitas Spiritus, nisi prius abscondatur vetustas carnis. Nec sufficit, semel in te Christum resurgere, quia vetus Adam non potest extinguere uno momento: quotidie vult in te reviviscere vetus Adam; quotidie eum extingue, ut in te quotidie Christus incipiat vivere. Non ascendebat Christus in cælum, neque in suam gloriam intrabat, antequam resurgeret ex morte: Ita non poteris ad cælestem intrare gloriam, nisi Christus prius in te resurgat, atque in te vivat. Non est pars corporis Christi mystici, in quo Christus non vivit, nec deducetur à Christo ad Ecclesiam triumphantem; nisi qui fuerit pars corporis ejus in Ecclesia militante.

Conjugium præcedit desponsatio : non introducetur anima ad nuptias cœlestis Agni, quæ non per fidem Christo in hac vita desponsata, & arrha. S. Spiritus obsignata. Resurgat ergò & vivat in te Christus, ut cum ipso in æternum vivas. Hæc est resurrectio prima: Beatus & sanctus, qui habet partem in resurrectione prima; in hunc secunda mors non habet potestatem. Si in resurrectione corporum ad vitam vis prodire, quotidie debet Christus in hac vita in te resurgere. Resurgente Christo Sol oriebatur: ita si spiritualiter Christus in te resurgat, orietur in anima tua lux salutaris Dei agnitionis : quomodo ibi possit esse lux salvificæ Dei cognitionis; ubi adhuc locum habent peccatorum gravissimorum tenebræ? timor Domini initium sapientiæ, quomodo ergò ibi possit esse lux salvificæ Dei cognitionis; ubi adhuc locum habent peccatorum gravissimorum tenebræ? timor Domini initium sapientiæ, quomodo ergò ibi possit esse cœlestis sapientia, ubi timor Domini locum nunquam habuit? Qui verò luce divinæ cognitionis destitutus est in hac vita, quomodo potest fieri particeps æternæ lucis in vita futura? Filii lucis solùm transeunt ad æternam lucem; filii tenebrarum ad æternas transeunt tenebras. Christus resurgens triumphaverat de morte: sic in quo Christus spiritualiter resurgit,

git, à morte ad vitam transit; neq; enim potest vinci à morte, in quo vivit victor mortis. Christus resurgens adduxit secum justitiam perfectam; mortuus enim est propter peccata nostra, resurgit propter justitiam nostram: Ita quoq; in quo Christus spiritualitèr resurgit, justificatus est à peccato; quomodo enim ibi peccata haberent locum, ubi viget & vivit perfecti Christi justitia? Applicatur à nobis illa Christi justitia per fidem. Christus resurgens victoriam ex Satana referebat, qui in suo ad inferos defensu regnum ejus destruxerat, palatium ejus expoliaverat, arma ejus confregerat; ita quoque in quo spiritualitèr Christus resurgit, illi Satanas prævalere non potest; neque enim potest vinci à Satana, in quo vivit victor Satanæ. Christo resurgente terræ motus factus est magnus: spiritualis illa cum Christo resurrectio non fit sine seria commotione & cordis contritione; verus ille Adam non potest extinguì sine luctu & renitentia; ergò etiam Christus non potest spiritualitèr in te resurgere sine magna commotione. Non fit spiritualis cum Christo resurrectio, nisi fiat peccati abolitio: non fit peccati abolitio, nisi præcedat peccati agnitio: nondum adest vera peccati agnitio, nisi ad sit seria cordis contritio; Ergò non fit spiritualis Christi resurrectio, nisi præcedat interior cordis contritio. Dicebat. S. Ezechias. Sicut

leo, contrivit omnia ossa mea. Vide magnam commotionem. Sed statim addit; Domine, sic vivent, & in iis erit vita spiritus mei: corripies me, & vivificabis me; projecisti post tergum tuum omnia peccata mea. Vide spiritualem à peccatis resurrectionem. Christo resurgente Angelus Domini descendens de cælo sedit super sepulchrum: Ita si spiritualiter Christus in te resurgit, Angelorum poteris gaudere associatione. Ubi vivit adhuc & regnat vetus Adam, ibi gratum cubile Diaboli: Ubi verò vivit & regnat Christus, ibi habitari gaudent Angeli. Scriptum est enim, quod sit gaudium in cælo super peccatore agente pœnitentiâ. Ubi autem vera pœnitentiâ, ibi quoq; Christus spiritualitèr resurgit. Ubi Christus nondum resurrexit spiritualitèr, ibi nondum est Dei gratia. Ubi autem nondum est Dei gratia, ibi nec Angelorum custodia. Ubi nondum spiritualitèr Christus resurrexit, ibi adhuc regnat vetus Adam: ubi autem regnat vetus Adam, ibi adhuc regnat peccatum: ubi autem regnat peccatum, ibi diabolus regnat: quæ autem communio esse potest Angelorum cum diabolo? Christus resurgens apparuit suis discipulis, eisq; vivum se exhibuit: ita, si spiritualis resurrectionis particeps factus es per fidem, ostende te vivum Christi membrum per charitatem. Non judicatur homo vivus, si non opera vitæ manifestet exterius. Ubi  
Christus

Christus ibi etiam Sanctus Spiritus, ubi sanctus spiritus, ibi agit ac impellit ad omne opus bonum, quia qui Spiritu Dei aguntur illi sunt filii Dei. Si ergo in Spiritu vivimus, in Spiritu etiam ambulemus. Solis lux undique spargit radiorum splendorem, fidei lux undique diffundit charitatis fervorē. Tolle lucem à sole, & separare poteris charitatem à vera fide. Peccata sunt opera mortua; si in mortuis operibus ambulas, quomodo tu in Christo, Christus in te vivit? Peccata pertinent ad veterem Adamum, si adhuc in te regnat vetus Adam, quomodo cum Christo spiritualiter vivis? Peccata pertinent ad vetustatem carnis, si in vetustate carnis ambulas, quomodo novus homo in te vivit? Excita nos, ô bone Jesu, à peccatorum morte, ut ambulemus in novitate vitæ: mors tua veterem Adamum in nobis extinguat: resurrectio tua interiorem nostrum hominem ad vitam revocet; sanguis tuus lavet nos à peccatis; resurrectio tua justitiæ vestem nobis induat. Ad te, ô vera vita, suspiramus nos in peccatis mortui: Ad te, ô vera justitia, suspiramus nos per peccata averſi: Ad te,

ô vera salus, suspiramus nos  
propter peccata damnati.

Vivifica justifica, salvi-  
fica. Amen.

FINIS.

1771  
The first of the year  
The first of the year

The first of the year  
The first of the year

The first of the year  
The first of the year

The first of the year  
The first of the year

The first of the year  
The first of the year

The first of the year  
The first of the year

The first of the year  
The first of the year

# INDEX.



1. DE vera peccatorum agnitione.	1
2. Exercitatio Pœnitentiæ ex Domini passione.	5
3. De fructu veræ pœnitentiæ.	9
4. Meditatio de nomine Jesu.	14
5. Exercitatio fidei ex amore Christi in agone mortis.	17
6. Consolatio Pœnit. ex passione Ch.	20
7. De fructu passionis Dominicæ.	25
8. De certitudine salutis nostræ.	29
9. De amando solo Deo.	32
10. De nostri cum Deo reconciliatione.	38
11. De satisfactione pro peccatis nost.	42
12. De nat. ac proprietatib. veræ fidei.	46
13. De spirit. conjugio Ch. & animæ.	51
14. De mysteriis incarnationis.	55
15. De salutari fructu incarnationis.	60
16. De spiritali piorum refectione.	63
17. De Baptismi fructibus.	68
18. De salutari corporis & sanguinis Christi participatione.	73
19. De cœnæ Dominicæ mysterio.	77
20. De seria ante usum cœnæ prepar.	81
21. De Christi ascensione.	85
22. Homilia de Spiritu sancto.	81
23. De Ecclesiæ dignitate.	94

# INDEX.

24. Meditatio de prædestinatione.	99
25. De salutari precum efficacia.	104
26. De sanctorum Angelorum custodia.	110
27. De insidiis Diaboli.	145
28. Generales pie vivendi Regulae.	119
29. De securitate excutienda.	125
30. De sancta vitæ Ch. imitatione.	130
31. De sui abnegatione.	135
32. De vera quiete animæ.	140
33. De conscientia puritate.	145
34. De studio verae humilitatis.	151
35. De avaritia fugienda.	155
36. De proprietatib. vera charitat.	161
37. De studio castitatis,	166
38. De vitæ præsentis fugacitate	172
39. De Mundi vanitate.	177
40. De utilitate tentationum.	182
41. Fundamenta patientiæ Christi.	187
42. Quom. vincenda tentatio à pers.	192
43. De quotidiana mortis considerat.	195
44. Consolatio in morte amicorum	200
45. De Judicio extrema.	205
46. De vitæ æternæ desiderio	209
47. De beatif. Dei in cælo visione	215
48. De suavissima Angelorum in cælo associati- one.	218
49. De tormentorum inferni gravit.	223
50. De pœnarum infernalium grav.	228
51. De spiritali piorum resurrectione	233

Finis Indicis.





*Series patefacti divinitus parricidii in  
Maximum Regem Regnumque  
Britanniae cogitati & instructi.*

**D**ubitatum jam olim ab Anti-  
quitate est, utrum omnibus  
sceleribus indicere poenam,  
an omittere praestaret ea quo-  
rum immiantatem natura re-  
fugit: Credo quod male ominari nolent  
pelriq; de genere humano, aut etiam admo-  
nere haec fieri posse scelera quae damnarent.  
Sed haec aetas & nefandum hujus diei par-  
ricidium dubitantibus scrupulum ademit; o-  
stendit, corruptos animos licentiam sibi fa-  
cere, quantam rivuli crepidinibus ruptis, qui  
neque alvei meminerunt, nec nisi per mon-  
tium insperatos obices castigantur. Ingens,  
atrox, horridum facinus, quale nec antiqui-  
tas vidit, & ægrè posterì credent; denique  
velut omnium flagitiorum compendium in  
hanc diem fortuna contulit. Non ulciscar  
atrocitate verborum quod nulla nunquam  
supplicia dignè vindicarint. Rem apperi-  
am

## CONSPIRATIO

am tanta fide quanta perfidia gesta est. Po-  
 puli Nationesque vel stupore damnabunt  
 vel atrocioribus lacerabunt poenis quam  
 quas styli iracundia profunderet. Augu-  
 stissimo Jacobo tertium annum imperante  
 agebat in alta pace Britannia; nihil tumultus  
 domi, cum externis foedus. Non videbatur  
 posse tentari fundamentum tam bene valla-  
 ti Imperii. Cujus ut certius securitas vive-  
 ret, erant dictæ publicis Comitibus Nonæ  
 Novembris; ( incidit ille dies in 15. No-  
 vemb. Stylo novo: ) id est, vocati Ordines  
 Regni qui de negotiis publicis cognoscerent.  
 Westmonasterium est oppidum in Londi-  
 no continuatis domibus annexum, ut ea  
 sola appellatio disjungat. In eo, & Regia  
 ad amnem sita & secundum eandem ripam  
 paulo superius Curia quæ hos Regni Con-  
 ventus accipit. Sacratissimis Regibus di-  
 gna tanta Majestate sedes. Ad eorum pe-  
 des serenissimi liberi. Cum reges sacrorum  
 Antistites & quos Britannica lingua Domi-  
 nos appellamus, nempe duces, Marchiones,  
 Comites, Vicecomites, & Barones, purpure-  
 is vestibus, & capitibus ex antiquissima con-  
 suetudine rectis. Civium mox delecti. Ju-  
 dices deinde ac magistratus, & Regis bene-  
 ficio exterarum Gentium legati. Regiis e-  
 tiam domesticis certa sedes. Jam reliqui  
discriminibus confusis, quot capacissi-  
ma

## A N G L I C A N A.

ma sedes accipere potes: neque enim melioris notæ quisquam excluditur ab oratione Regis quâ initium Concilio facit. Non est celebrior in orbe terrarum confessus. Igitur, quum jam instaret illius diei pompa, forte vir ipsa celeritate ignotus Nobilissimi Baronis Montaquilii puero literas porrigit: eas Domino suo reddere jubet. Nec ulterius cunctatus quam ut Epistolam traderet, quod est facile in tam populosa urbe, præsertim nihil sollicitante puero, se per transeuntes hominum globos confudit. Servus, ut erat imperatum, Montaquilio literas tradit: quas aliquandiu neglectas tandem in hæc verba conscriptas legit.

Amicitia, quæ mihi est cum tuorum aliquot, facit ut tuæ salutis curam habeam. Ideo monitum volo, ut, quo studio vitam amas, eo incumbas prætexandis exculationibus quæ te à publico Ordinum conventu eximant. Numen enim & homines conspirarunt in ultionem scelerum quæ hæc ætas tulit. Neq; præcautionem spreveris, sed discede ab urbe ocus in aliam regni partem, ubi rei exitum securus expectes. Etenim licet nulla motuum initia se prodant, dico, terribilis ictus in hunc Conventum incider, neq; erunt in læsorum conspectu hi qui lædent. Non est quod consilium temnas, quod prodesse tibi potest, nocere minime potest:  
quippe

## C O N S P I R A T I O

quippe periculi nihil erit his exustis literis .  
Eo te recte usurum spero beneficio Numia  
nis. Cujus tutelæ te resigno.

Literæ istæ erunt Anglico sermone scri-  
ptæ, eo charactere quem vulgò Italicum di-  
cimus. Montaquilius rei novitate perculsus ,  
epistolam ad Nobilissimum Salisburiensem  
Comitem desert , quid facto opus censeat ,  
consultit . Hic fidelissimus & sagacissimus  
Purpuratus agitare secum varia. Modo cogi-  
tare, nihil, inausum sceleri esse: impia facinc-  
ra tam mirabiliter aperiri quam flagitiosè  
concipiuntur: Nunc otiosas populi voces re-  
putare & inanes vaticinantium metus , qui  
sæpe nullo argumento calamitates publicas  
portendant. Inter hanc animorum jactatio-  
nem pene factum ut nullius fidei literæ ha-  
berentur . Tamen ne quid etiam tutum in  
tanto negotio non timerent , placuit de ea  
re ad nonnullos sanctissimi Concilii referri.  
Lectæ epistola in aliquorum cœtu pluribus  
risum quam securitatem excussit. Evincebat  
opinio refutantium hos timores , quum in  
tanta tranquillitate rerû nec timendum cen-  
serent, nec excitandos divulgatis suspicioni-  
bus rumores qui destraherent populi men-  
tes & ineptis terroribus consternerent. Quem  
enim jam in Britannia rebellare ? quem ha-  
bere comparatam in Insula manum ? aut cu-  
jus

# ANGLICANA.

ius vires instar hyberni torrentis, ut in ipsa satellitum turba Regem opprimat? Iteratò tamen de eadum re actum. Excussæ diligentius timoris causæ, tandèmq; decretum ut de eo negotio Rex ipse cognosceret. Is prælectis diligenter literis, haud secus quam pro re motus, se vero non contemnere, dixit, hanc vocem quam ipsi sceleri bona fortuna extorserat.

Voluerunt fata, ut suorum quidem fidelitati, suæ vero prudentiæ vitam Rex tantus deberet. Cum enim diligentius inhæreret illi literis, subito exclamavit, (dices hanc chartam plus illi quam cæteris dixisse) aut nihil se videre, aut facinorosos destinasse sulphurei pulveris tormento grande scelus exequi: nec dubitare se quin ipsam Curiam cum purpuratis omnibus hoc fulmine humano velint de sedibus suis movere, regnumque in suis capitibus exterminare. Jam subita Regis divinatio omnibus incusserat metum, & quoniam illius constantiam noverant, & quia iis argumentis nitebatur quæ necdum alius ad verterat. Quid enim, agebat, quod scribunt non fore in læsorum conspectu hos qui lædent? quid est aliud quam hos machinas & sulphuris violentiam minari? Quod deinde exustis literis cessare periculū aiunt, numquid obscure dictū est subitā fore  
flammam

## C O N S P I R A T I O

flammam quam qui evaserint in securo consistant? Obstupescantibus ad tantam solertiam cunctis, tamen factorum iniquitas pene tanti consilii prudentiam extinxit. Etenim cum pridie illius diei, qui ad publicis Conventibus & tanto sceleri erat indictus. Rex delegasset provinciam perscrutandi omnes latebras, unde hæc tempestas posset erumpere, Nobilissimo Suffolciensi Comiti, Summo Regii Cubiculi Præfecto: Ipse investigatis diligenter omnibus, retulit, non esse certum tanti facinoris indicium, nec in infericri sede ac velut subteranea, quæ Cuius subiacet, advertere aliud potuisse præter struem fascium quos in hyemem conductor repositus erat, in quibus tamen posset aliqua suspicio delitescere. Tum Rex generosum Equitem delegat, Thomæ Knevetto nomen est, qui excuteret suspectam fascium fidem, videretque ne quid insidiarum illa sedes reciperet: Ratus, calidos homines sibi destinasse hanc ultimam noctem in qua suæ nequitæ instrumenta ad Regni interitum expedirent. Hic aliquando victa virtute impietas est, & mala Regni fortuna manus dedit. Thomas Percius erat Regi & naturæ jure & magnis beneficiis devinctus: Quippe etiam in Pensionariorum numerum receptus. Ita vocant selectos ex amplissimis familiis ad illustrem & præcipuam Britannicorum Regum custodiam. Is cum

immane

## A N G L I C A N A.

immane patricidium animo destinasset, admissis aliquot in tanti facinoris communione, id hoc ordine explicare decreverat. Accitus erat ex Belgio vir qui in Anglia natus duodecimum jam annum Hispanis operam dabat. Hic conjurationis minister, ut melius falleret, se pro Percii dudum famulo gesserat. Guido Faux patricidæ nomen erat. Pene à biennio conduxerat hanc Curia partem: credo ne suspecta novitas; & ut tanti apparatus obscurius tergerentur. Ibi scelestis velut domicilium constitutum. Vim in eo ingentem sulphurei pulveris detruserat. Cum primo in diversis consciorum domibus sine suspitione duceretur: ac ut omnem scrutantium eluderet curam, composito lignorum acervo supposuerat fatalem illam mercem. Sed illo demum tempore curatis diligenter omnibus, cum inde paulò post mediam noctem digrederetur Knevettus, ut erat imperatum, hominem adoritur, & quid eo præcipuè tempore ibi ageret, quærit. Ille nescio quæ mentitus se in crastinum usum adornasse, jubetur referrare ostium, quod in illam sedem ducebat. Erat cum Knevetto & Magistratum manus & satellitum. Fingebar nescio quos Regios tapetes è proximo subtractos esse; eosq; hac diligentia quæri. Igitur quum amoveri cœpisset lignorum strues, occurrit primo dolium medicæ, mox  
vis

## CONSPIRATIO

vis tanta tormentarii pulveris ut non de-  
 mum evertere sed corrumpere Civitatem  
 posset. Dolia erant triginta duo, in iis ele-  
 ctissimi pulveris pondo penè millia novem.  
 Super dolia ferreæ massæ, quæ flammæ viri-  
 bus elatæ ultra fulminis impatientiam sævi-  
 rent. Etiam lapides & ingentia velut rupi-  
 um fragmina, quæ ædificii moras suo impe-  
 tu tollerent. Sed in eam rem maxime inten-  
 derant curam, ne Regem incolumem hæc  
 tempestas omitteret.

Infra Regiam cellam dolium erat posi-  
 tum multo cæteris capacius: quia etiam in-  
 ermæ Majestatem sine magno apparatu ag-  
 gredi timebant. Nec dubitatum est, quin, si  
 hoc scelus exitum habuisset, cecidissent ultra  
 triginta millia mortalium, everfis compluri-  
 bus ædificiis, ne misera civitas unica clade  
 deformaretur. Etiam periisset augustissima  
 sedes (Westmonasteria appellant, unde &  
 oppido nomen, tot Regum inaugurationis  
 bus solempnis, tot tumultis religiosa: Ibi re-  
 gni insignia: ibi memorabile solium propter  
 subjecti lapidis famam & de ea Patrum fi-  
 dem: Templum, præter auri marmorisque  
 pretium & Henriciani sacelli decus, quo e-  
 legantius Europa non habet, ipsa antiquita-  
 tis majestate spectabile. Ac ne perduelles  
 sanctitati umbrarum parcerent, quieta om-  
 nium



## A N G L I C A N A.

nium penè Regum ossa eo facinore lacescebantur. Jacuissent everfa monumenta vetustatis, & prope pulcherrima memoria triumphorum. Huic templo vicinum ararium & tot in eo arcana eadem clades petebat. Nec supervixisset incendio Curia ubi jus populo dicitur, ne scelus & perfidiam posset ulcisci. Ita complectabantur omnia uno facinore. Non reliquerant novo sceleri locum, & ipsam Furiarum inventionem fatigaverant. Igitur, cum loquentibus rebus ille nefarius nihil amplius negaret, concubia adhuc nocte in Regiam ducitur. Is collecto spiritu animosus, Scio, inquit, & mihi instare mortem, nec quid ea gravius in me posse decerni. Itaque non expectabo ut tormenta confessionem exprimant. Etiam hoc cum laude dicendum est. Fuit mihi is animus quem ex tanto apparatu colligere potuistis. Regem, Principem, optimates una cæde tollere volui: nec quærite quid me ad illius consilii magnitudinem extulerit. Sacrorum meorum amor & meriti gloria hunc animum immisit, ut in adversarios quacunque audacia sævirem. Nec degenerabat à verborum constantia in teritus vultus: credo, quoniam spes aberat scrupulosæ trepidationis parens. Et vero maximum in præcordiis dolorem sævire dicebat, quod non processisset cogitatum facinus, & tam grande consilium fortuna prodidisset.

Erat

## CONSPIRATIO

Erāt palam , ab altiori fonte decurrere hanc conjurationis stygem. Thomas Percius eo die qui noctem pene fatalem præcesserat , velut ad negotia excedens diversis labyrinthis turbaverat vestigia fugæ suæ: Cum subitò eum in armis esse nunciatum est , & collecta conjuratorum manu, huc illuc diversis voluminibus circumferre contemnendum agmen, ut quod vix sexaginta equites implebat; Peditem in iis neminem esse. Generosos aliquot Nobilissimi Harringtonii equos rapuerunt, fures magis quam hostes. Et pene parricidarum consilium palam erat, voluisse sublato rege & confusis miserabili calamitate omnibus. Serenissimam Elisabetham Regis filiam quæ Burlii educabatur, in potestate sua esse, eam deinde collocare nuptui, prout rerum status & vel exterorum exigeret favor, vel metus urgeret. Sed populus ab eorum scelere aversus, quocunque se contulerant aut oppidorum aditu prohibebant, aut etiam infestis armis abeuntes prosequiebantur. Itaq; tertio die, postquam aggregari cœperant in ipso Britanniae sinu, ingenti miraculo oppressi sunt. Regionis quam infestabant Judex, quum necdum emanasset Westmonasteriensis sceleris fama (quippe ultra centum millia passuum Londino aberant) tantumque audiret esse armatos qui homines publicè ad Romanæ fidei

dei

## A N G L I C A N A.

dei professionem vocarent , missio ad eos nuncio significari jubet, quia cædibus hactenus abstinuerant, si recederent ab amentia , armæque ponerent, ultrò se pro illis suppliciorum deprecatorem fore. Mallent clementiam Regis experiri quam fortitudinem . Illi gnari præcisam spem veniæ magnitudine facinoris, superbis etiam verbis cunctantem judicem exasperent. Neque se illo advocato egere, & si ad eos veniret, aut hoc firmo manu faceret, aut ipsius damno fore. Sane videbantur majorum virium, quam ut imperita oppidanorum manu premerentur . Sed ibi etiam fortuna & Regis & Britanniae vicit. Rusticus villæ familiaris, in quam se receperant, in pulverem sulphureum quem ipsi pluvio aëre corruptum ad ignem siccabant , scintillum imprudens immittit . Illa statim correpta flamma dominorum suorum scelus ulciscitur, in vultus invadit. Aliquorum frontes exustæ, aliquorum membra. Et invadendi facultatem & sustinendi hostis robur idem casus sustulit. Aliqui profugerunt, nocentiores restiterunt velut ad supplicium . Interim villa , ubi se condiderant , oblato ab oppidanis incendio cœpit ardere. Duplici malo circumventi quum & arma foris & intus incendium urgeret , maluerunt ferro cadere quam solvi lentioribus flammis. Desperatione itaque pleni in medium prodeunt, non

## CONSPIRATIO

non aliqua spe vitæ, sed tantum mortem mutaturi. Ibi primum omnes in genua proci-  
dunt, cum Percius Virginis imaginem prompsisset. Ea adorata ad prælium accen-  
duntur. Percius & Catsbeyus juncto inter se  
dorso circumvenientem multitudinem sub-  
movent. Sed glans plumbea transverberato  
Catsbeyo etiam Percium sauciat. Necdum  
audiverant oppidani perfidiæ Authores ex  
Regio præcepto vivos capi oportere. Cats-  
beyus cecidit: Percius vivus quidem in ma-  
nus venerat, sed biduò deinde ex vulneri-  
bus consumptus est. Facile deinde profli-  
gati perduelles. Mox alii, ut quémque fuga  
& metus abstulerant, per diversa dissipati.  
Plurimi tamen capti, publicis custodiis &  
mox suppliciis servabantur. Nec abstinue-  
rant hoc flagitio fœminæ, quasi sequior se-  
xus timeret esse innocens corrupto meliore;  
Illæ quoque detecto facinore in carceres  
missæ sunt, dignæ misericordia, nisi omnes  
miseros esse voluissent.

Quid huic par sceleri? aut quæ cum eo  
componenda crudelitatis atrocitas? Mithri-  
datis furor una nocte in cives Romanos to-  
ta Asia sævit. Siculi suam vesperam cæde  
Gallica nobilitaverant. Utroque homi-  
num genus querebatur. Isti specie quidem  
partium, sed velut æquali odio id videntur  
quæsisse, ne quis esset, qui non eos victos  
lætaretur.

# ANGLICANA.

lætaretur. Sed præcipuam in hoc facto prudentiæ gloriam nec auferre homines Regi possunt, & videtur optimum Numen approbare omnibus voluisse eum suo fastigio dignissimum esse. Quum eripuisset ex tanto incendio non tam scintilla quædam quam fumus & nebulæ, id est, argumenta, sed illa perobscura destinati facinoris, hæc omnibus penè infra curam ponentibus solus Rex non contempsit. Jussit indagari sceleris vestigia, ne aut sua culpa moreretur, aut fortunæ beneficio viveret. Quæ illic prudentia, quæ omnibus sceptris digna sagacitas! Quum deinde proditorum facinus ita esset ex tenebris extractum, ut nondum periculi moles cervicibus depulsa videretur, solus illi cui omnes maxime timebant, solus Rex inturbata fronte constitit. Quæ demum ista animi magnitudo, & digna Heroum virtus! Tibi Patriæ Imperium, quod hodie tua virtute vivit, fata diutissime sospitent. Tibi vitam, quam tot hominum millia immortalitati tuæ prudentiæ debent, omnes Gallicæ devotionis exemplo destinant! ô Auguste, ô Britannice, ô Rex, cujus vitam in hoc seculum fata dispensârunt, ne periclitanti Patriæ ultimum esset.

*O scelus! ô veterum proles vesana Gigantum!  
Fâmne juvat bellare Diis? jam turbine diro?  
Jam*

# ANGLICANA.

Jam revocare chaos? patria<sup>q</sup> indicere moriē?  
 Sacula tot, stirpē<sup>q</sup> Deū<sup>m</sup>, patrum<sup>q</sup> labores  
 Una cæde rapi? Furia<sup>q</sup> Erebus<sup>q</sup> negarent  
 Hoc tantum dictare nefas. Exhaurit æther,  
 Et frumuerē Dii, stupuit<sup>q</sup> exterritus orbis.  
 Regem etiam vis illa petat, quo<sup>q</sup> sydere mundus  
 Purior, & nostras melior lux aspici<sup>q</sup> oras?  
 Hunc Regem vis illa petat, quē Marte secundo  
 Nunc iterū tegit ista<sup>q</sup> dies? Quid perfida tela  
 Abdere, quid tanto cōponcre sulphure fulmen?  
 Quid juvat occulta tot semina cōdere flāma?  
 Ab miseri prohibete minas. Sua numina novit  
 Fulmen, & in magnū nescit peccare Tonantē.  
 Ergone conspici<sup>q</sup>, Cives<sup>q</sup>, Homines<sup>q</sup> Britanni,  
 O dolor! hoc ineant? lacerūne per æthera Regē  
 Spargere, quē melius cælo feret ardua virtus?  
 Purpureosne Patres alio nunc tingitis ostro,  
 Sanguine, cæde, rogis cunctos discrimine nullo  
 Tollere decretū est? irasci<sup>q</sup>que omnibus annis?  
 Nō est, nō hominū scelus hoc, ut Tartara cernas  
 Id molita nefas, imo de pectore terra  
 Impetus, e<sup>q</sup>ue fero venisset flamma Barathro.

FINIS.